

البدیع  
العربی

مجری محمد البکری

# تعمیر حادقہ

روایۃ

رواية

---

# توبة صادقة

---

مجدي محمد أحمد البكري



الأعمال الأدبية



اسم العمل: توبة صادقة  
اسم المؤلف: مجدي محمد أحمد البكري  
التصنيف الأدبي: رواية

رقم الإيداع: 11487 - 2024  
الترقيم الدولي: 978-977-94-9454-8

تصميم الغلاف  
منى شومان  
إخراج فني  
دار البديع العربي  
للطباعة والنشر



ranyhmtwlyblat@gmail.com  
002-01061635162  
002-01156655890



الإهداء

إلى ..

كل الأحفاد ..

في الماضي كان الجد والجدة يجمعون أحفادهم  
ليقصوا عليهم الحكايات وأنا أترك لكم قصة  
مكتوبة لعلكم تذكروني في المستقبل.  
أحبكم جميعاً

مجدي محمد البكري



---



بدأت أحداث هذه القصة منذ نحو تسعة وثلاثين عاماً عندما كان الأسطى طه ينتظر حدثاً سعيداً إذ كانت زوجته هند في شهرها التاسع من الحمل وكانت آلام الحمل لا تنقطع عنها ليلاً ونهاراً وكانت تجلس على سريرها وبجوارها طفلهما الأول يسري البالغ من العمر عامين الذي رزقت به بعد الام متواصلة في شهور حملها الأول وبعد أن وضعت يسري أخبرها الطبيب أن معجزة كبيرة قد حدثت كونها أنجبت هذا الطفل بدون أن يحدث لها مضاعفات كونها تعاني من ضعف عضلة القلب وهو ما دفع الطبيب إلى تحذيرها من تكرار الحمل لخطورته على حياتها ولكن هذه هي إرادة الله فقد حملت للمرة الثانية برغم وجود احتياطات عدم الحمل ومنذ علمها بالحمل في شهرها الثاني وهي تعود الطبيب حتى يرشدها إلى أفضل السبل للحفاظ على حياتها بعد أن فشل الطبيب في إقناعها بالتخلي عن حملها لخطورته على حياتها ولكن كان الرفض التام من هند وحجتها في ذلك إنها إرادة الله لأنها إتخذت كل الاحتياطات اللازمة ومع ذلك حدث الحمل وبينما هي جالسة تعاني دخل الأسطى طه قادماً من عمله متجهاً إليها رأساً وهو يسألها " ها يا هند عامله ايه النهارده " الحمد لله أهو يوم كمان وعدى يا خويا عقبال باقي الشهر ده أنا حاسه إن روحي بتطلع كل يوم لكن ربنا كريم وبيسترها معايا عشان يسري " بس عشان يسري! يعني مفيش أبو يسري ولا أخو يسري اللي جاي ده كمان " يا حبيبي يا طه ده إنت الخير والبركة هو احنا لبنا لزمه في الدنيا من غيرك ده إنت حبيبي وجوزي وأبو عيالي " تعيشي يا أم يسري إنتي عارفه معزتك في قلبي قد ايه من زمان بس يلا بقى شدي حيلك وخليكي جدعه واستحملي الكام يوم دول اللي فاضلين وتقوميلنا بالسلامة عشان طه ويسري والعكروت اللي في بطنك ده " إن شاء الله يا خويا إلا بالحق إنت نويت تسميه إيه محمود على اسم

أبوك الله يرحمه ولا سعد على إسم أبويا الله يرحمه " لأ أنا سايبك إنتي المره دي تسمي واللي تقولي عليه يكون بس قومي إنتي بالسلامة وسميه زي ما يعجبك " تعيش يا طه دايمًا كده تريحني وتدلعني هو أنا بحبك من شويه! ها جبئنا ايه معاك عشا؟! جايبك فضلة خيرك شوية كفته من عند مطعم نونو إنما ايه يستاهلوا بقك الحلو ده ومعاهم كمان شوية سلطه خضرا وسلطة طحينه عجب ومنسيتش اجيبك رز بلبن من عند فتحي اللبان " تسلّم يا طه وتسلّم مجايك إنما قولي يا خويا هما بيقولوا على مطعم عم حسن مطعم نونو ليه " يا ه كل ده ومش عارفه؟! " لأ مش عارفه أنا بسمع بس ومكسوفه اسأل حد وكل ما افتكر أسألك أنسى " طيب عشان تعرفي هما بيقولوا عليه كده عشان بيقولوا يعني إن القبط اللي بتدخل عنده مبتطلعش تاني " يعني ايه يا طه بيحبسها يعني ولا ايه؟! يحبس ايه يا هند ده وأشار إلى رقبتة بعلامة الذبح بيعمل كده " يوه إنت بتكلم جد؟! " لأ طبعًا بهزر بس الناس الوحشه هما اللي بيقولوا عليه كده " طيب يا خويا استنى أما أقوم أجيب أطباق عشان نقعد ناكل " ولا أطباق ولا غيره إحنا نقعد ناكل كده زي ما أنتي في مكانك وكل حاجه محطوطه في مكانها وادي كمان مفرش أهو نحطه الأول عشان تظمني إن مفيش حاجه تقع على السرير " تسلّمي يا ابو يسري دايمًا مهينني ومريحني ده إنت والله عندي أحسن راجل في الدنيا ومهما عملتلك مش عارفه اوفيك حقك " خلاص يا حبيبتى لا حق ولا باطل ده كفاية عليا اشوف ابتسامتك الحلوه دي على وشك بالدنيا وما فيها " وجلسا يتناولان الطعام وبعد أن انتهوا منه رفع طه ما تبقى منه وقام بإزالة أي آثار منه وتنظيف ما قد يكون قد تساقط من ابنيهما ثم قام بإعداد الشاي وجلس بجوار هند وهو مادًا ذراعه خلف عنقها وهي تستند إليه برأسها ونظرة عميقة من الإمتنان تغمره بها شاكرة إياه كل ما يقوم به

على راحتها وبعد قليل غلبها النوم أمام التلفاز حتى سمعا أذان الفجر وقام الأسطى طه حتى يؤدي الصلاة وهكذا كانت تمضي الأيام حتى حانت لحظة وضع هند حملها وكانت بعد ثلاثة عشر يوماً من هذا المشهد، أحست هند بآلام الوضع في ظهيرة أحد الأيام بعد ثلاثة عشر يوماً وكانت قد انتقلت إلى المستشفى لتلقي الرعاية الطبية اللازمة نظراً لخطورة حالتها وذلك بناء على توصية من الطبيب المتابع لحالتها وقامت المستشفى بالاتصال بالطبيب المتابع ليخبروه بناء على طلبه وقام الطبيب بالذهاب إلى المستشفى بأسرع وقت وعندما وصل كانت غرفة العمليات معدة تماماً لاستقبال هند ودخل الطبيب الغرفة ومعه طاقم من الأطباء المعاونين وممرضات على أعلى مستوى وكان الجميع على علم مسبق بخطورة الحالة وقام موظف الاستقبال بالاتصال بزوج هند الأسطى طه حتى يعلم أن زوجته على وشك الولادة وبالفعل أتجه طه إلى المستشفى حتى يكون مسانداً لزوجته في محنتها وعندما وصل وجد أن زوجته لا تزال في غرفة العمليات منذ أكثر من ساعة ونصف الساعة ظل طه في حالة من القلق والتوتر يروح جيئةً وذهاباً أمام الغرفة وهنا مرت عليه إحدى الممرضات ولاحظت توتره وقلقه الشديد فأرادت أن تخفف عنه وقالت: أهدى يا استاذ إن شاء الله تقوم وتخرج بألف سلامة " يا رب إنت عارف مليش غيرها أنا والولاد يا رب بحق جاه النبي تحفظها يا رب " طيب أقعد أرتاح وإن شاء الله ربنا يحفظها ليكوا ده يا ما شفت حالات اصعب من المدام بتاعتك وقاموا ويقوا زي الفل متخفش إنت بس وقول يا رب " يا رب يا رب يا رب يا رب " وترقرقت دمعة ساخنة في عين طه وهو يرجو الله أن يبقي هند على قيد الحياة " يا رب أنا مش عايز حاجه غير إنها تعيش لولادها يا رب " وانحدرت الدموع في هذه اللحظة من عينيه وسالت على وجنتيه وأسرع طه



يكفكف دموعه براحة يده ولم يلقي بالا بحديث الممرضة التي لم يستمع إليها ولم تداعب كلماتها أذنيه وبعد حوالي نصف ساعة أخرى من القلق الذي كان يعصف به فتح باب غرفة العمليات والطبيب خارجاً منه وهو يتصعب عرقاً بالرغم من جهاز التكييف الموجود داخل الغرفة وما أن رآه طه إلا وأسرع إليه قائلاً: طمني يا دكتور " اطمن ولد زي القمر وصحته ما شاء الله عليه " لأ طمني عليها هي عامله ايه " والله في حدود حالتها اللي إنت عارفها كويس هي كويسه إحنا كنا متوقعين الأسوأ لكن الحمد لله ربنا ستر " يعني هي كويسه الحمد لله ربنا يبشرك بالخير يا دكتور " وخر طه ساجداً شكراً لله " وهنا ربت الطبيب على كتفه وهو ساجد تاركاً إياه متجهاً إلى غرفة الأطباء لينال قسطاً من الراحة وبعد لحظات خرجت هند من غرفة العمليات إلى غرفة العناية المركزة بالمستشفى وطه يسير خلف الطاولة ذات العجلات المسجي عليه جسد هند إلى أن وصل إلى باب الغرفة وهناك وجد من يمنعه من ملاحقة هند إلى الداخل قائلاً له: ممنوع يا استاذ لحد هنا ممنوع " نظر طه إلى محدثه فوجده أحد أفراد أمن المستشفى فقال: ممنوع ايه دي مراتي ممنوع ازاي؟! والله دي تعليمات الدكتور واحنا ملناش دعوه روح قوله ولو سمحك أنا معنديش مانع " أروح أقوله أه أروح مروحش ليه هو فيه حد يقدر يمنعي عن هند أنا راичله حالا " واتجه طه إلى غرفة العمليات ليسأل عن الطبيب وهناك أخبروه أنه يستريح في غرفة الأطباء فاتجه إليه وطرق الباب وسمع من الداخل صوت الطبيب: ادخل ودخل طه ووجد الطبيب جالساً على مقعد ومادا قدميه على مقعد آخر وطلب منه الطبيب الجلوس للحديث معه قائلاً: اتفضل يا اسطى طه أقعد كويس إنك جيت عشان عايز أتكلم معاك شويه " بخصوص إيه يا دكتور ده أنا اللي كنت عاوزك " طيب يا اسطى مش تعرف الأول أنا

عايز ايه " آه افضل يا دكتور قول أنا سامع حضرتك " بقى أنا شاييف إنك راجل مؤمن والأعمار بيد الله زي ما أنت عارف " عايز تقول إيه يا دكتور متكركبش بطني أتكلم على طول الله يخليك " طيب أنا حكون صريح معاك إنت طبعا عارف إني نصحت المدام بتاعتك من الأول بعدم الحمل " آه حصل " وبالرغم من كده حملت تاني ونصحتها تنزل الحمل عشان فيه خطورة على حياتها وهي رفضت " آه حصل " طيب اللي عايزك تفهمه إن حالة قلب مدام هند تعبانة جدا وعضلة القلب مكنتش متحملة كل المجهود ده من حمل وولادة " آه يا دكتور طمني الله يخليك هي حالتها خطيرة للدرجة دي " مخبيش عليك هي حالتها خطيرة لكن أملنا في الله كبير وإن شاء الله يعدي اليومين دول على خير وتقوم وترجع بالسلامة بس مفيش حاجه اسمها حمل تاني " يا رب يا دكتور تقوم هي بس ومش عايز عيال تاني بس ربنا يقومها بالسلامه يا رب " ماشي يا اسطى طه إنت كنت عايز تقول إيه بقى " أنا كنت عايز أنا كنت عايز والله منا عارف أنا كنت عايز ايه بالظبط!! آه كنت عاوز أشوفها وبتاع الأمن قالي إن سيا دتك مانع الزيارة وإن لازم إذن منك عشان اشوف مراتي " شوف يا طه صحيح أنا مانع عنها الزيارة نظرا لخطورة حالتها لكن أنا ممكن اسمحك تشوفها بس بشرط " شرط إيه يا دكتور أبوس إيدك! " استغفر الله العظيم الشرط إنك متكلمش معاها ولا كلمه وإذا لقيتها بتفوق تسببها وتخرج فوراً عشان مش عايزها تتعرض لأي انفعال فاهم يا طه " آه طبعا فاهم يا دكتور واو عدك إني متكلمش معاها نص كلمة حتى " ماشي يا اسطى طه بس متنساش وأنت خارج تعدي على الحسابات عشان تسبب حساب المستشفى ومش مهم أنا دلوقتي لو مفيش معاك فلوس " لأ يا دكتور خير ربنا كثير والحمد لله هما بس يستنوا عليا ل بكره أجيب الفلوس كلها " ماشي يا طه

كوبيس إنك قلتلي عشان اكلمهم يصبروا عليك لبيكره اتفضل إنت وأنا حكلم الأمن بس زي ما اتفقنا " ماشي يا دكتور " واتجه طه من فوره بخطى حثيثة إلى غرفة العناية المركزة وهو يدعو الله أن يعيد زوجته إلى منزلها وأولادها بخير وعندما وصل إلى الغرفة وجد فرد الأمن واقفاً فقال له: أنا لسه جاي من عند الدكتور حالا وهو سمحلي ادخل شويه " نظر رجل الأمن إليه نظرة أسى وقال: طيب استنى أكلم الدكتور بس اتأكد عشان مجنيش تعليمات " تحدث رجل الأمن في الجهاز اللاسلكي الذي يحمله مع رجل الأمن الموجود لحراسة غرفة الأطباء وطلب منه أن يسأل الطبيب إذا كان يسمح بزيارة المريضة هند من عدمه ولما رد عليه هذا الأخير بموافقة الطبيب على زيارتها من قبل زوجها فقط مع استمرار منع الزيارة لأي شخص آخر على أن يتم إبلاغ الطبيب بتطور حالتها أولاً بأول آه تمام كده طيب ماشي ووضع الجهاز جانباً وقال " اتفضل يا استاذ ادخل مش حضرتك جوز الحالة اللي لسه داخله من شويه! " آه أنا جوزها سييني بقى أشوفها " ودخل طه الغرفة فوجد كبيرة الممرضات واقفة مع طبيبة حديثة التخرج والأخيرة تلقي بتعليماتها وتتابع تثبيت مجموعة من الأسلاك بصدر هند وعندما شاهدت طه أشارت إلى كبيرة الممرضات أن تخرجه خارج غرفة العناية وشعر طه على الفور أن الطبيبة تريد إبعاده عن الغرفة فقال بصوت هامس: على فكره أنا لسه واخذ إذن من الدكتور نبيل إنني أشوفها وأنا ساكت ولو حضرتك مش مصدقاني ممكن تسألني بتاع الأمن اللي واقف بره العناية " أشارت الطبيبة إلى فهمها علامة أنها تريده أن يصمت ثم أشارت له بالوقوف بعيداً حتى يتسنى لها استكمال عملها وعندما انتهت من تثبيت الأسلاك أخذت طه بعيداً عن السرير الذي ترقد عليه هند ثم بدأت تلقي التعليمات عليه ولم تتجاوز هذه التعليمات كلام



الطبيب نبيل فما كان من طه إلا أن أخبرها بأن الطبيب أخبره بكل شيء وهو يعلم تماما ماذا سيفعل وهنا غادرت الطبيبة الغرفة مع التنبيه على كبيرة الممرضات أن تراقب الحالة جيدا وأيضا تطمئن على عدم تجاوز طه التعليمات وقف طه يغلفه الصمت وهو يتأمل حال هند ومرعلى ذهنه في تلك اللحظة شريط تسعة أشهر من الذكريات هي مدة حمل هند وحتى لحظة وضعها المولود وهنا ادرك طه أنه لم يشاهد ابنه الجديد فسأل كبيرة الممرضات بصوت هامس عنه قائلاً: هو لا مؤاخذه يا ست الحكيمة هو فين أبني مش المفروض يكون جنب أمه دلوقتي " لأ طبعاً مش مفروض يكون هنا لحد ما تفوق وكده كده متخافش البنات خدوه عشان يحموه ويلبسوه ويتوزن والحاجات اللي إنت عارفها دي " طيب أنا عايز اشوف إبني أعمل إيه! " متعملش حاجه زمان البنات حيحبوه لحد عندك هنا بس بعد المدام بتاعتك ما تفوق " طيب هو حضرتك شفتيه برضه ولا إيه " لأ يا استاذ أنا مكنتش معاهم في العمليات أنا موجودة على طول في العناية بس اطمئن إبنك إن شاء الله زي الفل متخفش وعشان تطمن أكثر لو فيه حالة مش كويسه إحنا بنعرف على طول من زمايلنا اطمئن بقى! أهى باين ابتدت تفوق " طه يا طه يا طه متسبنيش يا طه أمسك إبنك كويس وخلي بالك احسن ده لسه لحمه حمرا- إيه ده إنت وقعته يا عيني يا سعد يا بني معلش أبوك لسه بيتعلم الشيل مع إنه بيشيل حديد كثير أه أه أه حموت يا طه الحقني يا حبيبي أه ينفع كده اللي إنت فيه ده هو إنت حتعرف تربي العيال لوحداك أه يا طه الحقني وصيتك العيال يا طه أوعى حد يتعبهم في حياتهم متجوزش بعدي يا طه أسمع مني وخصوصاً العقربه اللي عينها منك أه إنت رحت فين كده برضه تسييني وتمشي " استمع طه لهذا الحديث المنفرد من هند وهو ينظر إلى كبيرة الممرضات

يستجد بها أن تفعل شيئاً ولكنها كانت تنظر إلى الأجهزة المثبتة على جسد هند حتى تطمئن إلى وجود مؤشرات طبيعية من عدمها وكانت المؤشرات مطمئنة إلى حد كبير فأشارت إلى طه بالتزام الصمت واضعة أصبع السبابة أمام فمها وبالفعل استجاب طه لها حتى لا يؤدي هند بحديثه معها وهنا أخذته كبيرة الممرضات إلى الخارج حتى تستطيع أن تتحدث إليه وعندما خرجا من الغرفة قالت: اطمئن كل شيء تمام الحمد لله " أه بس دي بتقولى حموت يعني معناه إنها تعبانه اوي " لأ يا أستاذ دي تخاريف البنج واحنا كل يوم بنسمع من ده كتير متقلقش إنت بس وهي إن شاء الله حتقوم وتبقى زي الفل " الله يبشرك بالخير يا ست الدكتور " لأ أنا مش الدكتور أنا المساعدة بتاعتها " يا ست الدكتورة المساعدة ميفرقش معايا بس طمئني الله يخليكي يعني هي كويسه " أه الحمد لله مفيش أي حاجه تخلينا نخاف عليها وبكره إن شاء الله تقوم وترجع بالسلامة بيتها تنور هولاك " تعيشي يا ست الكل ووضع طه يده في جيبه مخرجاً ورقة مالية ووضعها في يد الممرضة التي رفضت بشدة أن تأخذها ولكنها تحت إصرار منه قبلتها على مضض وهو يوصيها أن تهتم بهند " ثم غادر طه المستشفى حتى يعود إلى المنزل ليرى صغيره الآخر يسري ممنيا نفسه برجوع هند في اليوم التالي وبعد أن عاد إلى المنزل أخذ يسري من عند إحدى الجارات التي كانت ترعاه حتى عودته وشكرها طه وهو ممتن لها ثم استأذنها أن يتركها لها في الصباح حتى يذهب إلى المستشفى ويعود بهند ورحبت الجارة بذلك بل وزادت على ذلك أن عرضت على طه ترك يسري يبيت معها والبقاء حتى عودة هند وشكر لها طه ذلك مخبراً إياها بأنه سوف يحضره في صباح اليوم التالي وهكذا مرت الساعات الحرجة الأولى حتى إذا كان صباح اليوم



التالي إذا برنين الهاتف يتصاعد وهنا شعر طه بالانزعاج وتمتم قائلاً: يا رب استر يا رب جيب العواقب سليمة.

تناول طه سماعه الهاتف وهو يشعر بالانزعاج وقال: الو أيوه مين معايا " صباح الخير يا استاذ طه حضرتك إحنا حسابات المستشفى وكان حضرتك المفروض تدفع امبارح ومشيت من غير ما تدفع " أه حسابات المستشفى طيب يا اخي وقعت قلبي صباح النور الأول حاضر أنا جاي كمان شويه ومعايا الفلوس بتاعتكم وبعدين هي الدنيا طارت عشان تخضني الخضه دي على الصبح " والله أنا آسف يا فندم إذا كنت سببت لحضرتك أي إزعاج لكن حضرتك عارف أنا ممكن المدير يخصملي والحكاية مش ناقصه " عموما حصل خير بس الدكتور نبيل قالي إنه حيكلمك عشان تستنى عليا للنهارده " يا فندم الدكتور نبيل ممكن يتكلم عن أجره هو حر يسييه لحضرتك أو ياجله إنما حساب المستشفى ده يخصنا إحنا وده اللي بكلم حضرتك فيه " خلاص يا حضرة أنا جايلك حالا بس اديني ساعة زمن أكون عندك " براحتك خالص يا فندم المهم إن اليوم ميعديش من غير ما نخلص الحساب " طيب يا سيدي شكرا نهارك أبيض " مع السلامة يا فندم " وتوجه طه من فوره إلى جارتة ليسلمها طفله يسري وذهب ومع النقود إلى المستشفى وتوجه إلى الحسابات ليسدد حساب المستشفى والطبيب ثم اتجه إلى غرفة العناية المركزة حيث ترقد هند وهناك وجد من يمنعه من الدخول وهو فرد أمن الفترة الصباحية فقال له: أنا مراتي عندكم جوه وأنا جاي أشوفها " ممنوع يا استاذ الدخول إلا بإذن الدكتور " طيب ما هو أنا أخذت إذن امبارح وأسأل زميلك بتاع بالليل " يا استاذ أنا مليش دعوه بزيملي أنا عاوز إذن الدكتور وأنا ادخلك " يعني إنت مفيش فايده فيك طيب فين الست الحكيمة اللي كانت بايته هنا ولا روحت هي كمان " أه قصدك مدام منال " معرفش

إسمها إيه اللي هي الست البيضة المليانه شويه دي " أيوه هي مدام منال استنى اندهالك من جوه " ماشي اديني مستني أهو " ودخل رجل الأمن الغرفة وعاد بعد لحظات بصحبة الممرضة التي ما إن رأت طه إلا وقالت: أيوه يا محمد هو ده جوزها سيبه يدخل بس استنى عايزاك في حاجه الأول قبل ما تدخل " حاجه حاجة إيه هي هند جرالها حاجه " لأ يا أستاذ طه بعد الشر أنا بس عايزه اقولك إنها ضعيفة جدا ومش عايزاك تطول معاها وعلى قد ما نقدر منخليهاش تتكلم كثير " حاضر يا ست نوال أوامرك " طيب اتفضل وما إن دخل طه الغرفة إلا ووجد هند علي حالتها التي تركها عليها وجسدها كله موصول بالاسلاك وهي تكاد تفتح عينيها بصعوبة بالغة وتتهدج أنفاسها أتجه طه إليها وبصوت هامس راح يحدثها: حمدا لله على السلامة يا هند عامله ايه يا حبيبتى " الحمد لله كل اللي يجيبه ربنا كويس إنت عامل ايه إنت ويسري " إحنا الحمد لله زي القروء المهم إنتي وبعدين متكلميش أنا حقولك كل اللي عايزه تعرفيه من غير متكلمي " اومات هند برأسها علامة الموافقة لأنها كانت لا تستطيع التنفس بصورة طبيعية وكانت تعاني من الكلام وتبذل مجهودا كبيرا فيه وتركت طه يحدثها عن ليلة الأمس وكيف قضاها بمفرده لأول مرة منذ أكثر من ثلاثة سنوات كانت هي فيها نعم الزوجة ونعم الرفيقة التي تشاركه الحياة وكيف قضى ليلته وحيدا مع يسري الذي ظل يبكي فترة ليست بالقصيرة مناديا عليها حتى تعب من البكاء ونام ثم كيف أعاد يسري إلى الجارة صباحا وجاء إليها حتى دون أن يتناول طعام إفطاره حتى يطمئن عليها وحين انتهى طه من حديثه إلا وجد دمعة ساخنة تنساب على وجنة هند وهي تقول بصوت متقطع: يا عيني يا ضنايا على عيني والله بس الظاهر إنك حتعيط عليا كثير أنا تعبانة اوي يا طه خدني معاك البيت حاسه اني حموت



متسبنيش أموت هنا عايزه أموت على فرشتي " بعد الشر عنك يا هند موت إيه بس اللي بتكلمي فيه ده الدكتور نبيل الله يستره قالي امبارح إنك زي الفل وحتى الست الحكيمة قالتلي نفس الكلام " (أنا اللي أدري بنفسي يا طه وأنا اللي حاسه مش هما " طيب وحدي الله وبلاش تكلمي وأنا حشوف الدكتور حيقول ايه وارجعلك " طيب استنى قبل ما تمشي هات إيدك " ومد طه يده اليمنى إليها ومسكتها هند لتقربها إلى فمها وتقبلها وقام طه بسحب يده مسرعا وهو يقول: إيه اللي بتعمليه ده يا هند ده أنا اللي أبوس إيدك ورجلك كمان " سامحني يا طه على أي حاجه زعلتك مني عايزه اعرف إنك راضي عني " زعلتيني!! إنتي عمرك ما زعلتيني طول عمرك طيبة وحنينه عليا وعلى ابننا هو إنتي فيه زيك يا أم يسري " يعني راضي عني يا خويا شهادة أدام ربنا " طبعاً راضي المهم إنتي اللي تبقي راضية " ثم قام طه بتقبيل رأسها وهو يقول: أشوف بس الدكتور نبيل وارجعلك مش حتاخر عليكي " مع السلامة يا طه " وتركها طه متجهاً إلى الخارج وسأل رجل الأمن: متعرفش الدكتور نبيل الاقيه فين دلوقتي " شوفه في استراحة الدكاترة ممكن تلاقيه هناك وإن ملقيتوش اسأل عليه هناك وهما يقولولك هو فين بالضبط " ماشي يا خويا شكرا " وتركه طه إلى غرفة الأطباء ووجد الطبيب نبيل هناك الذي ما إن شاهده إلا وقال: كويس إنك جيت أنا كنت عايزك " خير يا دكتور عايزني في إيه "

قال الطبيب: تعالى أقعد بس الأول ارتاح إنت شفت مدام هند النهاردة " أه يا دكتور أنا لسه جاي من عندها حالا وسايبها وجيت لحضرتك عشان تطمني عليها " أسمع يا طه أنا مخبش عليك المدام بتاعتك حالتها مش عارف أقولك ايه بس هي مش تمام ومحتاجة دعاكم ادعيها ربنا يفوت الكام يوم اللي جابين دول على خير " ليه يا دكتور هو مش حضرتك قتلتي إنها





كويسه وبخير " شوف يا طه الأعمار بيد الله والسليم ممكن يموت قبل المريض ومحدش يعرف عمره لكن أنا واجبي كطبيب إنني أقولك إن حالتها خطيرة ومش حينفع تسبب المستشفى لأن ده فيه خطورة كبيره على حياتها وأنا شايف طبقاً للتقارير اللي جتني إنها عايزه تسبب المستشفى برغم خطورة الحالة " يعني حضرتك شايف ايه؟! " أنا بقولك أهو مش حينفع تسبب الرعايه عشان تلاقي حد يتابعها وعموما أنا كتبت النهاردة إنها تقعد معانا كمان يومين تحت الملاحظه الطبيه عشان نطمئن عليها " بس يا دكتور دي هي طلبت مني دلوقتي إنها تروح بيته " إنت حر لكن أنا اللي عندي قلته وكتبته وإذا كنت عايز تخرجها حتكتب إقرار إنك بتخرجها تحت مسؤوليتك عشان مترجعش تقول إننا قصرنا معاك في أي حاجه " لا يا دكتور مش حخرجها طبعا مادام حضرتك شايف كده بس مش عارف أقولها إيه عشان نفسييتها تعبانه وعايزه تخرج " طيب سيب الحكايبه دي علينا إنت تروح تقعد معاها عادي وأنا بعد شوية جاي أشوفها واتكلم معاها واقنعها إن وجودها في المستشفى ضروري خلاص يا طه " آه والنبي يا دكتور ربنا يخليك ده أنا والولاد ملناش غيرها ده أنا محتاس من امبارح بحتة العيل اللي عندي " خلاص يا طه روح إنت وأنا خمس دقائق وتلاقيني جاي على طول " وترك طه الطبيب متجهاً إلى غرفة العناية وعندما وصل وجد فرد الأمن يستوقفه قائلاً: بلاش تدخل دلوقتي عشان الست الدكتور جوه بتكشف على المدام بتاعتك لأن جتلها أزمة وهما دلوقتي بيعملوا اللازم معاها " إيه هند جتلها أزمة وعايزني أقف أوعى خليني ادخل هو ينفع اسيبها في حالتها دي مشوفهاش واطمن عليها " مش حينفع تدخل يا استاذ بناء على تعليمات الدكتورة " أوعى سييني بلا دكتوراه بلا زفت مفيش حد يقدر يمنعني عن مراتي في حالتها

دي " يا استاذ بقولك " " سيبه يدخل يا محمد قالتها الطبيبه  
موجهة حديثها لفرد الأمن تعالى ادخل يا استاذ قالتها بمسحة من  
الحزن تكسو وجهها " " ودخل طه بصحبة الطبيبه فوجد  
زوجته وقد نزعت عنها الأسلاك وهي نائمة وقد تم تغطية  
وجهها بالملاء البيضاء وفي نفس اللحظة وصل الطبيب نبيل  
إلى الغرفة واتجه مسرعاً إلى هند لياشر الكشف عليها وهو  
ينظر إلى الطبيبه التي أدارت رأسها يمنة ويسرة علامة أن لا  
فائدة من ذلك فقد فارقت هند الحياة كل ذلك كان يتم أمام أعين  
طه الذي كان يقف عاجزا مشدوها فاغرا فاه لا يدري من أمره  
شيئا لا يكاد يصدق أن هند فارقت الحياة ولم ينتبه إلى الطبيب  
الذي أمسك بكتفه وهو يمد يده إليه معزيا إياه وجاءه صوت  
الطبيب وكأنه قادم من جب عميق " شد حيلك يا طه البقاء لله  
وحده " ولم يرد طه كأنما يرفض فكرة أن زوجته وأم أبناءه قد  
فارقت الحياة وترك طه يد الطبيب الممتدة إليه وذهب إلى هند  
كاشفا وجهها ليجدها وقد انبسطت اساريرها تماماً وكأنها تغط  
في نوم عميق وملامح ابتسامه تكسو وجهها وهنا التفت طه إلى  
الطبيب وهو يقول: دي نايمه يا دكتور اجيلها وقت ثاني تكون  
صحيه " تعالى يا طه إنت راجل مؤمن وعارف إن البقاء لله  
وحده " لأ متقولش كده يا دكتور دي هي نايمه بس انتوا مش  
واخدين بالكوا أنا عارف هند وهي نايمه بيكون شكلها ازاى آه  
دي هي نايمه أهي زي الملايكة هو فيه حد ميت بيبقى شكله كده  
اكيد نايمه وانتوا غطانين " وضع نبيل يده على ذراع طه  
ساحبا إياه إلى الخارج وهو يقول: طيب تعالى معايا نتكلم عندي  
في الاستراحة عشان نسيبهم يخلصوا الإجراءات تعالى يا طه "  
وسار طه بصحبة الطبيب وكأنه تحت تأثير التتويم المغناطيسي  
أو كأنه تحت تأثير مخدر إلى أن وصل إلى استراحة الأطباء  
وهناك جلس يستمع إلى كلام كثير من الطبيب لم يستطع أن

يميز منه حرفاً واحداً رافضاً واقع أن هند قد تركته في معترك الحياة وحده دون أن تستكمل معه رحلة تربية الأبناء ثم ما لبث أن سرت دموعه ساخنة على وجنتيه وانتبه إلى حقيقة أنه أصبح وحيدا مع طفلين لا يعرف كيف يتعامل معهما وخاصة الضيف الجديد الوافد عليه سعد نعم سوف أسميه سعد كما أرادت هند " ياه دي زي متكون عارفه إنه حيبقى يتيم أه ما هو سعد اليتيم " كان هذا حوار صامت يدور في رأس طه ثم أنتبه إلى حقيقة أنه لم يشاهد طفله الجديد وهنا سأل: هو أبني فين يا دكتور أنا مش شايقه " إنك مع الممرضات بيرعوه متخفش ده هو زي الفل وكل البنات هنا حبينه " طيب أنا أعمل ايه دلوقتي " إنت حتستنى معايا شويه عشان اديك شهادة المستشفى تسجل إنك في الصحة وشهادة الوفاة عشان تصريح الدفن شد حيلك يا طه إنت وراك مسئولية كبيرة ولازم تنتبه لولادك " أه مسئولية كبيرة تقطم الوسط والله ما انا عارف اعمل ايه ولا اربيهم ازاى دول الحمد لله على كل شيء يا رب إنت أعلم بحالي يا رب إنت أعلم بحالي قالها ودموعه تجري تغرق وجهه.

غادر طه المستشفى تاركاً ولده وقرر الاتصال بشقيقته في إحدى محافظات مصر طالبا منها المعونة والمشورة كيف يتصرف في أزمتة هذه في أسرع وقت ممكن لأنه كان قد فقد القدرة على إعمال العقل لحل المصيبة التي حلت به وكانت هذه المحادثة: - الو أبوه ياعزه. شفتي المصيبة اللي اخوكي واقع فيها " مصيبة ايه يا طه كفى الله الشر. إنت كويس ويسري عامل ايه وهند عامله ايه معلىش يا خويا إنت عارف العيال ودوشتهم وطلباتهم اللي مبتخالش أنا عارفة إنني مقصره معاك بس غصب عني والله " أنا عارف يا ختي بس والله غصب عني أنا كمان والشديد القوي هو اللي خلاني الجأ لك دلوقتي " خير يا خويا قولي بس فيه إيه " هند يا عزه هند " مالها يا خويا انتوا

متخانقين دي تبقى عين وصابتكم " متخانقين ايه بس يا ريتها كانت جت على الخناق هند يا عزه تعيشي إنتي هند ماتت بعد ما خلفت إبني الثاني " يا لهووويي يا خراب بيتك يا خويا هند ماتت الله يرحمك يا ختي دي كانت ونعم الست " هو أنا بكلمك عشان تولولي ولا تشوفيلي حل في المصيبة اللي اخوكي واقع فيها " مصيبه وأي مصيبه الله يرحمك يا هند هو احنا كنا نلاقي واحدة زيها إنما نقول ايه بقى أدي الله وادي حكمته البقاء لله يا طه والله هند قطعت بيا ومش عارفه اقولك ايه " عايزك تفكري معايا أعمل ايه في العيال وفي حياتي حنعيش ازاي من غير هند قوليلي " شوف يا طه أنا جايلك دلوقتي حالا حقول لأبوسيد يجيبني عندك أقعد معاك ومع العيال شويه لحد منلاقي حل وإن شاء الله نلاقي حل بسرعه عشان ولادك يا ولداه لسه لحمه حمرا " طيب يا عزه مستنيكي متتاخرش علياالله يخليكي لحد ما روح أجيب التصاريح واعمل الدفن تكوني عندي عشان المسكين ده اللي اتولد يتيم الأم " حاضر يا خويا ولا تعتل هم أنا جايه إن شاء الله على طول " أغلق طه الهاتف وذهب لإجراء المطلوب منه ثم ذهب لإحضار سعد من المستشفى ولكن قابله دكتور نبيل وطلب منه أن يترك سعد لحين أن يستطيع ترتيب حياته لمدة يومين على الأكثر وبعدها يستطيع أن ياخذ ابنه وهذه خدمة منه شخصيا له لأن الطبيب يعلم ظروف طه " وشكره طه على ذلك وهو يقول: والله يا دكتور دي خدمة كبيرة من حضرتك أنا لحد دلوقتي مش عارف اتصرف ازاي لكن أهى أختي جايه من البلاد وكده نبقي لقينا حل ولو مؤقتاً لحد ما اشوف ربنا يحلها ازاي " وترك طه الطبيب متجهاً إلى المنزل حتى يطمئن على يسري ويخبر الجارة بما جرى حتى تكون على بينة وربما تستطيع مساعدته في إيجاد حل وعندما وصل وقبل أن يطرق الباب سمع صوت بكاء يسري من الداخل وهو ينادي على أمه وينادي

عليه فاجهش طه بالبكاء وظل واقفاً على الباب لا يجرو أن يطرقه ولا يعرف كيف وماذا يقول لطفله عندما يسأل عن أمه وبعد لحظات استجمع طه رباطة جأشه وطرق الباب لتفتح له جارته وعندما نظرت إليه ووجدت عيناه متورمتان ولونهما يميلان إلى الاحمرار شعرت أن هناك كارثة حلت بطنه وأن هذه الكارثة مرتبطة بجارتها وصديقتها هند فقالت: خير كفى الله الشر مالك يا اسطى طه هي هند كفى الله الشر جرالها حاجه " ولم يستطع طه الإجابة ولا النظر في عينيها واشاح بوجهه مبتعداً عن مواجهة نظراتها المتسائلة وغمغم قائلاً: تعيشي إنتي يا ست أم أحمد هند تعيشي إنتي " يا لهوي هند أختي وحببتي (قالتها وهي تضرب بكف يدها على صدرها) هند ماتت لأ قول كلام غير ده مش ممكن لا إله إلا الله هند ماتت " وهز طه رأسه بالإيجاب دون أن يلفظ كلمة واحدة " معلش يا خويا ربنا يصبر قلبك وقلبي يا عيني يا ختي دي لسه صغيره لكن نقول ايه ادي الله وادي حكمته البقية في حياتك يا ابو يسري العمر الطويل لك " معلش يا ست أم أحمد أنا بتاقل عليك بس إنتي شايفه الظروف اللي الواحد فيها ومش عارف اعمل ايه " يا خبر يا بو يسري ده إنت أخ والمرحومه اهيء اهيء واجهشت بالبكاء وهي تقول لأ مش قادره اقول عنها المرحومة " شدي حيلك يا ست أم أحمد معلش بس ممكن اطلب منك طلب " من عنيا يا خويا دي الجيران لبعضيها وانتوا والله يعلم ربنا اكثر من جيران انتوا اخوات اطلب عنيا عايز ايه عايز فلوس " لأ يا ستي كتر خيرك أنا بس بقول يسري يعني " متخفش يا خويا ده في عنيا من غير ما تقول وكمان فين المحروس أخوه مجبتوش معاك ليه ولا هو عند حد من قرابيك " لأ يا ست أم أحمد أنا سايبه في المستشفى لحد اختي متيجي من البلد وتسلمه هي عشان أنا مش عارف اعمل ايه معاه " وده كلام برضه إنت تروح دلوقتي



تجيبه وتيجي وتخلي الدكتور يكتبلك على نوع لبن صناعي  
عشان الرضعة تجيبه معاك وأنا اتولى اللازم لحد ما اختك  
تيجي على راحتها وبعدين ماهو أنا برضك أختك مش كده " آه  
طبعاً إنتي نعم الأخت والله بس أنا مش عايز ازود الحمل عليك  
وكفاية عليك يسري " هو أنا كنت اشتكيتك ده أنا اللي بقولك  
أهو روح هات أخوه إسم النبي حارسه وصاينه وتعالى على  
الأقل أختك أما تيجي مش لسه حنشحطها أهي تيجي تلاقيه هنا  
" ماشي كتر خيرك والله الواحد مش عارف يودي جمابلك دي  
فين " أخص عليك. جمابلك هو فيه بينا جمابلك يعني أنت لو  
لقيتني واقعه في ضيقه مش حتقف جنبني " لأ طبعاً وإلا ابقى  
قليل الأصل ده إنتي جمابلك مغرقانا يا ست أم أحمد والله " تاني  
يتقول جمابلك روح يا خويا هات إبنك من المستشفى ومتضيعش  
وقت يلا بقى من غير مطرود " حاضر يا ست ربنا يخليكي لينا  
" وهكذا كانت الحلول تنفتح أمام طه بعد أن كان يظن كل الظن  
أن مشكلته مستعصية على الحل. ذهب طه إلى المستشفى  
لإحضار سعد وعندما وصل إلى هناك وجد تعاطفاً كبيراً من  
الجميع معه وخاصة الممرضات اللواتي كن يتبادلن الاعتناء  
بسعد بل إن احدهن لم تستطع أن تخفي دموعها وأخذت تقبل  
سعد مودعة إياه وتمكن طه من الخلاص من هذا الموقف  
بصعوبة بالغة ولما توجه إلى الخارج صادف في طريقه دكتور  
نبيل الذي بادر بالعزاء مرة أخرى ثم سأل طه عما سوف يفعله  
وعندما اطمأن على وجود بديل للاعتناء بسعد قال: استنى أما  
اكتبلك نوع لبن اطفال تجيبه من صيدلية المستشفى ده مش  
حتلاقيه بره بسهولة وأنا حكلمهم لك عشان تاخذ الكمية اللي  
تحتاجها لحد ما تلاقيني بديل تجيب منه " متشكرين يا دكتور دي  
جمابلك دي الواحد مش عارف اعمل إيه عشان اردها لحضرتك  
" متقولش كده يا طه ده ربنا اللي بيساعدك واحنا مش اكثر من

منفذين لإرادة الله وأي حاجه تعوزها تعلالى على طول " ربنا  
بيبارك فيك وفي صحتك و علمك يا دكتور " ومضى طه وهو  
يحمل طفله الرضيع لأول مرة في حياته ثم همس قائلاً: معلش  
يا بني قدرك كده متشوفش أمك ولا هي كمان تشوفك وتتولد بيتيم  
يا ترى يا بني حيحصلك إيه بعد كده في حيا تك وأخذ طه من  
صيدلية المستشفى كمية من حليب الأطفال يكفيه لثلاثة أشهر ثم  
توجه حاملاً طفله إلى المنزل وكان سعد طوال الوقت نائماً  
وكان الملائكة يحرسونه وكان بين الحين والآخر يبتسم ابتسامة  
جميلة حتى وصل إلى المنزل وطرق طه باب جارته أم أحمد  
حتى يسلمها سعد كما اتفقت معه وعندما طرق الباب وجد  
الجاره تستقبله وهي تقول: اتفضل يا خويا دي أختك وجوزها  
لسه جايبين وبيسالوا عليك قتلهم يتفضلوا عندي على ما تيجي  
إنت وإسم النبي حارسه " يعني عزه عندك وأبو سيد " أه أهم  
اتفضل اتفضل " لأ معلش كده كتر الف خيرك وجميلك ده على  
راسي يا ست أم أحمد إحنا نطلع عندي فوق يرتاحوا على  
منشوف حنعمل إيه " يا خبر جميل! جميل إيه بس اللي بتكلم  
عنه ده احنا أهل وأخوات " أه والله وربنا الشاهد ده إنتي عملتي  
اللي أختي تعمله وزيادة. يلا يا ابو سيد تعالوا عندي فوق وهنا  
جاءت أخته عزه وهي تبسط يدها وتقول: عنك بقى المحروس  
ده وكفاية عليك كده وحملت عزه سعد وتقدم طه الركب صعودا  
وهو يحمل علب الحليب ووراءه أبو سيد يحمل حقيبة سفر كبيرة  
ومن وراه عزه تحمل سعد وما إن فتح طه الباب إلا واجهش  
بالبكاء وهو يقول: بقى معقول يا رب ادخل البيت ملاقيش هند "  
واحتضنته عزه والدموع تنهمر منها وهي تقول: شد حيلك يا  
طه وأمسك نفسك يا خويا ده إنت وراك هم ما يتلم ومن خلفهم  
وقف أبو سيد يقول: متشد حيلك يا بو نسب كلنا لها " الشده على  
الله اتفضلوا يا جماعه! الله او مال فين يسري إحنا نسينا الغلبان

الثاني ده كمان استنوا يا جماعه انزل اجيبه وبالمره كمان أجيب لقمة ناكلها " ودي تيجي يا ابو نسب إنت انزل بس هات يسري إحنا عاملين حسابنا في الزاد متعتلش هم " ايه ده هو انتوا جايبين أكل معاكوا " آه يا خويا إحنا عارفين حتكون في إيه ولا في إيه عشان كده عملنا حسابنا انزل إنت بس للوليه اللي تحت كتر خيرها هات إبنك وتعالى " والله الواحد مش عارف يقولكوا ايه " ولا تقول ولا تعيد يا ابو نسب ده إنت خيرك سابق " وهبط طه إلى الأسفل مرة أخرى حتى ياتي بولده ولكن الجارة أخبرته أنه نائم بعد أن تناول الطعام مع ولديها وطلبت منه أن يتركه نائما قائلة: الصباح رباح يا اسطى " ووافق طه على مضض ثم عاد إلى الأعلى وأخبر أخته وزوجها بما حدث وقالت عزه: الست دى باين عليها طيبه قوي وبتعزك دي مبطلتتس كلام عن المرحومة هند من ساعة ما وصلنا لحد إنت ما جيت " آه ماهي المرحومة كانت صاحبته الروح بالروح وكانت كل سر أم أحمد معاها " هو انتوا حفضلوا ترغوا كده ومش حناكلنا لقمه يلا يا وليه حضري لنا لقمه نتقوت بيها ده زمان اخوكي على لحم بطنه من الصبح " أخويا برضه ولا إنت اللي متصبرش على نفسك ده زمانك إنت اللي واقع من الجوع وبتمسحها في اخويا " طيب أنا اللي واقع خالصينا بقى عشان نشوف حنعمل إيه بعد كده يلا اعمليلك همه " طيب سمي يا طه وخذ سعد في حضنك على مجهز أنا الأكل " وبالفعل قامت عزه بتجهيز طعام العشاء وأكل الجميع حتى إذا انتهوا منه جلست عزه على الأرض باسطة ساقها وسعد يتوسد حجرها ثم قالت: أسمع بقى يا طه بقى هلا هلا على الجد والجد هلا هلا عليه " عايزه تقولي إيه يا ختي " عايزه اقولك إنك مش حتعرف تعيش كده إنت بولادك دول لوحدك " يعني ايه يا ختي " خليني بس أخلص كلامي إنت يا ولداه بقيت بطولك مع العيلين دول ولو قلتك تعالى عيش في



البلد وأنا اراعيهملك حتقولي شغلي وأنا طبعا مقدرش اسيب بيتي وولادي عشان اجي أقعد معاك هنا صح ولا أنا غلطانه " لأصح وعين العقل يا عزه يا ختي طيب والحل! " الحل مفيش غيره حل الحل إنك تتجوز وتجييب ست تربيلك عيالك وتاخذ بالها منكوا إنت عيالك لسه لحمه حمرا ومحتاجين خدمه محدش يقدر عليها غير الستات قلت ايه يا طه! " حقول إيه كلامك عين العقل بس أنا مش حقدر اعاشر واحده تانيه غير هند وفرضا إذا قبلت بكلامك ده مين دي اللي تقبل تتجوز راجل معاه عيلين زي دول! " يا خويا الستات الطيبين كتير بس إنت قول آه ومش حنغلب نجيبلك واحده محترمه وبنت حلال واهو بنات البلد كتير والف من تقبل بس قول آه قلت إيه! " والله مش عارف اقولك ايه يا عزه بس الظاهر إن مفيش حل غيره الأمر لك يا صاحب الأمر " بس يا خويا ادام وافقت سيبلي أنا بقى موضوع العروسه عليا " وليه عليكي إنتي منا برضه ليا رأي وعندي عروسه بنت حلال لآبو نسب " عروسه مين يا ابو سيد اشجيني يا خويا إنت حاطط عينك على مين وناوي تبلي طه بيها " يا وليه اتلمي بقى ده كلام تقوليه برضه يعني ابو نسب يقول عليا إيه! " سيبيه يا عزه يقول قول يا بو سيد مين " أنا بقول يعني البت أزهار بنت أبويا محمد الوكيل اللي في آخر البلد بت حلوه وجدعه ومتعلمه أهي دي اللي تنفع طه قلتي إيه يا أم العريف! " قلت لا إله إلا الله إنت يا راجل إنت عايز تحرق دمي أهي البت دي بالذات متنفعش دي بت كده دلوعه في روحها وعايزه اللي يناغشها على طول يعني دي هي اللي عايزه تتربي مش تربى عيال اخويا " طيب يا عزه قولي إنتي مين تعرفيها تصلح لي " لأ سيبيني إنت بس ادورها في راسي والصبح اقولك هو فيه كذا واحده والصباح رباح يا طه ماشي " ماشي يعني هو أنا قتلتك يلا روعي هاتيهاالي دلوقت " ونام الجميع وعلا صوت شخير

ابو سيد الذي نام ملء جفونه وجواره ظلت عزه تتقلب لا تستطيع النوم وجوارها سعد الذي كانت تنظر إليه بعين الأسي وتفكر من التي تصلح أن تكون زوجة لأخيها وأم بديلة لهذان الطفلان! وظلت عزه على هذا الحال إلى أن غلبها النوم في النهاية وجاءها حلم عجيب إذ جاءت هند في الحلم توصيها أن تتمهل ولا تتسرع وهي أي عزه تقول: اتسرع في إيه يا هند! " متسرعيش يا عزه " يوه اتسرع في إيه بس قوليلي! " متسرعيش يا عزه " وهنا قامت عزه فزعة من نومها الذي لم يتجاوز ساعة واحدة وهي تقول: بِسْمِ اللَّهِ الرَّحْمَنِ الرَّحِيمِ ده ايه ده أنا كنت بحلم ولا دي حقيقه ولا ايه ده أنا كنت شايفكي وحاسه بيكي يا هند " وهنا تقلب زوجها بجوارها وهو يقول: يا وليه اتخمي شويه مش عارف أنام منك ثم عاد إلى النوم مجددا وهي تنظر إليه قائلة: بقى إنت مش عارف تنام يا راجل إنت اومال مين اللي صوت شخيره ولا مزيقة حسب الله اللي مسمع لأخر الشارع نام وسيني في حالي أعرف بس اللي أنا كنت فيه ده حلم ولا علم " وفي الصباح استيقظ الجميع على صوت عزه وهي تخبرهم أن الإفطار جاهز وبعد أن تناول الجميع الطعام جلست عزه تبذل لفائف سعد بعد أن قدمت له روضة وهي تتعجب من هدوء هذا الطفل الذي لا يبكي مثل باقي الأطفال الذين هم في مثل عمره بل يبتسم بصورة دائمة حتى وهو مغمض العينين ثم خرج طه من الحمام وهو يجفف وجهه ناظرا إلى عزه وقال: ها يا عزه فكرتي مين العروسه ولا لسه " والله مش عارفه أقولك ايه يا طه أيوه فكرت بس ااا " بس إيه يا ختي بس أقعد الأول أقولك على منام جاني وأنت تفسر هولي زي ما كنت بتعمل زمان " منام إيه يا ختي إنتي لسه فاكده ده أنا كنت بهزر معاكي " لأ هزار ايه بس ده كل منام كنت بنفسره كان بيبقى حقيقه أي والله زي مبقولك كده " طيب ماشي قولي يا

عزه يمكن تلفق معايا زي زمان " آل إيه يا خويا خير اللهم اجعله خير زي ما اكون شفت في المنام المرحومة " هند!! " أه يخويا هند وآل جايه في المنام وهي مزعوجه كده وبتقولي بتقولي متستعجلش يا عزه لأ وايه كررتها عليا ثلاث مرات زي ما تكون عابزه تبلغني حاجه " وده معناته ايه!! " ما هو ده اللي بسألك فيه يا طه يا ترى هي قصدها إيه " والله منا عارف مش يمكن قصدها بلاش حكاية الجوازه دي " لأ طبعاً يا خويا هي يعني مهياش عارفه اللي إنت فيه لأ بس اكيد تقصد حاجه أني مش عارفها " طيب يا عزه المهم إنتي فكرتي مين العروسه ولا لسه؟ " أيوه يا خويا فكرت شوف يا طه إحنا عايزين واحدة تكون مبتخلفش عشان تاخذ بالها من العيال وتحبهم زي عندها مش كده " مطبوط كلامك " ودي بقي حتجيبها له منين يا أم العريف حتعملها عموله يعني ولا حتعملها عموله " يا راجل اتمم خلينا نشوف حنعمل إيه وخليك إنت في الأكل بتاعك زي ما تكون بتاكل في اخر زادك شوفي يا ختي الراجل اللي قمنا وسبناه من ساعة وهو لسه دايس مكمل تقولشي قطر " إيه إنتي حتعدي عليا اللقمة طيب والله منا واكل " لأ لأ حوش هو إنت سبت حاجه تتاكل ده إنت فاضل تيجي تاكلني أنا كمان " يا عزه سيبي الراجل براحتة وخلينا في موضوعنا " أه على رأيك يا خويا أيوه إحنا كنا بنقول إيه أه كنت بقول إنت محتاج واحدة مبتخلفش ودي طبعاً لازم تكون اتجوزت قبل كده مش بنت بنوت يعني " طيب ماهو طبيعي اللي في حالتني حيا خد إيه غير أما أرملة أو مطلقة وعلى رأيك المهم إنها تكون خاليه من العيال " طيب يا طه كده اتفقنا " على إيه بس " أقولك يا خويا أني فكرت في واحدة حدانا في البلد هي اللي تنفعك " أه واحدة مين " أمل محمد بنت محمد عبد الستار أفندي كاتب الصحة أهي هي دي اللي تنفعك " ازاي يعني " أقولك

ازاي بقى البت دي كانت متجوزه وقعدت مع جوزها يبجي  
تلات سنين إلا شهر ولا قول شهرين كده ومحصلش نصيب  
وطلقها عشان مبتخلفش ودي بت برضك متعلمه وحتاخذ بالها  
من عيالك وحترضى بأبي حاجة وكمان مش حتطمع في حاجه  
ده غير إن عندها عفشها اللي لو يعني ناقصك حاجه ولا هي  
تقولك عايزه تغير اوضة النوم ولا حاجه يعني يمكن مترضاش  
تنام على فرشاة المرحومة زي سلو بلدنا يعني كده " طيب ماشي  
بس ممكن اعرف يعني البت أمل دي حلوه يعني مقبول شكلها  
عشان بس العيال يحبوها " أه من الناحية دي اطمن يا بو نسب  
أحتك منقيا لك الحته اللي هي مش أي كلام " شوفي يا ختي  
الراجل أبو عين زايغه لهو إنت عارفها " أه اومال هو فيه حد  
حدانا في البلد ميعرفهاش ده كل البلد عارفه حكايتها وصعبانه  
عليهم " ميصعبش عليك غالي وخليك إنت بس في حالك عشان  
الحكاية تتم على خير المهم قلت إيه بقى يا طه " حقولك إيه يا  
ختي اللي إنتي شايفاه اعمليه ماهو إنتي أختي اللي مليش غيرك  
ومش معقول يعني حتبليني ببلوه أكيد إنتي اللي عارفه وشايفه "  
أهو كده الكلام بيقى استبيننا يلا بقى يا بو سيد الموضوع ده  
عليك تفتح أبوها وأحنا ناخذ بعضنا كده بربطة المعلم ونروح  
البلد أهو مني أنا اجس نبض البت واقولك على رأيها وإن كان  
كده تفتح أبوها محمد افندي عبد الستار قلت إيه " قلت لا إله إلا  
الله اللي تشوفيه يا أم العريف حاضر هو أنا عندي أعز من أبو  
نسب " وهكذا اتفقوا جميعهم وتوزعت الأدوار حتى يتم الإتفاق  
على زواج طه من أمل التي وجد الجميع إنها الأنسب لحالة طه  
ثم أستعد الجميع للسفر إلى البلد لتنفيذ الإتفاق ومحاولة إيجاد  
فرصة حياة جديدة لطه وأولاده وبالفعل شد الجميع الرحال إلى  
البلد وهناك قامت عزه بما سمته جس نبض المرأة أي سؤلها  
والتي رحبت بتلك الفرصة عندما علمت بظروف طه خاصة





يعني وإنتي بس اللي عارفه " اسمعي مش حنخسر حاجه لو اتاكدنا ويا ريت تزوجي دلوقتي تعملي التحاليل اللي طلبتها منك وترجعيلي زي الشاطره كده ونشوف حنعمل ايه " ماشي يا ست الدكتوراه يعني هو أنا أكره ولا أكره آل بطلوا ده واسمعوا ده أنا حامل ده حتى يبقى عجب العجاب أهي طيب " ومضت أمل من عيادة الطبيبة إلى أحد معامل التحاليل الطبية مباشرة دون أن تنتظر لليوم التالي وهناك تم عمل التحاليل المطلوبة وانتظرت أمل ظهور النتيجة ثم أخذت تقرير بحالتها وذهبت مباشرة إلى عيادة الطبيبة مرة أخرى ومعها التقرير الذي يثبت حالتها واستقبلتها الطبيبة وهي تتناول التقرير بشغف كبير وبلهفة لم تكن أقل من لهفة أمل معرفة نتيجة التحاليل وعندما نظرت الطبيبة إلى التقرير تهلل وجهها فرحا وهي تقول: مش قلتك أنا عارفة " عارفه ايه يا دكتوراه " اللي قاتهلك إنك حامل الف مبروك إنتي كده في الأسبوع الخامس من الحمل بس خلي بالك من هنا ورايح لازم تنتبهي على صحتك أنا حكتلك شوية فيتامين وتتغذي كويس عشان البيبي اللي في بطنك محتاج تغذية عشان يطلع صحته كويسه " إنتي بتتكلمي بجد يا دكتوراه أنا حامل يعني إنتي اتاكدتي كويس من الكلام ده المكتوب قدامك " أيوه حامل احلفلك عشان تصدقي؟ " لأ مصدقاكي طبعاً بس هما كل الدكاتره اللي كانوا قبل منك مبيفهموش ولا ايه الحكاية دول كلهم كانوا بيقولولي إنني أنسى موضوع الخلفه والحمل ده من أساسه " لأ يا ست أمل الدكاترة بنفهم وكل حاجه بس قدرة ربنا فوق كل شيء وربنا أراد إنك تحملي وده عشان يعرفنا إنه خالق الكون وخالق كل شيء بقدرته وإرادته وأننا مهما عملنا واتعلمنا برضه قدرة الله فوق كل علم " ياما إنت كريم يا رب أنا حامل بعد السنين دي كلها ده أنا كنت قاطعه الأمل خالص في الخلفه " خلاص يا ست أمل ده إنتي حتى أسمك أمل يعني لازم يكون فيه

أمل في الله على طول " ونعم بالله يا دكتوراه الحمد لله يا ربي  
الشكر والحمد لك يا رب يا اه ده زمان طه أما يعرف حيفرح  
خالص مع إنه كان مش مبين إنه زعلان عشان مبخلفش "  
ومضت أمل عائدة إلى المنزل وهناك وجدت طه في انتظارها  
وما إن شاهدها قال: كنتي فين يا أمل وساييه العيال كده  
لوحدهم " أسكت يا طه ده أنا عندي بشاره إليك إنما إيه مش  
حتصدقها " بشارة ايه وزفت ايه متتكلمي على طول وتفهميني  
سبتي العيال ورحتي فين من غير اذني " طيب يا خويا أنا  
حقولك على طول كده مش الأول تسألني عن حالي وصحتي  
لهو إنت الصبح مش كنت نزلت الشغل وسبتني تعبانه وعيانه "  
الله يطولك يا روح يا وليه متطلعيش روعي أتكلمي دوغري "  
طيب ولو إنك متستاھلش أنا كنت بكشف عند الدكتوراه  
والروشته بتاعتها أهى وادي كمان الدوا " وتناول منها طه  
الروشته الطيبة وهو يقول: أه يعني طلع عندك إيه هو أنا فاهم  
حاجه من الروشته دي هو أنا يادوبك بعرف عربي بالعافيه أما  
عايزاني أعرف كمان انجليزي " مكتوب فيها ايه مش حتصدق  
مكتوب إنني حامل " حامل " أه يا خويا والله حامل ولو مكنتش  
مصدقني ادي كمان التحاليل اللي بتقول إنني حامل " ازاي حامل  
ازاي ده أنا واخذك وعارف إنك مش بتخلفي واديلنا أربع سنين  
تقريباً ومحصلش أي حمل وإنتي أساساً أتطلقتي عشان مش  
بتخلفي يبقى اديني عقلك حصل ازاي الكلام ده " قدرة ربنا يا  
طه زي ما قالت ست الدكتوراه الله يسترها هو فيه بعد قدرة الله  
قول يا طه ده ربنا قادر على كل شيء مش هو برضك اللي  
بيقول للشيء كن فيكون " ونعم بالله بس الواحد مكنتش عامل  
حسابه على كده " حسابك على ايه يا طه على إنني مخلفش ولا  
يبقى عندي عيل ولا عيله من بطني لأ أهو الله أراد حنتبطر بقى  
على عطيته ولا حنتبطر " إنتي مش فاهمه حاجه أنا مقصدش

بس أنا واخذك أساساً عشان تخلي بالك من العيلين اللي حيلتي من الدنيا مش عشان تخلفي حد تاني تنشغلي بيه عنهم " يوه يا راجل بقى إنت فاكِر إنني حنشغل بابني عنهم تبقى غلطان وبعدين أفرض إنني التلاته دول ولادي من بطني هو لو جالي عيل جديد انشغل به عن القديم " ماشي يا أمل هو أنا أكره بس خليكِ فاكِرِه كلامك ده عشان متجيش في يوم وتقولِي أنا مش قادره على خدمتهم " لأ يا خويا ربنا يقدرني على خدمتكم كلكم وبعدين يا راجل ده بدل متقولِي الف مبروك وتهنيني إنني حيبقي ليا عيل من بطني قاعد تبيكت فيا " طيب يا أمل الف مبروك لأ مليون مبروك عشان تعرفي إنني مبسوط إن ربنا حيدكي اللي كان في نفسك بس متنسيش تاني أنا بقولك أهو العيلين الغلابه دول أمانه في رقبتهك ولازم تصوني الامانه عشان ربنا يباركلك في ابنك ده " هو يعني أبني أنا لوحدي ماهو ابنك إنت كمان وبعدين اديلي كام سنه معاك كنت قصرت في حقك ولا كنت قصرت عشان تقولي الكلام ده دلوقتي " وهكذا إستقبل طه خبر حمل أمل بشئ من القلق على مستقبل يسري وسعد في ظل وجود أخ جديد لهما هل ستبر أمل بوعدِها في استمرار الاهتمام بالطفلين أم أن الطفل الجديد سيكون له شأن آخر، وتمضي الأيام حتى تضع أمل حملها بعد معاناة طويلة وخوف شديد وحرص زائد منها حتى لا تفقد حلمها الذي كان ضائعا وهي لا تكاد تصدق أنها سوف تصبح أما لطفل ينتسب إليها ومن أجل تحقيق ذلك الحلم أهملت الكثير مما كانت تواظب على فعله قبل حدوث الحمل من القيام بواجبها في تنظيف المنزل وعمل الطعام ناهيك عن قلة الاهتمام بالطفلين وهذا ماعزاه طه إلى أنها مثلها مثل أي سيدة في ظروف حملها تصبح أكثر تعباً واجهاداً وكان يمني النفس أن ذلك ظرف مؤقت يجب عليه احتمالته حتى ينتهي الحمل والولاده وبالفعل وضعت أمل طفلها الذي أسمته سعيد



لأنها كانت تشعر أن ذلك الطفل سوف يكون سبباً في تثبيت أقدامها في منزلها وشعورها أنه سوف يكون سعيداً لأنه يحيا بين أبويه ومرت الشهور سريعاً حتى مر عام كامل وأمل على حالها من إهمال الطفلين والاهتمام الكامل بسعيد حتى تم استدعاء طه من قبل ناظر المدرسة التي التحق بها يسري في صفة الأول الابتدائي وذلك حتى يناقشه في بعض الأمور التي تخص يسري ويلفت نظر طه إلى بعض الملاحظات التي ابدتها الاخصائي الاجتماعي في المدرسة وذهب طه بالفعل لملاقة الناظر بحضور الأستاذ حسني الاخصائي وكان هذا الحوار عندما دخل طه "السلام عليكم يا حضرة الناظر أنا طه عبدالرحمن والد التلميذ يسري طه " أه أهلاً وسهلاً بيبك يا أستاذ طه اتفضل استريح " حضرتك كنت بعثلي بخصوص يسري خير حضرتك هو عمل حاجه غلط " لأ يا سيدي الولد هادي جدا معملش حاجه والاستاذ حسني حيشرح لسيادتك سبب الاستدعاء اتفضل يا استاذ حسني قوله اللي كتبتة في تقريرك بخصوص يسري " أهلاً يا استاذ طه أحب أقول لحضرتك إن ابنك ما شاء الله عليه فعلاً هادي بس هادي زيادة عن اللزوم يعني مفيهوش شقاوة الأطفال اللي في سنه وده مؤشر مش كويس بالنسبة لنا لأن ده بيعرفنا إن الولد عنده مشاكل أسرية ويهمني اعرف من حضرتك كل ظروف يسري عشان نقدر نحلها مع بعض " طيب افهم بس الأول هو أبني عمل إيه عشان كل ده هو اتخانق مع حد من الولاد اللي في سنه ولا عمل إيه بالظبط " يا سيدي بقولك هادي تقولي اتخانق لأ طبعا طيب اقولها لك ازاي عشان تفهمني بص يا انا " طه إسمي طه " طيب ياعم طه ابنك مش بيلعب مع الولاد ودايماً تلاقيه منطوي على نفسه ومش بيصاحب حد والمدرسين بتوعه بيقلوا إنه بيشرح كتير مع إنه ولد ذكي لأنه أما بيركز معاهم بيلاقوه بيشرح بسرعة " طيب أنا

برضه مش فاهم فين المشكلة يعني لو بيضرب حد كنت قلت  
معلش إنما الواد في حاله إيه بقى المشكلة" شوف يا عمنا إحنا  
في الدراسات النفسية للأطفال عارفين إن الطفل لازم يكون فيه  
بعض الشقاوة يعني يتكلم يقاطع يتمرد أحياناً وممكن يعاكس  
زمايله أو حتى المدرسين وممكن يتخانق ويتصالح ويقسم أكله  
مع حد من صحابه وكل ده بيدينا مؤش عن حالة الطفل النفسية  
لكن يسري مفيش حاجه خالص من دي بيعملها لدرجة إنه كمان  
لو حد من الأطفال اللي معاه حب إنه يلعب معاه أو يتخانق حتى  
مفيش أي رد فعل من يسري ومن الآخر كده أنا شايف إن  
حضرتك بما إنك جيت لازم تعرفني ظروف يسري في البيت  
عشان نعرف نتعامل معاه ونحاول نلاقي حل يطلعه من حاله  
اللي هو فيها " والله منا عارف اقولك إيه يا استاذ يعني هو على  
العموم أبني الكبير وفيه معاه أخوه أصغر منه بسنتين واخوهم  
الصغير عنده سنه دلوقتي وأنا زي حضرتك ما إنت شايف أنا  
راجل صنايعي حداد مسلح يعني بتاع مباني وزوجتي في البيت  
ملهاش شغله غير الولاد " طيب ممكن أسألك سؤال محرج  
شويه " محرج ... طيب ماشي قول يا استاذ " هي زوجة  
حضرتك يعني هي أم يسري " أه كده فهمت هو الواد قالكوا إيه  
بالظبط " لأ متفهمش غلط الولد متكلمش غير أما أنا سألته  
وعايز أتأكد منك إذا كان كلامه صحيح ولا لأ هي زوجتك هي  
أم يسري ولا مرات أب " لأ يا سيدي أم يسري تعيش إنت من  
حسبة كده خمس سنين بس ده إيه دخله في الكلام اللي بتقوله  
حضرتك " اقولك يا معلم طه بقى الأم أما تكون بتفرق بين  
أولادها ده ببسبب لهم مشاكل نفسية ولو الطفل كمان عارف إن  
دي مش أمه ممكن المشاكل دي تبقى أكبر من المتوقع فيا ريت  
حضرتك تجيلي تاني وتجبب معاك الست بتاعتك عشان نفهمها  
شوية حاجات في التعامل مع الأطفال عشان نحل المشكلة من



أساسها " طيب ماتقولي حضرتك إنت عايز منها إيه وأنا ابْلِغها بدل ما تروح وتيجي والشحطه دي " لأ مش حينفع عشان برضه عايز اتناقش معاها عشان نشوف الحل السليم لمشكلة يسري ومعلش أنا بستأذَنك في سرعة حضورها لو تكرمت يكون كتر خيرك وهكذا علم طه بالمشاكل التي تواجه إبنه ولم يكن ليعلَمها إلا عن طريق الإخصائي الاجتماعي والنفسي الذي يتعامل بجديّة وضمير يقظ وعاد طه إلى المنزل وهو في حيرة من أمره ماذا يفعل لحل تلك المشكلة وكيف يخبر أمل عن كل هذا الحوار؟ عاد طه وبصحبتَه ولده يسري إلى المنزل وأثناء رحلة العودة كان طه يحاول أن يستشف من يسري أسباب العزلة التي وضع يسري فيها نفسه وعلم منه بعد معاناة طويلة أنه يشعر أنه غير محبوب من ماما أمل وأنها تفضل أخيه الأصغر سعيد عنه وعن أخيه الآخر سعد وأنها تقضي الساعات الطوال وهي تلاطف سعيد وتطعمه وترضعه ولا تلتفت إليه ولا إلى سعد بل إنهما كثيرا ما كانا يشعران بالجوع ويطلبان منها الطعام فكانت تزجرهما قائلة: انتوا مش شايفيني برضع سعيد يلا دلوقتي من قدامي ولما أفضى أبقى أحط لكم تاكلوا وأنها في كثير من الأحيان تتركهما يتضوران جوعا وعندما يعودان إليها حتى تطعمهما يجدانها تغط في نومها بجوار سعيد وإذا حاول أحدهما إيقاظها من النوم كانت ترد عليه بصفعة على وجهه أو بالضرب بعضا على مؤخرته وعندما تكرر ذلك الفعل منها كثيرا أصبغا لا يجرؤان على طلب أي شيء منها ويفضلان النوم على الطوى على أن يزجانها حتى لا يتعرضا لأي أذى ظل طه يستمع إلى يسري وهو في حالة من الاندهاش الممزوج بالغضب ثم بدأ يلوم نفسه أيضا كيف لم ينتبه إلى مثل هذه الأمور وكيف ترك ولدا هندا لمثل هذه الأفعال من زوجته أمل وفي طريق العودة اشترى طعام وحلوى ليسري وسعد حتى إذا

وصل إلى المنزل لم ينتظر طويلاً بل دخل مباشرة إلى غرفة الطفلين بصحبة يسري ووجد سعد جالساً على أرض الغرفة وهو يلعب بمفرده ببعض اللعب ونظر إليه طه نظرة حزن وأسى وبدت دمعة تلمع في عينيه تندب حال الطفلان ولكنه تمالك نفسه حتى لا يشعر الطفلان بما يختلج في نفسه ثم ظل طه معهما في غرفتهما يطعمهما ويمنحهما الحلوى في محاولة منه لتعويضهما عن ما شعر أنه تقصير منه في حقهما وبينما هم على ذلك الحال وجد أمل تفتح باب الغرفة ونظرت إليه قائلة: ايه ده يا ابو سعيد هو إنت هنا يا راجل " نظر طه إليها بنظرة مليئة بالسخرية وهو يقول: لأ أنا مش هنا صحيح والله ده طلعت أنا ولا أنا هنا " يوه يا ابو سعيد مالك يا راجل اومال مين اللي شايفاه قدامي ده خيا لك " أيوه خيا لي وبعدين أنا إسمي أبو يسري مش أبو سعيد ولا إنتي مش شايفه غير سعيد " يا خويا سعيد ولا يسري أهو كلناهم واحد " لأ يا أمل مش كلهم واحد وأنا اتأكدت دلوقتي إن مش كلهم واحد لأ ده سعيد كوم والباقي كوم تاني بما فيهم أنا كمان " يوه يا طه مالك يا راجل بتكلمني كده زي ما اكون يعني أذنبت في حقك إنت وعيالك ده أنا حتى قايدالكم صوابعي العشره شمع وبتمنى ليكوا الرضا ترضوا هو فيه ايه لكل الكلام ده " فيه حاجات مينفعش نقولها قدام الولاد تعالي اوضتنا نتكلم فيها وأنا أعرفك فيه ايه " لهو إنت جاي من بره تقول يا شر اشتر متقول يا راجل على طول فيه ايه ولا يكونش المزغود ده قالك عني حاجه زعلتك مني " طيب أمشي قدامي نتكلم جوه ومش قدام الولاد عشان إنتي برضه مش مقدره إننا مينفعش نتكلم قدامهم " وخرج طه من غرفة الطفلين وهو يدفع أمامه أمل حتى دخلا غرفتهم وهي تقول: متحاسب يا راجل حتكفيني على وشي براحه علياوالواد حيقع مني يوه يا راجل براحه بقى " وما إن دخلا إلى الغرفة إلا وبدأ طه يسرد

تفاصيل كل ما حدث في المدرسة وكلام الاستاذ حسني بشأن يسري وهي تستمع إليه حتى إذا انتهى قالت: نفسية إيه وبتاع إيه ده اللي بيقله الرجل المخبول ده هو اللي زي يسري ده عنده نفسه " رد طه وهو يكظم غيظه بعد أن راودته نفسه أن يفرغ شحنة انفعاله بضربها علقه ساخنة وهو الذي لم يعتاد ذلك من قبل ولكنه تمالك نفسه قائلاً: أه تصدقي إن كل الناس عندهم نفسه " حتى المفعوص ده " أه حتى المفعوص ده وكل المفاعيص وبعدين إيه قولك إني أنا عرفت منه حاجات غير كمان اللي حكاها في المدرسة " واخبرها طه بما دار من حوار بينه وبين يسري والذي علم من خلاله إهمالها في رعاية الولدان وكيف أنها تعطي كل الاهتمام لسعيد ولا تلتفت إليهما وهي تستمع إليه بنفاذ صبر حتى إذا انتهى من حديثه إلا وعلا صوتها وهي تقول: يعني اني بعد كل ده طلعت أنا اللي مقصره بقى بعد الخدمة اللي بخدمهالكو دي كلها وأنا اللي مقصره صحيح ماهو اخره خدمة الغز علقه " بقولك إيه بلا غز بلا رز العيال دي أنا قنالك قبل كده انهم أمانه في رقبتك وإذا كنتي مش قد الأمانة سيببها وامشي " بتطردي يا طه بقى بعد السنين دي وخدمتي ليكوا بتطردي " سمبها زي متسمبها لكن أنا مش حسنتي أما عيل منهم يطلع معقد وإنتي عارفه أنا عيالي عندي بالدنيا أه إنتي كوم وهما كوم وإذا كنتي مش فاهمه كده ادبني بقولهاك أنا معنديش أغلى من ولادي دول قلتي إيه حتعيشي بما يرضي الله ولا تزوجي على ابوكي " كده برضه يا طه أهون عليك وتهون العشره اللي بينا كده أني مكنتش عارفه إني رخيصه أوي في نظرك كده لكن لأ أنا بيت ابويا أولى بيا " خلاص في ستين سلامة يلا وأنا اوصلك لحد لمي الهدمتين بتوعك ووريني عرض قفاكي " ماشي يا طه أنا ماشيه أهو هو أنا بعد الكلام ده أقعد معاك ثاني ليه هو أنا معنديش كرامه وادي هدومي أهني "

وعند هذا الحد وصل الحوار إلى طريق مسدود وقامت أمل بإعداد حقيبة ملابسها حتى تعود إلى بيت أبيها؛ انتهت أمل من إعداد حقيبة الملابس وقامت بحمل طفلها الرضيع ونظرت إلى طه وكأنها تطلب منه حمل حقيبتها لأنها لن تقوى على ذلك وفهم طه من نظرتها ما تريده فقام بحمل الحقيبة وطلب منها الانتظار قليلا حتى يرسل يسري وسعد إلى جارتهم أم أحمد ولكنها لم ترد عليه ولم تنتظر فقام طه باصطحاب طفليه وهو يتقدمها إلى أسفل الدرج حاملاً حقيبتها ثم قام بالطرق على باب جارته التي فتحت الباب وشاهدت طه والطفلان وخلفهما أمل تحمل رضيعها وحقيبة سفر بصحبة طه ولم يستغرق المشهد طويلاً حتى تستوعب أم أحمد ماذا يحدث خاصة إنها قد سمعت النقاش الحاد الذي تطور إلى مشاحنة لأن طه وزوجته كانا يتشاجران بصوت عالي وبكل ذكاء المرأة الفطري ابتسمت أم أحمد في وجه طه وهي تقول: اتفضلوا يا جماعة اتفضلوا ده احنا زارنا النبي (صل الله عليه وسلم) " معلى يا ست أم أحمد أنا عارف إنني دايماً بتاقل عليكى بس أصل الظرف طارئ وإنتي عارفه إنني مليش حد في مصر غيرك " كلام إيه ده بس يا بو يسري هو فيه بين الإخوات كلام من ده! ده إنت تؤمر في أي حاجة " طيب معلى ممكن بس اسبيلك يسري وسعد لحد ما أوصل أم سعيد لحد البلد وأرجع " يا خبر يا بو يسري ده لو مشالتهمش الأرض تشيلهم عنيا! بس قولي الأول يا خويا هو فيه حاجة لا سمح الله " لأ مفيش بس حنوصل البلد عشان أمل عايزه تزور أبوها " آه طب وماله يا خويا واجب برضه بس أنا كنت عايزه منكوا حاجة تجيبوهالي من البلد ده لو مكنتش بتاقل أنا بقى عليكموا " آه وماله ده إنتي تؤمري يا ست أم أحمد " طيب اتفضلوا بقى جوه عندي خمس دقائق على ما أحضر ورقة بالطلبات اللي عايزاها " لأ معلى شوفي إنتي بس اللي عايزاه



واحنا مستنينيك هنا " وده يصح برضه يا خويا طيب والنبى اللي نفسى أزوره لانتوا داخلين اتفضلي يا ست أم سعيد اتفضلي يا ختي دي خطوه عزيزه اتفضلوا اتفضلوا " ودخل طه على مضض تحت إلحاح جارتة وخلفه دخلت أمل التي ظلت صامته ولم تعلق بالرفض أو الإيجاب وهي في حالة من العيوس كانت ملامحها تشي تكاد تنطق بما يختلج في نفسها ولم يستمر هذا الوضع طويلاً إذ بدأت الجارة بعد أن اطمانت أنهم داخل شقتها أن تصيح على ابنها أن ياخذ سعد ويسري إلى داخل غرفته حتى يلعبوا سوياً وهي تهمس له في أذنه أن لا يغادروا الغرفة إلا إذا صاحت هي عليهم وأوما لها أنها سمعا وطاعة وما إن اطمانت أم أحمد أن الأولاد قد أغلقوا عليهم الغرفة إلا وقالت: منورين والله يا جماعه ده احنا زارنا النبى " عليه الصلاة والسلام " طيب كمان زيدوا النبى صلاة " اللهم صل وسلم وبارك عليك يا نبى " ايوووه كده بصوا بقى يا جماعه والكلام ده ليكوا انتوا الاتنين بقى إحنا جيران وزى الإخوات صح ولا أنا غلطانه " ربنا اللي يعلم يا ست أم أحمد إنتي بالنسبة لي اكتر من أخت من أيام المرحومة هند " طيب يا خويا هو ده مربوط الفرس وأنا بقول بما إننا اخوات انكوا تسمحولي يعني إني اتفك معاكوا بكلمتين ده لو معندكوش مانع ولا ايه يا ست أمل أنا مش سامعالك صوت يعني " يا خبر يا ست أم أحمد ده إنتي والله الأسطى طه ببشكر فيكي على طول في غيابك وبيعتبرك أخته اللي كل زنقه ميفكرش في حد تاني غيرك " طيب يعني محدش فيكوا يعني حيقول علياحشريه إذا كلمتكو بصراحه " خير يا ست أم أحمد " إن شاء الله خير بقى شوفوا بقى يا جماعه كل البيوت بتبقى مقفوله على صاحبها محدش يعلم عنهم حاجه واكم من بيوت فيها مشاكل لكن الناس العاقله بتحل مشاكلها مش بتعقدها مطبوط كلامي ده ولا ايه " عداكي العيب يا ست أم

أحمد صحيح " طيب يا خويا مكل الناس بتتخانق وعلى رأي المثل مصارين البطن بتتخانق يعني مش كل مشكلة صغيرة إحنا نكبرها الواجب نتحمل بعض ونمشي أمورنا عشان المركب تمشي ولا ايه يا ختي يا أمل " عداكي العيب يا ختي ده إنتي كلامك كله حكم ومواعظ " يعني كلامي عاجبك لادد عليكي يعني زي ما بتقولوا " آه والنبي يا ختي هو فيه حد ميعجبوش كلام ست عاقلة زيك " طيب يا ختي معلش بقى في اللي حقولهلوك ده أنا سمعت اللي حصل غصب عني والله لأن صوتكم عالي وعرفت الحكاية كلها يعني مش محتاجه أسمع منكوا " اطرقت أمل برأسها وهي تقول: يعني عاجبك اللي عمله فيا أبو يسري " شوفي يا ختي إحنا مش حنعيد ونزيد بس هما كلمتين تخليهم حلقه في ودنك الست العاقلة ملهاش غير بيتها وجوزها وولادها واخذه بالك ولادها لأن العيلين المساكين دول ميعرفوش أم تانيه غيرك وبصراحه متزعلش مني إنتي كنتي مهملاهم الأيام اللي فاتت ومن الآخر كده عشان منقلبش في اللي فات إنتي لازم ترجعي تاخدي بالك منهم زي الأول واكثر ولو فيه أي حاجه محتاجاها مني أساعدك فيها تعالي قوليلي وأنا عيني ليكي وليهم قولتي إيه " قلت لا إله إلا الله ثم نظرت إلى طه وكأنها تطلب منه أن يتكلم إذا كان موافقاً على هذا الكلام أم لا ولما شاهدت علامات الارتياح على وجهه قالت: اللي تشوفوه أني موافقة عليه " الحمد لله أيوه كده يا جماعه اخزوا الشيطان ومتخليهوش يفرح فينا وإنت يا اسطى طه خذ جماعتك واطلعوا بس سيبولي العيال عشان واحشيني والصبح إن شاء الله تبعتي تاخديهم وتجيني تقعدني معايا شويه قلت إيه " وهكذا مرت الأزمة التي كادت أن تعصف ببيت طه وأمل بسلام وعاد الزوجان إلى شقتهم، ومضت الأيام وحدث تحسن نسبي في معاملة أمل لأطفال هند وعليه فقد حدث تقدم نوعي ليسري في



الاختلاط مع أقرانه في المدرسة وأصبح يميل إلى الاندماج معهم في اللعب والمشاركة في الطعام والحلوى كما يفعل الأطفال في مثل هذا العمر وكذا فقد حدث تقدم ملحوظ في المستوى التحصيلي أما بالنسبة لسعد الذي كان يضرب به المثل في الهدوء والإبتسام فقد صار أكثر عدوانية على عكس كل التوقعات فأصبح يميل إلى مشاكسة أقرانه في الحضانة ويعتدي عليهم بالضرب ولا يستطيع حتى الأطفال الأكبر منه أن يقتربوا من سعد دون رهبة وخوف منه وذلك لأنه كان يتمتع بقوة بدنية عالية فطرية " وكانت مشرفة الحضانة والمعلمة المختصة يتقدمان بالشكوى تلو الأخرى إلى مديرة الحضانة من سعد وكانت المديرة تهدئ من روعهما لأنها كانت تعلم ظروف نشأة سعد بل وتحنوا عليه حنوا كبيراً ولكن بعد فترة من الزمن اضطرت إلى إرسال خطاب بصحبة سعد إلى أبيه حتى تضع حداً لتصرفات سعد التي استفحلت إلى درجة أن معلمته كانت تصفه بأنه ( رئيس عصابة ) لكونه يبسط سيطرته على كل الأطفال وعندما وصل الخطاب إلى طه توجس خيفة أن تكون أمل قد عادت سيرتها السابقة ولكن عندما علم بحقيقة الأمر شعر بارتياح كبير أن ولده أصبح مرهوب الجانب يخشاه الجميع وكان هذا الأمر بمثابة نوع من الاطمئنان حتى لا يعتدي عليه أي شخص مستقبلاً ومضت المقابلة على وعد من طه أن يحاول تقويم سلوك سعد مستقبلاً ومضى باقي العام وسعد على وضعه لم يتغير وأصبحت معلمته متأقلمة مع وضع سعد بل إنها كانت تستغل سطوته وسيطرته بأنها كانت تترك الفصل تحت إشرافه حتى تعود وهي مطمئنة إلى عدم حدوث شغب في غيابها وانتهى العام الدراسي وانتقل سعد إلى مدرسة يسري ليلتحق بالصف الأول الابتدائي ويسري يسبقه بعامين وفي الشهر الدراسي الأول لسعد وجد أن البعض من زملاء يسري

يتحرشون به بدنيا ويحاولون الاعتداء عليه بالضرب ويسري لا يحرك ساكناً ولا يدفع عن نفسه العدوان فما كان من سعد إلا أن يرد هو عن أخيه وبالفعل تمكن من ضرب ثلاثة من الصبية الأكبر منه وإحداث إصابات بهم وعلم الناظر بتلك المشاجرة فتم استدعاء التلاميذ الذين دارت بينهم تلك المشاجرة وبين سعد ويسري وعند مناظرتهم بمعرفة الناظر شاهد آثار المعركة على وجوه واجساد التلاميذ الثلاثة أيضاً لاحظ أن يسري سليم الجسد والهندام مما يوحي بأنه لم يكن شريكاً في تلك المعركة ولاحظ أيضاً خلو سعد من أي إصابة مع ملبسه الغير مهندمة فأدرك أن سعد وحده هو الذي قام بضرب التلاميذ الثلاثة وذلك بعد أن استمع لأقوالهم وتأكد من أنهم هم الذين بدأوا العدوان وقام الناظر بصرفهم من مكتبه مع خطابات باستدعاء أولياء الأمور لهؤلاء التلاميذ ثم انفرد بيسري وسعد وقام بتوبيخ سعد وقال له بالحرف: أعمل حسابك لو عملت كده تاني أنا حابعت أجيّب أبوك وبعدين يا ولد إنت أخوك هادي وكل المدرسين بيشكروا فيه وابوك راجل محترم وشقيا ن عليكوا إنت بقى طالع (بلطجي) لمين!! ظلت هذه الجملة تطن في رأس سعد ولا يعرف معنى كلمة (بلطجي) وبعد هذا الحادث ظلت المدرسة بأكملها تتحدث عن قوة وشجاعة سعد وكيف تمكن بمفرده من ضرب ثلاثة من الصبية الأكبر منه وأصبح الجميع يهابه ويرجون صداقته وكان سعد مستوعبا لكل ما يحدث وعلم أن القوة وحدها هي التي تجعل الشخص مرهوب الجانب ثم مر عامان آخران حتى حدث ما لم يكن في الحساب أن أصبح سعد في الصف الثالث الابتدائي ويسري في الصف الخامس وكعادة يسري لم يكن يميل إلى الشجار بطبيعته الهادئة وتسامحه الزائد الذي يصل به إلى الطيبة المفرطة ومنذ الذي حدث من شجار معه وتدخل سعد صار الجميع يعملون حسابا لسعد ولا احد



يحاول أن يتحرش ببصري ولكن في هذا العام الدراسي كان قد انتقل إلى المدرسة شقيقين من إحدى المحافظات كانا قد انتقلا مع والدهما الذي انتقل بحكم عمله القضائي إلى القاهرة وهما كانا يستندان إلى أبيهما فيتعاملان بكل صلف وغرور مع أقرانهم من التلاميذ ولم يكونا على علم بما حدث قبل عامين ولا يعرفان قوة سعد البدنية وعليه فقد احتك الشقيق الأكبر ويدعى علي ببصري أثناء نزولهم على الدرج ودفع علي ببصري الذي انكفأ على وجهه وسال من حاجبه الأيمن الدماء وبسرعة طار خبر هذا الاعتداء إلى سعد عن طريق زملائه ولم يكذب سعد خبرا وأسرع هو الآخر لتأديب من فعل ذلك بأخيه وعندما وصل حتى ياخذ حق أخيه من المعتدي وجد شقيق علي الأصغر واقفاً بجواره فما كان منه إلا أن بادر بضرب علي ضرباً شديداً وعندما تدخل شقيقه ويدعى عادل لحماية أخيه الأكبر قام سعد بتلقيه درساً هو الآخر ثم حضر أحد المدرسين واقتاد الجميع إلى مكتب الناظر ليتخذ القرار المناسب تجاه ما يحدث نظر الناظر إلى أطراف الشجار وعلم أنه واقع في معضلة لا يجد لها حل يرضيه هو شخصياً فقد كان يعطف على ببصري الذي أصبح من المتفوقين دراسياً ويعطف أيضاً على سعد الذي يعلم ظروف نشأته يتيم الأم ولكن الطرف الآخر في النزاع كانا أبناء واحد من القضاة وهو لا يستطيع أن يواجه مثل هذا النوع من البشر ولا يدرك إن كان هذا الرجل سوف يعلي الحق أم ينحاز إلى ولداه وعليه فقد ظل صامتاً لفترة طويلة لا يعرف ماذا يفعل وبعد برهة هداه تفكيره إلى هذا الحل أخرج علي وعادل إلى حجرة الإحصائي الاجتماعي واستبقى معه ببصري وسعد ثم بدأ معهما الحديث قائلاً: تاني يا سعد مش حتجيبها البر إلا لما تجيبنا مصيبة هنا في المدرسة " والله يا حضرة الناظر أنا معملتش حاجه أنا كنت نازل على السلم واللي

إسمه علي ده هو اللي زقني " أنا عارف يا يسري إنك ولد هادي وكل المدرسين بيشكروا فيك على عكس الفتوه ده ثم وجه حديثه إلى سعد قائلاً: أنا عايز أفهم إنت يا بني حد مسلطك عليا أعمل فيك إيه " حتعمل إيه يا حضرة الناظر بص شوف أخويا وشه متعور أهو يعني كنت عايزني أسكت ونا شايفه سايح في دمه ولا أخذ حقه " الله يخرب بيتك يا بني انت حتجلطني قولي بقى أعمل فيك إيه وأنت مش عارف أبوهم ممكن يعمل فيكوا إيه " إيه ده يا حضرة الناظر أنت خايف منهم " خايف منهم وحضرة الناظر!! هو إنت خليت فيها حضرة الناظر! بص يا بني معلش أنا مضطر استدعي أبوك عشان نشوف اخرتها إيه معاك وإنت عاملتي فيها فتوه وبلطجي وربنا يستر ونعرف نلم الحكاية دي بدل ما تكبر ومنعرفش نعمل إيه " وصرف الناظر يسري وسعد من مكتبه بعد أن سلمهما خطاب استدعاء ولي أمرهما ثم توجه إلى مكتب الاخصائي الاجتماعي لمحاولة استرضاء الولدان علي وعادل حتى لا يتدخل أبيهما في الموضوع ولكن رفض علي وهدد بأنه سيخبر أباه بما حدث وسلم الناظر أمره إلى الله في انتظار قضاؤه وفي اليوم التالي جاءت أم علي وعادل إلى المدرسة لمقابلة الناظر حتى ترى من قام بالاعتداء على ولديها وبادرته قائلة: أنا عايزة اشوف مين اللي عمل كده في ولادي!! بقى ولاد الأكابر يتعمل فيهم كده أنا حزلي أبوهم يودي اللي عمل كده في ولادي إصلاحية الاحداث " يا فندم الموضوع مش مستاهل ده كله وبعدين ابن حضرتك علي هو الغلطان هو اللي زق الولد الثاني وفتحله حاجبه وأخوه الصغير أما شاف كده جه يعني ومسك في ابن حضرتك وواحد من الأساتذة شاف الحكاية يعني وخلصهم من بعض " برضه أنا ابني ميتعملش فيه كده من واحد من الرعاع هو يطلع إيه ده اللي يتجرأ ويمسك في ابني أنا " يا هانم بقول لحضرتك الموضوع

مش مستاهل وأنا كده كده عملت اللازم والولد اللي عمل كده فصلته من المدرسة " فصلته بس ده كان المفروض يتجلد عشان يتعلم ميمدش أيده على أسياده " نظر الناظر إليها وهو يكظم غيظه من طريقته في الحديث وابقن أنها هي السبب في ذلك الصلف الذي يمتاز به ولداها وفي هذه اللحظة دخل الساعي ليخبر الناظر أن والد يسري وسعد في الخارج ينتظر مقابلته فهمس الناظر في أذن الساعي أن يجعله ينتظر في غرفة الأستاذ حسني إلى أن يستدعيه وتم ذلك بالفعل إلى أن انتهى من لقاء والده علي وعادل التي قامت للمغادرة وهي تقول: ده لولا إن سعادة المستشار عنده شغل انتداب كان جه هو بنفسه يعني تحمدوا ربنا لكن الحكاية دي أنا حتأكد منها بنفسي وأشوف إذا كان الولد ده اتفصل فعلا ولا كلام " لا يا فندم بقول لحضرتك فصلناه خلاص مع الف سلامه حضرتك نورتي المدرسة " وهكذا مضت السيدة وحن دور طه في لقاء الناظر الذي قص على طه كل ما حدث منذ المشاجرة وحتى لقاء ام الولدين وهو يقول: خليك مطرحي أنا بقى تتصرف إزاي أنا كده مضطر أقولك سعد ميجيش تاني المدرسة عشان أهل العيال دي لو شموا خبر إنه موجود أكيد حيعملوا عمایل وحشه واحنا مش قد الناس دي فاهمني يا اسطى طه " أه طبعا يا حضرة الناظر يعني على رأي المثل ضربني وبكى وسبقني واشتكى " لأ وإنت الصادق اللي له ضهر مينضربش على بطنه " طيب والعمل يا حضرة الناظر هو كده يعني أبني يضيع مستقبله " ولا يضيع ولا حاجه إنت بس خليه يكمل السنه في البيت وتشوفله مدرس كويس وأنا ممكن ارشحك حد من عندي يتولى المهمة دي وبعدين يحلها الحلال قلت إيه " طيب والغياب مش كده يتفصل ويتحول منازل " لأ برضه متخافش من النقطة دي أنا حسجله حضور على طول عشان ميتفصلش المهم ان الناس دي يعرفوا إن إبنك مش

في المدرسة لحد الحكاية ما تتنسي و خلاص قلت إيه " حقول إيه يعني لا إله إلا الله محمد رسول الله خلاص يا حضرة الناظر القول قولك " وهكذا كان هذا هو الحل المؤقت لتفادي الأزمة التي حلت.

أُكتمل العام الدراسي ومضت الأيام المتبقية منه بتنفيذ اقتراح الناظر للخروج من الأزمة وجاءت الإجازة الصيفية وكعادة الأولاد في اعمارهم كان يسري وسعد يلعبون كرة القدم في الشارع والجميع يعلم ما يحدث من مشاحنات بين الصبية تصل إلى حد الشجار عند لعبهم الكرة وهو ما حدث بالفعل بين سعد وأحد المنافسين في الفريق الآخر وبلغ الأمر الاشتباك بالأيدي ولكن كعادة سعد كانت له الغلبة وتم إحداث إصابات بالصبي الآخر وكان على إثر ذلك حدوث مشاجرة بين الفريقين كانت الغلبة فيها لفريق سعد الذي صال وجال في ذلك المضمار الذي يعشقه ألا وهو استعراض القوة البدنية التي يمتلكها ووصل الأمر إلى مسامع طه الذي علم بالأمر من يسري فما كان منه إلا أن يجلس مع ولديه جلسة مغلقة حتى يبصرهما بعواقب هذا الفعل وكان يوجه حديثه طوال الوقت لسعد فقال: يا بني انت ناوي تعمل فيا إيه اكثر من كده يعني المدرسة واديك قعدت منها عشان اللي ضربته وربنا نجاك من المصيبة اللي عملتها ومش عارف السنه الجايه حيقبلوك ولا لأ ودلوقتي كمان رايح تضرب العيال اللي بتلعب معاها!! كده يا بني مش حيبقالك صحاب خالص ده غير المصاييب السوده اللي كل شوية تجيبهالنا يعني إنت لو ضربت حد ضربة وجت في مقتل حنعمل إيه ساعتها ده كده مش بعيد إنك تتسجن " اتسجن ايه بس يا اسطى إنت عمرك سمعت عن عيل اتسجن " اسطى!! كمان فيه ايه يله إنت ناوي تعمل فيا إيه اكثر من كده!! طيب بلاش تتسجن ممكن يدخلوك إصلاحية الاحداث ولا دي كمان

مسمعتش عنها: ياعم متكبرش الموضوع دول شوية عيال هفأ ولا ليهم أي لازمه متشغلش إنت بالك بيهم متقول لابوك حاجه يا يسري " ملكش دعوه بيسري وخليك معايا أنا مبيقاش إنت وهو كفايه علينا مصيبه واحدة! يعني إنت يا واد إنت مش ناوي تتلم بقى وتخليك طيب زي أخوك " طيب مين يا عم طيب تعالى شوف العيال بيقولوا عليه إيه " عيال مين يا صايع اللي بيقولوا أه طبعاً العيال الصايع اللي شبهك ما هو حيقولوا إيه غير كلام شبهكم " بص بقى يا عم الاسطوات بقى طريقة يسري اللي ماشي بيها دي حتخلي العيال يركبوه واقولك حاجه بقى من الاخر العيال دي مبتحترمش إلا اللي يديها على دماغها " أيوه يا فالج قول كمان ما هو منك نستفيد " بنتقوز عليا طيب والله ده لولايأ أنا كان إبنك ده بقى مسخرة العيال " اللهم طولك يا روح يعني إنت مفيش فايده في مخ أبوك الزنخ ده " يا عم خليك في يسري وسيبني أنا كده حلو اوي ومحدث يقدر يقرب مني عشان عارف إنني حاكله لو بس شاور عليا" ماشي يا سعد يا بني يعني إنت مفيش رجا منك!! طيب تصدق بالله أنا عارف إنك مش حترجع إلا أما تجيبنا مصيبه وخليك فاكر إنني نبهتك ويشهد علينا أخوك الكبير " وهكذا أثبت سعد أنه ماض في غيه لا يستمع إلى أحد وأنه يعتمد على القوة وحدها في تعامله مع الآخرين خاصة أنه وجد لها مهابة من الناس ومرة الإجازة الصيفية وذهب طه إلى ناظر المدرسة حتى يعلم ماذا سوف يفعل بشأن سعد وطمأنه هذا الأخير أنه سيقبل بدخول سعد المدرسة مرة أخرى على أن يلتزم بعدم التعرض والتشاجر مع أحد حتى يمر العام بسلام وبالفعل مضى العام الدراسي بدون أي مشاكل ثم جاء العام الذي يليه وأصبح سعد في الصف الخامس الابتدائي وانتقل يسري إلى مدرسة أخرى ليلتحق بالصف الأول الإعدادي وأصبح كلاهما وحده في مدرسته ومع

بداية العام الدراسي بدأت المشاحنات تعود من جديد بين سعد وبعض التلاميذ ولكنه سرعان ما فرض سيطرته عليهم ودان له الجميع بالخضوع خاصة أنه أصبح يبدو أكبر من عمره وما كان أحد يصدق أن سعد يبلغ من العمر عشرة سنوات وبضع أشهر قليلة وبمضي نصف العام سارت الأمور على خير ما يرام بالنسبة لسعد ولكن يسري كان يعاني من التلاميذ الأكبر منه عمرا ولم يخبر أحد بمعاناته حتى بلغ الأمر إلى مسامع سعد الذي سرعان ما جمع بعض زملائه وذهب إلى مدرسة يسري لتسوية الأمر على طريقته وعندما شاهد أخاه طلب منه أن يدلّه على الأولاد الذين يحتكون به ورفض يسري في بداية الأمر أن يدلّه ولكن تحت إلحاح سعد ووعدّه أنه لن يفعل أكثر من التلويح بالقوة دون استخدامها وعلى حد قوله: " متخافش إحنا جنهوشهم بس " وصدق يسري أخاه وأشار له على هؤلاء الصبية وسرعان ما دارت معركة طاحنة من طرف واحد ودانت الغلبة لسعد ورفاقه وكانت حصيلتها دماء كثيرة تناثرت ثم انتهت المعركة بأن عرف الجميع أن يسري وراءه أخاه الذي أصبح يلقب بسعد الزعيم بعد أن كان يلقب في بداية حياته باليتيم تطورت الأمور في نهاية العام الدراسي الخامس ولكن هذه المرة في مدرسة سعد إذ إنه قد قام بعمل مشاجرة كبيرة حتى يختتم العام بشئ فارق أو كما قال: عشان نعلم على الكل ويعملوا حسابنا من دلوقت " قام سعد بافتعال مشاجرة كبيرة ضمت جميع الصبية الذين يتزعمهم ضد بعض الصبية الأكبر منهم بعام واحد وانتهت هذه المشاجرة كالعادة لصالح سعد ورفاقه وكالعادة أيضاً سألت الكثير من الدماء ووصل الأمر إلى الناظر الذي شاهد آثار المشاجرة على وجوه التلاميذ الذين تم الاعتداء عليهم من قبل سعد وعصابته وكعادة الناظر في مثل هذه المواقف التي تكررت كثيرا تم استدعاء أولياء أمور



التلاميذ جميعاً ثم انفراد بسعد وحده بعد أن صرف الجميع ووجه إليه الحديث قائلاً: وبعدين معاك يا واد إنت هو إنت مش ناوي تحببها البر غير لما تجيبنا مصيبه في المدرسة " نظر سعد إلى الناظر نظرة باردة تنم عن قلب ميت دون أن يجيب فقال الناظر: متكلم يا واد يا بن طه والله منا عارف إنت طالع لمين كده أبوك راجل سكره واخوك سامح كان يتحط على الجرح يطيب " سامح مين يا استاذ إسمه يسري " الله مانت بتكلم أهو يعني كان لازم اغلط في إسم أخوك عشان أسمع صوتك " لأ يا أستاذ بس أنا معمولتش حاجه لكل الكلام ده أنا في حالي والمصائب هي اللي بتتلقح عليا" أه تصدق مسكين يا واد فعلا ده إنت في حالك بشكل!! طيب اعمل فيك إيه ده أنا تعبت لأبوك كل شوية مشكله شكل الله يكون في عونك يا طه على الواد ده أسمع يله تجبيلي أبوك الصبح وإلا والله العظيم مانت داخلها ثاني إنت فاهم " حاضر يا استاذ بس كده من عيني " شوف يا خويا الواد بيكلم ازاي طيب يا سعد إن ما وريتك بلا غور بقى من قدامي ومتجيش إلا مع أبوك " ومضى سعد وأبلغ أباه وفي اليوم التالي ذهب طه إلى المدرسة وقابل الناظر الذي بادره قائلاً: معلش يا سيدي ماهو إبنك مش بيحبك إلا في البلاوي اللي بيعملها " عمل إيه ثاني البلوه السوده ده بجد أنا تعبت من الواد ده " أبدا يا اسطى ضرب عيال من سنه ساته (٦) بس!! ضرب عيال أكبر منه هو وشوية العيال اللي عامل بيهم عصابة " ثاني يا سعد يا بني انت ناوي تموتني ناقص عمر " ربنا يدريك الصحه وطولة العمر شوف بقى حتصرف معاه ازاي عشان أنا تعبت مع إبنك ده والمفروض إنني افصله عشان الشغب اللي كل شوية بيعمله لكن أنا والله عشان خاطر كمش عايز اعمل معاه كده " والله تشكر بجد يا حضرة الناظر جميلك ده فوق راسي والله ومش عارف لولا وجود استاذ طيب ومحترم زي حضرتك

الواحد كان يعمل ايه " طيب ماهو الاستاذ الطيب ده ابنك حيوديه في داهيه أسمع يا واد إنت السنه الجايه دي اخر سنه ليك معايا وأنا بقولك أهو قدام أبوك عشان يبقى شاهد على اللي عمله فيك أي شكوى منك بفصلك فصل نهائي خصوصا إن الدوسيه بتاعك مليون اشي ضرب واشي خناق وتعوير يعني المنطقه مش حتاخذ فيك غلوه وحيوافقوا على فصلك إنت فاهم!! " أيوه يا استاذ فاهم ماشي فيه حاجه تاني " شوف يا خويا الواد بيكلم ازاي ده ولا على باله أسمع يا اسطى طه الواد ده لازم تشوفك صرفه فيه أنا بقولك أهو وبكره تقول الناظر كان عنده حق " حاضر يا استاذ حقك عليا قدامي يا للي ما تتسمى " ايه هو إنت حتاخذ معاك ولا ايه " أه يا حضرة الناظر ماهو خلاص السنه مش فاضل عليها إلا أسبوع وأنا شايف إنه يقعد في البيت يذاكر احسن من البلاوي اللي بيعملها دي " أه والله أحسن برضه وربنا يقدرنا بقى والسنه الجايه دي تعدي على خير من غير مصاييه " وهكذا غادر سعد المدرسة بصحبة أبيه ومرت الشهور بسلام ثم جاء العام الدراسي الجديد وفي السنه الأخيرة له في المدرسة كان سعد يخشاه الجميع فلم يكن أي أحد يتعرض له وانتهى العام الدراسي دون مشاكل وتنفس الناظر الصعداء وهو يودع سعد بفرحة عارمة لأنه تخلص من كابوس كان يلزمه اسمه سعد: حتوحشنا والله يا سعد ده الواحد مش عارف يعمل ايه من غيرك في المدرسه دي " لأ متخافش يا حضرة الناظر ماهو أنا سايبلك أخويا سعيد هنا معاكم يعني مش حوحشك قوي وممكن تلاقيني برضه هنا عشان اطمن عليه " لهو إنت أخوك حيبقى معانا هنا في المدرسه " لأ ده هو فعلا معاكم هنا وطالع سنه تانيه " يا دي المرار اللي أنا فيه مش عارف دي دعوة مين عليهاهو أنا أخلص منك يطلعلي أخوك وبعدين أخوك ده طالعك ولا طالع لسامح " يسري يا استاذ

إسمه يسري " يا خويا إنت كمان يسري ولا سامح المهم يكون زيه مش زيك إنت " لأ بقى الصراحه هو تشكيله مننا الاتنين يعني هو طيب طول ما مفيش حد يدوسله على طرف لكن بقى لو حصل ممم ربنا يستر " طيب يا خويا ربنا يبشرك بالخير يلا بقى والقلب داعيلك ويا ريت مشوفش وشك إنت بالذات " موعدكش يا استاذ " يلا ياد غور إنت حتصاحبني ولا ايه " ومضى سعد وبعد أسابيع قليلة ظهرت النتيجة ونجح سعد وكان أكثر الناس سعادة الأستاذ الناظر الذي تنفس الصعداء لتخلصه من أكبر كابوس لازمه طوال حياته العملية كناظر للمدرسة والتحق سعد بمدرسة يسري الاعداديه وأصبح هو في الصف الأول وأخاه في الصف الثالث الاعدادي ومنذ الأيام الأولى له في المدرسة كانت سمعته تسبقه فلم يكن أحد يستطيع التعرض له خاصة أن العديد من زملائه قد التحقوا معه بنفس المدرسة ولكن بعد مضي نصف العام حدثت بعض المناوشات بينه وبين بعض الطلبة؛ احتك بعض طلبة الصف الثاني الاعدادي بأحد زملاء سعد في (العصابة) كما أسماهم الناظر السابق في المرحلة الابتدائية ولما كان سعد قد استوعب الدرس وأدرك أن الناظر السابق كان يحميه من الفصل من الدراسة ولهذا قرر سعد وجماعته (عصابته) أن يكون الرد خارج حدود المدرسة حتى لا يتعرض أحدهم للتحقيق والفصل أو على أقل تقدير استدعاء ولي الأمر وبالفعل تم التربص بالمعتدين خارج المدرسة وتم تلقينهم درسا قاسيا في معركة غير متكافئة بين سعد وزملائه الذي صال وجال في تلك المعركة وبين ما يقرب من تسعة من الفتيان استخدم في تلك المعركة الطوب والأحزمة الجلدية بالإضافة إلى القوة البدنية الطبيعية لسعد التي كانت لها الكلمة العليا في بسط نفوذه على الجميع وانتهت تلك المعركة نهاية درامية ولكن طبيعية وسرعان ما ذاع صيته في كل



الصفوف الثلاثة وأصبح الجميع يرهب جانبه ويخطبون وده وأصبح سعد ذو سطوة على الجميع إلى درجة أن المدرسون أنفسهم صاروا يتحاشون غضبه ومضى العام الأول في هدوء وكما مر العام الأول مر العام الثاني أيضا ثم جاء العام الثالث والذي كان حافلاً بالاحداث التي بدأت بعد أن حدث لسعد طفرة بدنية عالية بحيث كان من يراه يعتقد أنه طالب جامعي مثلاً ولا يمكن أن يقول أنه في الصف الثالث الاعدادي وكان يسري في الصف الثاني الثانوي في مدرسة أخرى وكالعادة كان يسري يتعرض لمضايقات من بعض أقرانه وكان لا يستطيع رد الاعتداء عليه وفي هذه المرة لجأ يسري مباشرة إلى سعد بالشكوى ولم يكذب سعد الخبر فقام بجمع أفراد (العصابة) وذهب إلى مدرسة يسري حتى يقوم بتأديب المعتدين وفي بداية المعركة التي نشبت كانت الغلبة لسعد ومجموعته ولكن أحد أفراد الذين قاموا بالعدوان عندما شاهد أن الغلبة لسعد قام بإخراج مطواة صغيرة من طيات ملبسه وبدأ يلوح بها في وجه سعد الذي أحتفظ برباطة جأشه وخلع حزامه الجلدي ووجه القطعة المعدنية من الحزام إلى حامل المطواة الذي فوجئ بهذا التصرف ولم يستطع أن يواجه سرعة ومهارة سعد في استخدام الحزام بهذه الطريقة وسقطت المطواة من يده وأسرع أحد زملاء سعد في التقاطها من الأرض واعطائها لسعد بصفته الزعيم ليرى ما يفعله في حامل المطواة الذي وجد نفسه محاط بكل (عصابة) سعد وأمسك سعد المطواة ولوح بها في وجه المعتدي ولكن أحدهم دفع سعد من الخلف فراحت المطواة تعمل في وجهه وحدثت جرح غائر وكان من نتيجة ذلك أن هرب الجميع عندما شاهدوا الدماء تسيل بغزارة من وجه هذا الفتى ووقف سعد لا يدري ماذا يفعل والفتى الآخر ملقى على الأرض يصرخ طالبا الإسعاف وفي هذه اللحظة قام يسري بجذب سعد

من يده والركض بعيدا عن موقع الاحداث وبعد الركض لفترة ليست بالقصيرة كانت الأنفاس تتلاحق منهما والعرق الغزير فيفيض حتى شعرا أنهما في أمان من الملاحقة ثم توجها إلى مكان عمل والدهما في أحد المباني تحت الإنشاء وهناك وجداه يعمل والذي ما أن شاهدهما من أعلى المبنى حيث يعمل إلا وهبط إليهما سريعا حتى يعلم ماهية المصيبة التي دفعتهما للمجيء خاصة وقد شاهدهما على تلك الحالة من اللهاث وتقطع الأنفاس وأمسك طه بذراع سعد من جهة ومن جهة أخرى أمسك بذراع يسري ودفعهما إلى داخل المبنى ثم قال: فيه ايه عايز اعرف أنهي مصيبة عملتوها شكلتوها كده عاملين مصيبة!! متردوا عليا إيه اتخرستوا " سعد يابا ضرب عيل بمطوه في وشه وفتحوله فتحه كبيره والله اعلم دلوقتي إذا كان الواد لسه عايش ولا ايه عشان احنا سبناه سايح في دمه وجرينا عشان نقولك " أه ماهو أنا قلت أول ما شفتكم إن وراكم مصيبه ينهارك أسود يا سعد ادي اخرتها والواد متأكدين إنه مات ولا لسه عايش " لأ يابا مش متأكدين بس الجرح في وشه جامد " ادي اخرتها يولاد الكلب الله يخرب بيتك يا سعد شفت آخرة البلطجة بتاعتك إيه أهو ده اللي كنت خايف منه وبعدين نتصرف ازاي " وفي تلك اللحظة كان أحد زملاء طه يلاحظ كل ما حدث منذ نزوله مسرعا حتى جذب له لولديه داخل المبنى ثم حديثه المضطرب بصوت عالي وتمكن من استنباط الحدث وهنا تدخل هذا الزميل ويدعى جابر وقال: دي ملهاش غير حل واحد " حل إيه أبوس إيدك دي ورطه ميعلمهاش غير ربنا " بص يا اسطي طه إنت تاخذ ولادك دول وتطلع بيهم على لييبا وهناك الشغل كثير لحد الحكاية ما تنتسي وبعدين ترجعوا بالسلامة؛ " معقول برضه بس أنا حاخذ البلوه السوده ده إنما يسري ملوش دعوه بحاجه يعني محدش حيعمله حاجه وكمان عشان يكمل دراسته



أنا حمشي أنا والفاقد ده بس الواحد يروح لبيبا يقول يا مين " متخافش يا اسطى محلولة أنا أقولك " أبوه قولي يا اسطى جابر الله لا يسينك إيه الحل فكر معايا عشان مخي أنا اتشل " الحل بسيط خالص يا سطى أنا حديك عنوان ولاد عمي التلاته في لبيبا تروح لهم وهما إن شاء الله تقعد معاهم في السكن ويشوفوك كمان شغل معاهم والشغل هناك على قفا من يشيل " طيب ده حكاية الشغل والسكن اتحلت إنما أنا في المصيبة التانيه أنا مش معايا باسبور وده على ما يطلع يا خدله أسبوع عشر أيام على الاقل " لأ حتى دي كمان محلولة " إزاي يا سطى حتدني باسبور من عندك يعني ولا ايه " الله يضحك زي ما ضحكنتي لأ يا سطى السفر للبيبا مش محتاج باسبور لأن القذافي الله يستره خلى السفر للمصريين بالبطاقة بس من غير باسبور ولا حاجه " إنت بتتكلم جد يا سطى يعني أنا والواد سعد ده مش محتاجين باسبور " آه والله جد الجد وده بقى من حظك ها فيه حاجه تاني ولا كده محلولة زي ما بقولك " آه فاضل بس إني أبلغ أم سعيد بالمصيبه السوده دي واخلي يسري يروح عند عمته في البلد " عمتي إيه بس بابا اللي أروح عندها طيب اعمل ايه في الدراسة " ماهو مفيش حل تاني عشان اسيبك وأنا مطمئن عليك غير كده وبالنسبة للمدرسه أنا حخلي جوز عمك ينقلك عندهم في البلد وكده مسألتك تبقى اتحلت عشان مفيش حد يتعرض لك هنا فاضل بقى مرات ابوكوا نبلغها ازاي! " بسيطه بابا بتليفون خالتي ام احمد تقولها " جدع يا يسري إنت عارف نمرتها " لأ بابا مش حافظها عشان أنت عارفين مليش اختلاط بحد " فالج يا خويا طيب نعمل ايه دلوقت " أنا عارفها يا سطى " الله يخرب بيتك وساكت أخيراً فيه حاجه ليك لازمه فيها قول يا بلطجي ها حافظها بجد ولا زي عوايدك " لأ يا سطى عارفها وحافظها " طيب يا اسطى جابر أنا مش عارف اشكرك ازاي

أنا دلوقتي حاخذ الولاد عشان نعمل تليفونات ونصرف روحنا وعلى مارجعلك تكون جهزت عنوان ولاد عمك وتقول للكومندا إني حسيب الشغل بس اوعى تقوله على المصيبة اللي أنا فيها " عيب يا سطي طه هو أنا صغير عشان اغلط الغلطة دي روح إنت وعلى ما ترجع يكون كل حاجه تمام ربنا يعينك على بلوتك " تعيش يا سطي بس خليه يجهزلي حسابي عشان نمشي على طول " من عنيا الاتنين يا سطي حاضر " وهكذا مضى طه بصحبة ولديه وأتم الاتصال بأخته وشرح لها الكارثة التي وقعت ومن جهتها وافقت على اقتراحه بوجود يسري معها بل ورحبت بذلك أيما ترحيب ثم اتصل بالجارة أم أحمد وطلب منها أن تحضر زوجته أمل حتى يحدثها في أمر هام ولم تدخر الجارة الطيبة وسعا ونادت على أم سعيد وتمت المحادثة وكانت على النحو التالي: أيوه يا أم سعيد أنا طه بكلمك عشان جاني سفر في شغل عشان متقلقيش عليا" سفر فين يا خويا والسفر ده كده على غفله " اسمعيني يا أمل مفيش وقت عشان أنا مسافر دلوقتي حالا والعربيه مستنياني وبيبلغك عشان بس تبقي عارفه إنتي تكلمي السنه مع سعيد في مصر وبعدين على البلد عدل وكمان يسري معاكي موجود هناك إنتي فاهمه " لأ مش فاهمه يعني ايه يسري معايا وموجود هناك واحده واحده عليا يا طه عشان أفهم" بقولك يسري من دلوقتي حيبقى موجود عند عمته عزه وحيكمل السنه هناك وإنتي تخلصي السنه وتنقلي سعيد هو كمان البلد فهمتي قصدي ولا لسه " الله ده كده معاناتو إنك حتغيب في السفر حتقعده قد ايه " لسه مش عارف يا أم سعيد لكن اطمني مصاريفك وحالك ومحتالك حتلاقيهم عندك وأنا جبعتك فلوس مع واحد زميلي تمشي حالك على ما ابعثك فلوس من السفر بس بقولك ايه تمسكي إيدك شويه عشان لسه مش عارف الظروف حتبقي عامله ازاي ماشي " ماشي يا خويا اللي تشوفه



وتقول عليه بس مش كنت تيجي تشوفني وتسلم عليا قبل ما تمشي " يا وليه بقولك العربية مستنياني يلا بقى سلام لا إله إلا الله " محمد رسول الله ربنا يجيبك بالسلامه يا طه وترجعلي بألف سلامة " تعيشي يا أمل الله يسلمك " وهكذا عاد طه مرة أخرى إلى موقع العمل بعد أن جعل يسري يستقل القطار متجهاً إلى عمته في البلد واصطحب سعد ثم تركه بعيداً عن المبنى الذي يعمل به حتى يتأكد أن لا أحد يلاحقه ثم تحدث مع جابر وأخذ منه عنوان أبناء عمومته واقتسم المبلغ المالي الذي أحضره له جابر من مستحقاته في العمل حتى يرسله إلى زوجته أمل ولكن جابر أخبره أن يأخذ المبلغ كاملاً وهو سوف يرسل مبلغاً مماثلاً له إلى أم سعيد على سبيل القرض وعندما يستقر الحال بطه يعيده إليه ورفض طه في بادئ الأمر أن يقبل نقود جابر ولكن جابر أصر على ذلك قائلاً: اتكل على الله إنت بس وقول يا باسط وبعدين الناس لبعضيها يا سطي طه وأنت أخ كبير وجمايك على الناس كلها وبعدين إنت كل الحكاية شهر ولا شهرين وتسدها إنت وراك دلوقتي مصاريف وهم ما يتلم " وقبل طه القرض من جابر شاكرًا له فضله ووقوفه بجانبه في محنته التي كادت أن تعصف بحياته كلها ثم مضى بعد أن ودع جابر بالأحضان وهو يشعر أن جابر قد أزاح عن كاهله صخرة كبيرة من الهموم واتجه طه إلى محطة مصر للقطارات حتى يتجه إلى الإسكندرية ليستقل سيارة تذهب به إلى ليبيا وهو لا يعلم ما الذي سوف يحدث له ولولده سعد الذي كان يسير معه وهو مطاطيء الرأس لأول مرة في حياته وكان يشعر بحجم المصيبة التي وضع نفسه وأبيه فيها ولا يستطيع أن يضع عينه في عين أبيه واستقلا القطار متجهين إلى الإسكندرية ومرت الرحلة بسلام دون معوقات وفي الإسكندرية سأل طه عن السيارات المتجهة إلى ليبيا ودله بعض الناس إليها ولكنه أضطر للمبيت في





الإسكندرية لأن السيارة سوف تتحرك في الصباح وفي الصباح استيقظ طه وابقظ سعد الذي كان يغط في نومه وكأنه لم ينم من قبل منذ مدة طويلة وغادرا النزل الذي أقاما فيه الليل متجهان إلى موقف للسيارات المتجهة إلى ليبيا وسأل طه عن السيارة التي سوف تفلهما وعندما ذهب إلى شبك التذاكر سأله من يتولى ذلك عن بطاقة الهوية وهل هي سارية أم لا وعندما أجابه طه بنعم سأل عن سعد هل بطاقته سارية المفعول هو الآخر ام لا وهنا انبرى طه قائلاً: بطاقة إيه ده لسه صغير مبلغش سن البطاقه " ده برضه شكل حد تحت السن إنت جاي تهزر هنا يا أختنا يتجيب بطاقته يا ما تبعد وتخليني اشوف شغلي " طيب تلاته بالله العظيم ده تحت السن هو أنا حضحك عليك يعني ولا حضحك عليك " ياعم الله لا يسيئك أبعد عني الحكاية مش ناقصاك ده شكله بالميت كده تمتناشر تسعناشر سنه إن مكنش اكتر يلا بقى خيليني اشوف اللي وراك " لا إله إلا الله طيب اخليك تصدق ازاى إنت يا واد إنت معاك كانيه المدرسة " أبوه يابا معايا " طيب خلاص وريه لعمك عشان يصدق إنك لسه مكملتش الخمستاشر سنه " أهو يابا " وتناول الرجل بطاقة الهوية المدرسية وهو ينظر بتمعن إلى سعد وإلى البطاقة المدرسية ولا يكاد يصدق أن هذا الشاب المائل أمامه هو نفسه الموجود في البطاقة المدرسية وعندما وجد التطابق واضحاً أدار رقبته يمناً ويسرة وهو غير مصدق ثم قام بحجز التذكريتين واعطاهما لطفه وطلب منه الإنتظار قليلاً في الاستراحة المخصصة لذلك وسأله طه: هو إحنا قدامنا كثير عشان نمشي " لأ اطمئن كلها نص ساعة وتتوكلوا على الله إن شاء الله " يعني نلحق نجيب حاجه نفطر " ادخل الاستراحة وإنت تلاقي كل اللي إنت عايظه تفطروا تشربوا شاي وقهوة كل حاجه موجوده متقلفش " طيب يا سيدي متشكرين " واتجها إلى الإستراحة

وهناك تناولا افطارهما وشربا كوبان من الشاي وحمدا الله على نعمته وما إن انتهيا من ذلك إلا وسمعا مكبر الصوت يعلن أن على السادة الركاب عليهم ركوب الحافلة المتجهة إلى ليبيا قام طه وبصحبته سعد إلى الحافلة وهو غير مصدق أنه سوف يغادر الخطر إلى مكان آمن لا أحد يلاحقه فيه وبعد مدة ليست بالقصيرة وصلت الحافلة إلى مدينة مرسى مطروح وهناك توقفت للإستراحة ونزل منها بعض الركاب لتناول الطعام والشراب وظل طه وسعد في الحافلة لم يغادراها ثم استأنف السائق الرحلة حتى وصل إلى محافظة السلوم الحدودية وهناك توقفت السيارة للإستراحة مرة أخرى وهناك ترجل طه وسعد من الحافلة وذهبا لقضاء حاجتهما ثم اتجها لتناول الطعام ثم عاودت الحافلة مسيرها إلى أن وصلت إلى المنفذ الحدودي ونزل جميع الركاب من الحافلة حتى يطمئن رجال الأمن الموجودين بالمنفذ من خلو جميع الركاب من أي موانع أو اشتباه أمني وعبر الجميع المنفذ إلى الجهة الأخرى حيث يوجد مجموعة أخرى من رجال الأمن يتولون الشئون الأمنية من الجانب الليبي ومر الجميع من الجانب الآخر بسلام وبدأ الجميع في الصعود إلى الحافلة لاستكمال الرحلة وعندما بدأت الحافلة في التحرك إذا بمجموعة من رجال الشرطة الليبية يقفون أمامها ويطلبون من السائق التوقف لأن عندهم إخبارية عن أحد الهاربين من مصر يستقل الحافلة وهنا أيقن طه بأن سعد هو المطلوب ولم يدري ماذا يفعل في هذا الموقف وكل ما فعله هو أن يضع يده على رأس سعد حتى يخفضه وكأنه بذلك يخفيه عن عيون رجال الشرطة وظل طه يتمتم بالدعاء أن يجعل رجال الشرطة يتعامون عن ولده وبينما هما على ذلك الحال إذا بأحد رجال الشرطة يسأله عن بطاقة الهوية فلما أخرج له هويته سأل عن بطاقة هوية سعد وهنا كان قلب طه يدق بصوت مسموع



ولو وضع أحدهم يده على قلبه لشعر بالضجيج المنبعث من القلب وسال العرق الغزير من جبين طه وايقن أن المحظور قد وقع وأنهم سوف يلقون القبض على سعد الذي انكمش في مقعده وهو يرتجف فرقا ويحاول اخراج بطاقة الهوية المدرسية بإصابع مرتعشة وبينما يتناول الضابط هوية سعد من يده وهو ينظر إليه مليا إذا بأحد زملائه يصيح بأنه قد وجد المطلوب أمنيا والقي القبض على الشخص المطلوب الذي كان يحمل حقيبة بها المخدرات وهو يخفيها في جيب سري داخل الحقيبة وترك الضابط هوية سعد ومضى بعد أن شعر طه وسعد أن سعد وقع في قبضة الأمن لا محالة وبعد أن تركهما الضابط ظل طه يلهج بالشكر إلى الله لأنه جعل الموضوع ينتهي عند هذا الحد وبعد مدة قصيرة وصلت الحافلة إلى مقرها الرئيسي ونزل منها طه وهو لا يعرف كيف يتصرف حتى يصل إلى ابناء عمومة جابر ووقف حائراً ماذا يفعل ثم هداه تفكيره أن يسأل أحد الركاب المصريين عن العنوان قائلاً: متعرفش يا بلدنا العنوان ده نروحله ازاي " إيه هو انتوا أول مرة تيجوا هنا " أه والله ومنعرفش حاجه هنا " طيب هو مفيش حد مستنيكوا هنا ولا حاجه " لأ والله اصلنا جينا على غفله وملحقناش نقول لحد " ماشي يا خويا تعالى معايا أنا رايح في حوش قريب من حوش قرابيك ده تعالوا معايا اخدكم في سكتي " ده يبقى جميل مش حنساه طول العمر ربنا يكرمك يا بلدنا " يا عم جميل إيه بس ده كله سلف ودين أنا فاكرو أول مرة جيت هنا برضه كنت عامل زي حالاتك كده إنت وصاحبك ده ومش عارف أتصرف ازاي ولقيت برضه واحد ابن حلال خدني من أيدي ووصلني لحد الحوش اللي فيه قرابيتي والحمد لله اديني بوفي الدين اللي عليا ويمكن إنت كده عليك الدور تخدم حد ثاني بكره حد عارف " برضه تشكر يا اخ إنت جميلك ده في رقبتي " الشكر لله يلا بينا



" وهكذا أوصل هذا المصري الغريب الذي لا يعرف طه إلى أقارب جابر الذين استقبلوه بكل ترحاب استقبل أبناء عمومة جابر طه وولده سعد بكل ترحاب وقال أحدهم ويدعى سليمان: أهلا وسهلا ببيك يا سطي طه ده احنا زارنا النبي ( عليه الصلاة والسلام) ده انتوا نورتونا إنت والاخ ده إلا اسمه إيه " النور نورك يا اخي ده أبني سعد إنما إنت عرفت إسمي منين " ابدأ ده ابن عمنا جابر كلمنا النهاردة الصبح في التليفون وقالنا إنك حتشرفنا هنا " طيب وإسم الكريم إيه " أنا سليمان واخويا ده الوسطاني حسين والصغير بتاعنا ده محمد على إسم جده الله يرحمه " عاشت الاسامي يا سطي سليمان ويا ترى فيه شغل لنا ولا حنستنى نور على شغل " لأ من الناحية دي اطمئن شغلنا موجود ومن بكره الصبح لو تقدر تستلم الشغل لو عايز " أه طيب تمام إحنا معاكوا إن شاء الله بس لو ممكن نستريح علشان المشوار كان طويل حبتين والواحد جسمه مدغدغ من التكتيفه في السفر " أه طبعا قوي بس الأول ناكل لقمة مع بعض وبعديها نومتكم جاهزه متقلقتش يا سطي " ربنا يبارك فيكم جميعا ويخليكم ضهر وسند لكل محتاج الواحد كان شايل الهم ومش عارف كنت اعمل ايه من غيركوا انتوا وحببيي الأسطي جابر ده والله اكثر من أخ ليا " ماهو كمان يا سطي بيشكر فيك وبيقول عليك راجل جدع وصاحب صاحبه وخلي بالك أما جابر يقول كده على حد بيطلع كده فعلا لأن جابر دايمًا له نظريه في الناس ودايمًا بتطلع سليمه " ربنا يكرمك ويكرمه ده أخ حبيب واكثر والله " طيب يلا بقى بسم الله ناكل لقمة مع بعض عشان تبقى عيش وملح شاهده علينا " وهكذا تناول الجميع طعام العشاء ثم نام الجميع حتى يصبحوا مبكرا إلى موقع العمل وظل سعد يتقلب طوال الليل لا يستطيع أن يغمض له جفن وهو يفكر في هذا التغيير الذي يحدث له والذي هو بمثابة إنقلاب تام لكل

أحلامه وطموحاته ثم لم يلبث أن غلبه النعاس ولم ينم طويلاً إلا وشعر بيد أبيه تلكره في جانبه وهو يوقظه طالباً منه النهوض للذهاب معه إلى موقع العمل حتى يرى ماذا يستطيع أن يقوم به من عمل وصل الجميع إلى مقر العمل وبدأ طه على الفور الإمساك بالرسم الهندسي الذي يبين أطوال الحديد المطلوبة وكم عددها في كل جزء من المبنى المزمع بناؤه وسعد يلازمه كظله حتى يستطيع أن يقوم بأي عمل يكلفه به أباه والذي بدوره بدأ يعلمه كيف يقطع الحديد باستخدام نوع من المقصات الكبيرة المخصصة لذلك وكيف يقيس الطول المطلوب والعدد المطلوب وكيف يحمل الحديد بعد تجهيزه إلى المكان المخصص لوضعه فيه وكان سعد يستجيب لأي أمر من أبيه بمنتهى السرعة والدقة المطلوبة منه وكأنه قد تمرس على هذا العمل من قبل وساعده على ذلك القوة البدنية الطبيعية التي يتمتع بها فكان يحمل أضعاف ( أسياخ الحديد) التي يحملها أقرانه دون مجهود يذكر وبعد ما يقارب من اسبوعين كان سعد يستطيع أن يقوم بعمله دون توجيه من أبيه إلا في حالات قليلة نادرة ومرت الأيام حتى أتموا الشهر واستطاع طه تدبير المبالغ المالية التي سيرسلها إلى أمل ويسري الذي كان قد انتقل بالفعل للعيش في كنف عمته عزه وزوجها الذي كان يعامله بكل طيبة القلب وكان مثلما صرح لزوجته عزه قائلاً: الواد يسري ده مش عارف ليه له كده في قلبي معزه تانيه زي ما يكون إبني أني " منا عارفه يا خويا وحاسه بيك إلا يكونش عشان الواد يتيم وأنت شلتة أول عممول أما أمه الله يرحمها وييشبش الطوبه اللي تحت راسها ماتت وسكت معاك " والله منا عارف يا أم سيد بس الواد ده فعلا أني بحبه ولو قلتلك أكثر من ابننا سيد تقولي عليا كداب " طيب يا خويا ربنا يهني سعيد بسعيده " ومين بقى سعيد ومين فينا سعيده!! يا وليه حافظي على ملافظك صحيح يا ولاد دي



الملافظ سعد " أني عارفه يا خويا أهو الناس بيقلوها كده هو أنا يعني جبت حاجه من عندي " طيب ماشي يا أم العريف على العموم أني عايزه يفضل كده ماشي في مذاكرته زي الاكس عشان ابو نسب ميقلش علينا إننا اهلنا والواد ما شاء الله عليه الأساتذة بتوعه في المدرسة اللي حدانا في البندر بيقلوا عليه إنه شاطر وإنه حيطلع برنجي على كل العيال اللي زيه مش زي إبنك الخايب " يا خويا قول الله واكبر هو إنت حتحسد الواد كده في وشي إن كنت إنت ولا الأساتذة بتوعه " بقى أني حسده برضك ده أني بقولك بحبه اكثر من إبنك اللي ملوش لازمه ده لا نافع ولا شافع ولا له في التعليم ولا له في الزراعة ولا مانا عارف ده حيطلع إيه " ملكش دعوه إنت بس بالواد سيد وهو إن شاء الله حينصفي ويمكن يغير من ابن خاله وينعدل حاله بس إنت قول يا رب " يا رب يا عزه وهو أنا أكره إني أشوفه ينعدل حاله بدل ماهو كده محسسنني إنه مفيش حيلته غير إنه ينام ويصحى ويحش في الأكل زي البهايم اللي حدا العمده " اهيبني شوفي يا ختي الراجل بيقول على الواد اللي حيلتنا بهيمه هو فيه زي سيد في البلد كلتها ده حتى الناس بيحسدونا عليه " يحسدونا على ايه يعني على خيبته القويه أهو محدش غيرك اللي مميل بخت الواد ده بدلحك المرق ده فيه " خلاص يا خويا أهو الواد عندك وريني بقى حتعمل معاه ايه " خلاص بعد ما بوظتية أهو عندي ماشي يا أم العريف بس اياكي مره ثانيه تقولي ملكش دعوه بيه " لأ يا خويا مش حقولك حاجه بس ربنا ينفخ في صورته وينعدل حاله " وهكذا مضت الأيام وانتهى العام الدراسي وظهرت نتيجة امتحان يسري وكان الأول بجدارة على المدرسة وحاز على الدرجات النهائية وكان من نتيجة ذلك استدعاء أبو سيد من قبل مدير المدرسة حتى يهنئه بتفوق يسري وانتقاله إلى الصف الثالث الثانوي وهو يرجو أن يستمر يسري

في تفوقه حتى يكون من أوائل الجمهورية ويصبح لمدرسته شأن كبير بين المدارس " وفي نفس الوقت كان سعد يتقدم في العمل بجوار أبيه حتى أصبح يقال له اسطى سعد فقد تشرب العمل تماماً في خلال ستة أشهر مضت وأصبح يعتمد عليه في العمل وزاد راتبه حتى أصبح مقاربا لراتب أبيه وبهذا توفرت المبالغ المالية التي كان يرسلها طه إلى زوجته أمل وإلى أخته وزوجها حتى يقوموا برعاية يسري ونسي الجميع حادث المطواة والطالب الذي جرحه سعد حتى كان عصر أحد الأيام إذا بأحد أمناء الشرطة يذهب إلى منزل طه ويقابل أمل ويسأل عن طه وسعد وأمل ليس لديها أي فكرة عن الحادث وكل ما كانت تعرفه أن سفرا مفاجئا قد وقع ولا تعرف كيف ولماذا؟ طرق امين المباحث باب شقة طه وفتحت أمل الباب وهي تتعجب لأنها شاهدت شخص غريب فسألته: أيوه يا خويا إنت عايز مين " مش دي شقة الأسطى طه أبو سعد ويسري " أه يا خويا شقتي بس هما مش موجودين الاتنين " أه طيب حيرجعوا إمتى " يرجعوا! يرجعوا مينين دول يا خويا مسافرين بره مصر " مسافرين!! مسافرين فين وامتى سافروا؟ " طب مش اعرف بس إنت مين الأول وعايزهم في إيه؟ " ردي عليا بس الأول وأنا حقولك كل اللي إنتي عايزه تعرفيه سافروا فين وامتى " والله منا عارفه اقولك ايه هما سافروا اديلهم كده بيجي ست شهور " طيب وسافروا فين بقى " والله منا عارفه سافروا فين ولا عنوانهم إيه لكن كل اللي أعرفه إنه قالي إن السفرية جت على غفله وهو مكنش عامل حسابها " ومن ست شهور وطول الوقت ده ومنتيش عارفه هما سافروا فين " لا والله يا خويا معرفش ده حتى أما سألته قالي ملكيش دعوة انتي بالحاجات دي هو إنتي ليكي أكل ولا بحلقه بيني وبينك يا خويا أنا اتكسفت اسأل تاني علشان على رأيه أنا مالي مسافر فين هو أنا ليا فيه



أنا ليا مصاريفي والواد إبني يكونوا عندي والصراحة بقى هو مقصرش في الناحية دي يبقى أعرف ولا معرف ميخصنيش "طيب يا ست لو جه جوزك أي وقت حنعرف وكمان حنعرف هو راح فين " ليه يا خويا هو الأسطى طه واخذ منكم حاجه ولا واخذ حاجه " نظر الأمين إليها مليا ثم قال: لأ مش واخذ بس إحنا اللي حنديله أما يرجع! سلام " يوه شوفي يا ختي الراجل اللي مشي كده وسابني من غير ميقولي هو مين وعايز ايه من طه " وبعد عدة أيام سافرت أمل إلى بلدتها كما طلب منها طه ذلك ولم تعد مرة أخرى إلى القاهرة وقصت تفاصيل هذه المقابلة لعزه شقيقة طه والتي لم تخفي انزعاجها وانتظرت حتى عاد زوجها وقصت عليه بدورها ما قالته أمل لها أستمع أبو سيد وهو لا يدري ماذا يفعل وقرر أن يتصل هاتفيا بشقيق زوجته طه على رقم هاتف أبناء عمومة جابر وبالفعل تم له ما أراد وأخبره بكل ما قالته أمل لعزه وأبدى طه قلقه إزاء هذه المقابلة وقال: يعني محدش يعرف الراجل ده مين ولا عايز ايه " لأ يا ابو نسب محدش يعرف دي حتى أم سعيد ذات نفسها متعرفش وهي اللي بلغتنا يبقى احنا حنعرف " طيب خلاص يا بو سيد المهم إنت بس طمني عليكوا كلكوا عاملين ايه والواد يسري عامل ايه ماشي كويس في العلام ولا ايه ظروفه " لأ من الناحية دي اطمن إبنك ما شاء الله عليه ده طلع البرنجي على المدرسة ولسه امبارح مدير المدرسة بلغني بكده وفرحان أوي بيسري ربنا يحرسه وبيقولي إنه كان عايز يشوفك إنت عشان يباركلك بس أني قتلته إنك مسافر ومش موجود في مصر من أساسه " إبني أنا طلع من الأوائل يسري!! " أه يسري وبعدين ده الأول مش من الأوائل يعني كلتهم بعديه الف مبروك يا بو نسب ولا اقولك يا بو يسري! " الله يبشرك بالخير يا بو سيد أنا كنت عارف إنني سايبه في ضمانك وأنتك قد الحمل اللي رميته عليك



والحمد لله ظني طلع في محله أنا مش عارف والله أقولك إيه غير الله يباركك ويسترك ويباركك في سيد ويبقى احسن كمان من يسري " تعيش يا بو نسب بس متنسائناش بقى في حاجه حلوه أما ترد عندنا بإذن الله " والله من غير متقول ده إنت ليك عندي حاجه حلوه ده غير اللي تطلبه مني لما نزل أنا عنيا ليك " آه يرجع مرجوعنا بقى للشخص اللي راح لأم سعيد حتتصرف ازاي ونعرف ده مين ازاي " لأ خلاص متشغلش بالك إنت أنا حعرف هو مين بكره بالكثير إن شاء الله " ماشي يا بو نسب الله يطمنا عليك المهم انتوا بخير وده اللي يهمننا " مع السلامة يا بو سيد وسلملي على أم سيد وتقول للواد يسري أبوك مبسوط منك وبيقولك اتجدعن وتطلع الأول السنه الجايه وليه عندي حاجه حلوه تبسطه " ماشي يا بو نسب حقوله وربنا يوفقه إن شاء الله عشان تبقى الحلاوه حلاوتين " سلام يا خويا لا إله إلا الله " محمد رسول الله " أتم طه المحادثة الهاتفية وهو يكاد يطير فرحا عندما علم بتفوق يسري الدراسي ولكن بعد قليل تذكر ذلك الشخص الغامض الذي قام بزيارة أمل وعندها قرر أن يسأل جابر إذا كان أحدهم قد قام بالسؤال عنه من عدمه وأيضا قرر الاتصال بجارته أم أحمد حتى يستفسر منها إذا كان ذلك الشخص الغامض قد عاود المجيء مرة أخرى للسؤال عنه واستطاع طه أن يتواصل مع أم أحمد سريعا كونها ربة منزل لا تغادر منزلها إلا قليلا والتي نفت بدورها علمها بأي شيء من تلك المقابلة الغامضة ثم أخبرها طه بأن تنفي علمها بأي شيء إذا سألها أي شخص عنه أو عن أمل وأجابته بالطبع أنها كانت ستفعل ذلك حتى لو لم يطلب منها ذلك ثم حاول طه الاتصال بالاسطى جابر وفشلت المحاولة الثانية أيضا ولم يتمكن من إتمام الاتصال وظل طه في حالة من القلق لا يستطيع قتل الهواجس التي انتابته حتى منتصف الليل ثم علا رنين الهاتف وقبل أن

يتمكن من الوصول إليه وجد سليمان قد تناول السماعه وهو يقول: الو السلام عليكم ورحمة الله وبركاته

طيب يا سيدي و عليكم السلام ورحمة الله وبركاته أيوه مين!! جابر ابن عمي! واحشني والله يا جابر إيه فينك بقالك مدة طويلة مش بتسأل " يا راجل ده أنا اخر مره أنا اللي كلمتكوا إنت بقى اللي مش بتسأل " معلىش يا جابر إنت عارف بقى عيشة العزوبيه اللي احنا فيها متخليش الواحد عارف يلاقي وقت لأي حاجه المهم إنت عامل ايه واخبارك ايه ؟ " طيب قولي الأول هو مين اللي اتصل عليا إنت ولا مين " لأ مش أنا اللي اتصل بيقي الأسطى طه كان عايزك معرفش في إيه استنى أهو جنبى خد كلمه " وتناول طه السماعه وقال: الو ازيك يا سطى جابر أخبارك واخبار مصر إيه " حبيبي والله يا سطى طه قولي إنت الأول عامل ايه مع ولاد عمي وهما عاملين معاك الواجب ولا مقصرين رقبتي " لأ يا جابر ولاد عمك دول ناس زي الفل ومفيش حد احسن منهم وبصراحه من يوم ما وصلت وهما شاييلينا على كفوف الراحة المهم بس عايز أسألك سؤال " أه افضل يا خويا اسأل زي ماننت عايز " فيه حد جه عندكم وسأل عليا من بعد ما مشيت وسبت الشغل " حد!! حد زي مين يا اسطى" أي حد طبعا إنت عارف أنا مشيت ليه يعني ممكن يكون حد ببسأل عشان موضوع سعد اللي إنت عارفه " آاه فهمت ده المعلم ابراهيم المقاول كان قال إن فيه حد سأل عليك من يبجي اسبوع كده وهو اداله عنوان بيتك " شكله ايه الحد ده " لأ ماهو أنا مشفتوش لكن المعلم هو اللي شافه وكلمه " طيب المعلم ابراهيم عارف إحنا فين دلوقتي ولا ايه " لأ طبعا محدش غيري يعرف وأنا طبعا مقلتش حاجه لحد " طيب معلىش يا جابر أنا عارف إنني بتقل عليك بس إنت عارف الظروف اللي الواحد فيها ممكن كده يعني تعرفلي من المعلم مين هو ده اللي



سأل بس متخليهوش يحس بحاجة " عيني يا سطي بس كده حاضر يا خويا طمني إنت بس عليك وعلى إبنك سعد عاملين ايه " إحنا الحمد لله زي الفل وبصراحه ولاد عمك دول طلوعوا ولاد أصل زيك والشغل هنا ياما! إلا بقولك ايه متيجي تشتغل معانا ولا إنت مرتاح في مصر " لأ مش مسألة مرتاح بس إنت عارف بقى الواحد مينفعش يسيب مصر عشان الحاجة بعافيه شويه وأنا قاعد معاها عشان اراعيها " قصدك الحاجة أمك " آه يا خويا هي ربنا يديها الصحة عارف لولاها كنت سافرت ويمكن قبلك كمان " حد عارف ده يمكن ربنا عمل كده عشان الاقي واحد زيك إبن حلال يقف معايا في زنقتي " آه إنت بتقول فيها ده ربنا بيسبب الاسباب بس مين يعرف ويتعظ بقولك ايه عشان مطولش عليك قول طول أنا حشمشملك عن موضوع الجدع اللي جه ده ولما اعرف حلكمكوا تاني ماشي يا خويا " ربنا يخليك ليا يا سطي جابر معلى أنا تايبك معايا على طول " يا عم متقولش كده ده احنا اخوات وإنت راجل إبن حلال وعشان كده ربنا بيقفلك ولاد الحلال ولا يمكن دي دعوة الحاجة أمك الله يرحمها ويحسن إليها " ماشي يا خويا مستني تليفونك " طيب مش عايز حاجة من مصر " تعيش يا خويا سلملي على كل حته فيها والله الواحد وحشته مصر بشوارعها وكل حته فيها " الله يسلمك يا سطي سلم بقى على الجماعة عندك وقولهم إني حلكمك تاني الأسبوع ده ماشي! سلامو عليكم " و عليكم السلام يا جابر " وانتهت المكالمة ووجد طه أن سليمان ينظر إليه وفي عينيه نظرة تساؤل يريد أن يعلم ما الذي وراء طه وابنه سعد وهنا بادر طه بالحديث قائلاً: طبعاً إنت عايز تعرف ايه الحكايبه بالظبط " ده إذا كنت عايز تقول دي حاجة ترجعلك إنت " شوف أنا حقولك كل حاجة بس الصبح إن شاء الله عشان الوقت أتأخر نلحق ننام شويه عشان نروح الشغل

مرتاحين ونعرف نشوف شغلنا " براحتك يا سطي طه وحتى لو مقلتش حاجه زي ما بقولك دي حاجه ترجعلك إنت " وذهب الرجلان إلى النوم وكل منهما يفكر! طه يفكر في ما هية الرجل الغامض وسليمان يفكر فيما وراء طه وابنه سعد وفي الصباح توجه الجميع إلى مقر العمل وفي منتصف النهار انفرد سليمان بطه في فترة تناول الطعام وقام الأخير بسرد كل ما حدث لسليمان وكان سليمان يستمع وهو في حالة من الدهشة لا يصدق أن سعد الذي يبدو كالحمل الوديع أمامه قد فعل كل هذه الأحداث وكان رد فعله أن يقول: معلش يا سطي الواد لسه في سن الطيش ويا ما كنا بنعمل وأحنا في سنه بكره يعقل وكويس إنه تحت عنيك دلوقتي تقدر تراقبه " ربنا يستر يا سطي سليمان ويعدي الأيام دي على خير الواد ده موريني المر من يومه والواحد مش عارف إمتى يعقل " متخافش يا اسطي هو طول ما هو بيشغل ويتعب مش حيفكر في أي مصيبه يعملها وبعدين أنا شايف إن ربنا هدها عشان من ساعة ما جيتوا وهو معملىش أي مشكلة مع حد " يا رب العالمين قادر على كل شيء "

علم سليمان بكل ما حدث من أفعال سعد وأسرها في نفسه ولم يخبر أخواه بهذا الحديث مع طه الذي كان قد طلب من سليمان عدم إخبار أحد غيره قائلا: بس الموضوع ده يفضل سر بيني وبينك ويا ريت محدش يعرف بالكلام ده عشان الواد لو حس إنه اتفضح ممكن يستبيع ويعمل أي حاجه ماشي يا سطي " خلاص يا سطي طه شرك في بير ومحدث ثاني حيا خد خبر مني أنا " تعيش يا سطي سليمان أنا عارف إنك راجل مجدع وكلمتك سيف " على رقبتي يا سطي " تسلم وتسلم رقبتيك " ومضى على هذا الحديث ثلاثة أيام وفي اليوم الرابع ليلا تمت المكالمة الهاتفية التي كان ينتظرها طه على أحر من الجمر وجاء صوت جابر قائلا: الو ازيك يا سليمان وازي حسين ومجد عاملين ايه

كلكوا " الله يسلمك يا جابر إحنا كلنا كويسين بقولك ايه إنت تكلم الأسطى طه الأول عشان ده من ساعة مكلتمته وهو لا على حامي ولا على بارد وبعدين ارجعلي نتكلم سوا ماشي " ماشي يا سليمان اديهولي! أيوه الو يا عمنا عامل ايه " الحمد لله يا سطى جابر إنت عامل ايه ويا ترى عرفت الراجل اللي كلمتني عليه ولا لسه " أيوه يا سطى عرفت ده طلع امين مباحث من القسم " وعرفت ازاي " أصله جه تاني عندنا النهارده وسأل عليك وبعدين المعلم ابراهيم دله عليا وقاله اني اكثر واحد ممكن يكون يعرف عنك أي حاجه عشان صحاب وكده يعني إنت واخذ بالك " آه يا سطى جابر المهم قالك ايه وقتله ايه " أبدا هو دخلي ناعم كده وسلامات واداني سيجاره عشان يجر معايا الكلام وأنا خدتها منه وعملت عبيط آل يعني مش فاهم هو عايز ايه " آه وبعدين يعني طلع ايه " طلع أمين شرطة من مباحث القسم وجاي يسأل عليك إنت وسعد عشان الحكاية اللي عملها سعد وأنا بقى اللي فضلت ادخله (يجر الكلام منه) لحد ما عرفت كل حاجه " عرفت ايه منه قولي قوام متكركبش بطني " عرفت إن الواد اللي ابنك ضربه مماتش بس حصله عاهه مستديمة ودي جنايه والمستشفى اللي دخلها هو اللي عمل المحضر عشان يخلوا مسؤوليتهم " جنايه!! يا رب الطف بينا ها وبعدين " بس يا سيدي هو بقى قعد يسألني ويقول لي لو أنا عارف مكانكوا ولا قلتش أبقى شريك معاكوا وأبقى بتستر على مجرم ودي فيها ثلاث سنين سجن ربك والحق أنا قلت ثلاث سنين عشان أخويا وحبيبي الأسطى طه قليلين " يعني ايه قتله " أقوله ايه قاله عفريت ده أنا بقولك ثلاث سنين عشان خاطر عيونك قليلين ده لو قالي حتى حتشلق والله منا قايل حاجه " او مال عملت ايه " أبدا فضلت افسحه في الكلام لحد ما لقي مفيش مني رجا سابني ومشي بس بعد ماهددني زي مبقولك " والله الواحد

مش عارف يودي جمالك دي فين إنت وولاد عمك دول الواحد كده حاسس إنني عملتكم قلق في حياتكوا وكان عليكوا بأيه ده بس " وبعدين يا عمنا كده حتز علني منك قلق إيه وبتاع ايه ده أنا افديك برقبتي إنت متعرفش معزتك عندي قد ايه " تعيش يا خويا بجد راجل وابن راجل " تسلم يا سطي اديني بقى سليمان أكلمه " واعطى طه سماعة الهاتف إلى سليمان حتى يستكمل حديثه مع جابر الذي كان يوصيه خيرا ويطلب منه كتمان سر طه وولده ويستفسر منه إذا كان أي أحد اخر قد علم بسر سعد وبعد أن اطمأن بعدم شيوع السر تبادلوا حديث عائلي بالسؤال عن أخبار العائلة في مصر وأخبارهم هم في ليبيا ثم انتهى الحوار عند ذلك الحد مضت الأيام تباعا وانشغل الجميع بالعمل ونسي طه هذا الأمر تماما اعتمادا على إنه خارج مصر ولا احد يعلم عنه أي شيء ومضى عام كامل ثم ظهرت نتيجة امتحانات الثانويه العامه وكانت المفاجأة السارة إذ كان يسري من العشرة الأوائل على مستوى الجمهورية والأول على محافظته وطار الخبر إلى طه الذي كاد يتيه فرحا عندما علم بتفوق يسري ثم أصبح كل تفكيره كيف يزور مصر حتى يكون بجوار يسري في هذه اللحظات وبالفعل طلب طه من صاحب العمل أن يستأذنه في اجازته قصيرة لمدة ثلاثة أيام ويعود بعدها وسأله صاحب العمل: إنت تبي تروح لحالك ولا مع ولدك " لأ أنا حنزل لحالي وأترك سعد عشان العمل ميتعطلش وكلها ثلاث ايام وتلاقيني هنا إن شاء الله " طيب تبي أي شيء " لأ يا خوي أنا نازل صد رد زي ما بنقول عندنا في مصر " طيب تصحبك السلامة " وبالفعل ركب طه الحافلة المتجهة إلى مصر وتم عبوره بسلام حتى وصل إلى الإسكندرية ثم استقل سيارة أجرة جماعية حتى وصل إلى بلدته ووصل إلى منزل شقيقته عزه وزوجها اللذان اقاما أفراح ووضعوا زينة كهربائية على واجهة



المنزل حتى يستقبلا المهنئون ودخل طه سريعاً إلى المنزل دون أن يلتفت لأحد حتى لا يلتفت إليه الأنظار وتم له ما أراد ولم ينتبه له أحد وعندما دخل إلى الدار وجد يسري جالسا في غرفته داعم العينين وعندما شاهد أباه قام إليه وهو يقول (أبا) ووضع طه يده على فمه وهو يشير بإصبع السبابة على فمه طالبا منه الهدوء حتى لا يشعر أحد بوجوده وقام باحتضانه وهو يقول: بتعيط ليه يا يسري بقي فيه حد يكون طالع الأول ويبكي " أيوه يابا بعيط عشان كان نفسي تكون معايا إنت وأمي الله يرحمها " ياه هو إنت فاكرك أمك الله يرحمك يا هند دي لو كانت عايشه كانت حتفرح بيبك بشكل لكن معلىش ده قضاء الله وبعدين تعالى هنا يا واد هو أنا مش مالي عنيك سايب شغلي ومالي ومحتالي وجيتلك مخصوص وأنت كده تقلبها نكد بدل ما تفرح معايا زي منا فرحان " يابا ده إنت الخير والبركه ده أسعد يوم في حياتي اللي الفاك جنبني في يوم زي ده " يا واد يا بكاش تعالى في حضني ده أنا والله اللي أسعد يوم في حياتي اليوم ده اللي رفعت راسي فيه " قولي يابا سعد عامل ايه لسه زي ماهو ولا بقي أهدى " والله يا بني من ساعة ما مشينا وهو ربنا هاديه ويا رب يبقى كده على طول قولي إنت بس عايز مني ايه هديه ابعتها لك وناوي على ايه " ناوي على ايه في ايه قصدك على الكليه يعني " آه على الكليه " شوف ياعم الاسطوانات أنا كنت علمي علوم ودي معناها طب إن شاء الله وخلي بالك أنا كده دخلت طب من غير تنسيق عشان من الأوائل " الف ميروك يا بني يعني حتبقى دكتور إن شاء الله ما شاء الله ما شاء الله يعني أنا كده حبقى أبو الدكتور يسري | لدكتور يسري طه تصدق يا واد لأ واد ايه بقى! تصدق يا دكتور يسري طه أسمك كده لايق صحيح الدكتور يسري طه لأ حلو " لأ وحقولك خبرين حلوين عشان تفرح اكثر " خبرين مره واحده طيب قول يا سيدي قول يا

دكتور يسري طه قولي كمان أخبارك الحلوه " هما خبرين يشبهوا بعض! أول خبر منهم إني حقابل السيد المحافظ بكره إن شاء الله " يا اه المحافظ مره واحده " آه استنى بس يابا اومال لو قاتلك حقابل مين كمان حتقولي ايه " هو فيه بعد المحافظ لأ طبعاً حتقولي ايه " حقولك يا بو الدكتور يسري أنا بعد بكره إن شاء الله حروح الوزارة عشان أقابل السيد الوزير كمان " مين!! السيد الوزير وزير إيه ده كمان " وزير التربية والتعليم يابا عامل مقابله عازم فيها كل الأوائل على مستوى الجمهورية وطبعاً أنا واحد منهم لأ وياه حبيعتلنا عربيه تاخدني من هنا لحد الوزارة وكمان حنطلع في التليفزيون ده غير كمان الجرائين (الصحف) اللي حتعمل معانا مقابلات والراديو كمان حيسجل معانا إيه رأيك بقى يا عم الاسطوات " عم اسطوات ايه ويتاع ايه ده إنت كده اللي عمي وعم البلد كلها ده لو الناس اللي بره دول عرفوا الكلام ده مش بعيد يشيلوك إنت والعربية من على وش الارض شيل! تعالى يا دكتور يسري في حزن أبوك ده إنت شرفنتي وشرفت البلد بحالها " وبينما هما على هذه الحال إذا بعزه شقيقة طه تدخل عليهما وهي تقول: إنت قاعد هنا وسايب الخلق اللي جاين يهنوك ده بدل متخرج تقعد معاهم!! الله ده مين ده طه اخويا طه " وأسرع إليها طه وهو يضع يده على فمها قائلاً: اسكتي يا عزه منفضحيناش ده أنا مصدقت دخلت من غير حد ما ياخذ باله مني وإنتي حتخلي اللي ما يشتري يتفرج علينا " طه اخويا الحمد لله إنك بخير يا خويا أهو كده بقى الفرحة بقت فرحتين تعالى في حضني يا حبيبي وقولي عامل ايه في غربتك اللي ما كانت على البال ولا على خاطر " الحمد لله يا ختي إحنا كويسين وبعدين مفيش غربه ولا حاجه ده احنا قاعدين ويا أخواتنا برضه ومحدش عارف ده يمكن اللي حصل ده عشان لينا لقمة عيش ناكلها في ليبيا وإنتي عارفه يا



ختي المثل اللي بيقول لقمة العيش بتنده صاحبها المهم إنتي  
 عامله ايه وأبو سيد عامل ايه " أبو سيد واقف بره أهو يستقبل  
 الناس اللي جايبين يهنوا يسري استنى اندهولك " أه بس من غير  
 ما حد يحس بينا أنا مش عايز حد يعرف إنني هنا " لهو إنت  
 عامل عمله مش عايز حد يعرف ده إنت سيد الرجاله ومحدث  
 له عندنا حاجه وإنت لازم تيجي تقف مع أبو سيد عشان الناس  
 تهنيك إنت يا خويا ده إنت صاحب الفرح الأصلي " يا ختي  
 اسمعي كلامي متناهديش معايا روعي اندهي جوزك هنا وأما  
 تيجي حفهمك كل حاجه يلا قوام " ايه اللي تشوفه يا طه حقولك  
 ايه يعني هو أنا حفهم احسن منك استنى دقيقه واندهلك أبو سيد  
 " وخرجت عزه ثم عادت سريعاً ومعها زوجها الذي ما إن  
 شاهد طه حتى أسرع إليه يحتضنه وهو يقول: أهو كده الكلام  
 أيوه كده أني قلت إنك لا ممكن تعرف إلا أما تيجي تعالى يا بو  
 نسب تعالى يا مشرفني إنت وابنك الدكتور إن شاء الله " حبيبي  
 يا بو سيد والله الواحد مش عارف يوذي جمالك دي فين "   
 جمالك ايه يا بو نسب ده احنا اللي متشرفين بيكوا والله هو أنا  
 في ديك الساعه أما اقول إن ابن أخو مراتي دكتور قد الدنيا  
 تسوى ايه دي بالدنيا وما فيها " تعيش يا خويا طول عمرك  
 إنت اللي مشرفنا ورافع راسنا الله يرحمك يابا كانت نظرته في  
 محلها فيك راجل طيب ومحترم ومجدع والعيبه عمرها معرفت  
 بقك " الله يرحمه ويحسن إليه ده هو كمان كان راجل كمل ايه  
 الله يرحم الجميع " قولي بقى يا بو سيد عايزني ابعتلك ايه من  
 لبيبا حلاوتك اللي طالباها " يا راجل عيب عليك ده أنا كنت  
 بنضحك معاك هو أنا حنعوز منك حاجه وده اسمه كلام ده كده  
 بيقى معناته إنك بتديني أجره على المحروس الدكتور يسري  
 وده لا ممكن يحصل أبدا " طيب خلاص أنا حتصرف واجيبلك  
 حاجه على ذوقى المهم دلوقتي زي ما فهمت عزه محدش يعرف

إنني جيت هنا " آه طبعا فاهم يا بو نسب وإنني فهمتها الحكاية دي لكن نقول ايه بقى في أختك اللي عايزاك تفرح بابنك " لأ خلاص هي حتفهم لوحدها بس بقولك ايه بعد المعازيم دي متمشي أنا حاخذ بعضي وامشي أنا كمان على اسكندريه عشان أركب بكره الصبح وأرجع على شغلي من غير ماحد يحس بينا فاهمني " آه طبعا فاهم " وهكذا مضت الليلة وتم تنفيذ عودة طه إلى خارج البلد كما خطط لها.

خرج طه متسللا من بلدته كما وصل إليها دون أن يشعر به أحد واتجه من فوره إلى الإسكندرية ليبيت فيها ليلته ثم يستقل في الصباح الحافلة المتجهة إلى ليبيا وتم له ما أراد وبالفعل تم مغادرته مصر دون أي مساءلة من أحد حتى وصل إلى الأراضي الليبية وعاد إلى عمله وهو يمني نفسه بأن كل شيء سوف يكون على ما يرام وفي اليوم التالي وصلت إليه إحدى الصحف وبها صورة لقاء يسري مع المحافظ وفي اليوم الذي يليه جاءت الصحف وفي صدرها عنوان رئيسي عن أوائل الثانوية العامة الذين قابلوا وزير التربية والتعليم وكانت واحدة من الصور في صدر الصحف تحمل صورة يسري وهو يصافح الوزير واحتفظ طه بتلك الصحف حتى يشاهدها كل الزملاء الذين يعملون معه وكان هذا هو اليوم الرابع لعودته إلى ليبيا ثم حدث في مساء نفس اليوم مكالمة هاتفية من أبو سيد لطه وكانت هذه المحادثة: الويا بو نسب الحقني إنك يسري واخدينه المركز بيحققوا معاه " هما مين اللي واخدينه ويحققوا معاه إنني أنا الدكتور يسري " آه هو واللي بيحقق معاه البوليس " ليه بيحققوا معاه ليه هو كان عمل حاجه ولا عمل حاجه " لأ دولم بيحققوا معاه بخصوص موضوع سعد القديم اللي بالي بالك " طيب وهما عرفوا طريقه إزاي ماهو بقاله بيجي سنه ونص عندك ومحدث جه ناحيته " ماهو أنا سألت في الموضوع ده



الصول عبد العزيز صاحبي مانت عارفه وقالى إن التصاوير بتاعته مع الوزير والمحافظ هي اللي عرفت الواد اللي انضرب من سعد مكان يسري وهو أول ما شاف يسري في التلفزيون عرفه على طول وبلغ عنه " آه أهو ده بقى اللي الواحد كان خايف منه بس مش عامل حسابه طب والعمل يا بو سيد " متخافش يا بو نسب أنى سألت محمود المحامى ابن أبويا سالم وقالى هو معلاهش حاجه وحيسيويه بس بعد ما يقر عليكوا وهما يعنى مش عايزين غير سعد " وبعدين فى الورطه دي اللي مكانت على البال " متخافش يا بو نسب إن شاء الله حيطلع منها بس أنا قلت نبلغك عشان تبقى عارف اللي بيحصل أول بأول ومترجعش تقولى مقلتلش ليه " طيب إنت كده لازم تبغنى اللي بيحصل أول بأول " آه اومال طبعاً ابلغك بس يرضك أنى بنقولك اطمئن وحط فى بطنك بطيخه صيفى " وانتتهت المكالمه وفى اليوم التالى قام أبو سيد بالاتصال ببطه ليخبره بأن يسري أخلى سبيله بلا أى ضمان وأن الموضوع قد انتهى عند هذا الحد وبعد مضي ستة أشهر كان فيها يسري قد التحق بكلية الطب وسعد كان قد أقتنع بأنه يجب أن يتقن مهنة أبيه ويصبح اسطى حداد مسلح وهو ما كان يسعى إليه بكل قوة ثم حدث أن أنتقل العمل إلى مكان آخر لأن عملهم فى هذا الموقع انتهى بانتهاء إنشاء القواعد والأعمدة الخرسانية مع بقاء بعض زملائهم فى العمل حتى استكمال البناء والتشطيبات وفى مساء أحد الأيام جاءت مكالمه هاتفية من أحد الزملاء فى الموقع القديم يخبرهم أن أحد رجال الأمن قد زارهم فى الموقع وسأل عن سعد وطه ولما علم بمغادرتهم الموقع سأل عن وجهتهم وإلى أين ذهبوا ولما كان الزملاء لا يعرفون شيئاً عن سعد تطوع أحدهم أن يخبر رجل الأمن بمكان عملهما على أن يذهب إليهما فى صباح اليوم التالى لأن الدوام قد انتهى فى ذلك الوقت وبعد هذه المكالمه

الهاتفية أيقن طه أن الخناق يضيق عليهما وقرر أن يضحي بكل شيء وياخذ إبنه ويحاول أن يهرب به وبالفعل جمعا بعض الملابس والطعام وهما لا يعرفان إلى أين الوجهة القادمة وأثناء فعل ذلك صحا سليمان وانتحى بطنه جانباً وهو يقول: على فين يا سطي إنت ماشي وسايينا ولا ايه " معلش يا سطي سليمان غصب عني والله لولا الشديد القوي على عيني إني اسبيكوا " الله طيب ليه هو فيه حد زعلك مننا وبعدين إنت ماشي ازاي كده في انصاص الليالي " سييني أمشي الله لا سيينك الوقت ضيق ومش عارف ممكن حد يطب علينا دلوقتي " حد مين ووقت ايه متفهمني ايه الموضوع يا سطي " طيب اقولك بس تعالى الأول نمشي من هنا واقولك واحنا في الطريق " وخرج طه وسعد بصحبة سليمان في سيارته النصف نقل التي ينقل بها أدواته وبعض العمال ثم اتجهوا بعيدا عن المنزل وفي الطريق قص طه نص المكالمة الهاتفية التي تمت وأنه متأكد أن هناك خطر محقق بسعد وبه هو ايضا وظل سليمان يستمع وهو في حالة صمت تام وتفكير عميق كيف يحل تلك المعضلة ثم هداه تفكيره إلى أن يقول: أسمع يا خويا الحكاية دي ملهاش غير حل واحد مفيش غيره " حل ايه الله يكرمك قولي ده أنا زي الغرقان اللي بيتعلق في قشه " الحل إن إبنك يسلم نفسه هنا في ليبيا وهما عندهم حاجة اسمها ديه يدفعها للواد اللي جرحه في مصر ويخلص نفسه بقى من الحكاية دي لأنه مش حيقضيها هروب طول الوقت ومصيره يقع لا قدر الله إنما كده مينفعش قولي كده انتوا حتروحوا فين ولا تعملوا ايه " طيب يا ريت ترسي على الدية ندفعها ونخلص بس ايه اللي يضمننا إن الموضوع يخلص كده يعني نفرض إن الواد مرضيش بالديه بيقى سعد كده راح في شربة ميه " لأ إن شاء الله يرضى لأن الشرطة والقضاء هنا مبيحبوش حاجة اسمها حبس وكل حاجة عندهم بيحلوها بالفلوس

وبيضغظوا على صاحب الحق عشان يرضى ده حتى لو حد قتل  
 قتيل برضه بيدفع الديه وتنتهي الحكاية لحد كده " أبوه الكلام ده  
 صحيح لو الواد ليبي لكن احنا عندنا قوانين تاني والواد ممكن  
 العند يا خده وميرضاش بالديه ساعتها إيه العمل وكده طبعا  
 الشرطة هنا حتسلمه عشان يتحاكم في مصر " مش عارف  
 اقولك ايه بس أسمع أنا عندي فكره تانيه لحد منفكر نعمل ايه  
 بالظبط " فكرة إيه " أنا بقول أنا ليا جماعة بلدياتي بيشتغلوا في  
 مدينة امساعد على الحدود ممكن ابعتك عندهم منك تبعد عن هنا  
 ومنك تشتغل برضه لحد منشوف حد بي فهم في القانون الليبي  
 ويقولنا نعمل ايه بالظبط قلت إيه " قلت لا إله إلا الله وحده ده  
 كده جمالك كترت قوي والواحد مش عارف يردها إزاي "   
 يعني موافق " الأمر لله من قبل ومن بعد حقول ايه طبعا موافق  
 بس انتوا ذنبكوا ايه لده كله " يا عم خليها على الله ومتكبرش  
 الموضوع أنا حديك عنوان بلدياتنا وتأخذ بعضك على طول  
 على هناك وأنا حكلمهم أما ارجع الحوش وبالنسبة للشرطة  
 متقلقش يا سطى ربنا يقدرني واتصرف معاهم طريق السلامة  
 انتوا دلوقتي " وهكذا أخذت حكاية طه وسعد منحنى جديد لا  
 يعلم أحد إلى أين المصير؟ ودع طه وسعد سليمان وتوجها إلى  
 أبناء بلدة سليمان في مدينة امساعد على الحدود مع مصر وبعد  
 نحو الساعتين وصلا إلى العنوان الذي أعطاه سليمان لطه  
 وكانت الساعة قد تجاوزت الثالثة صباحا واسقط في يد طه إذ  
 كان لا يدري ماذا يفعل في مثل هذا الوقت وهل من المناسب أن  
 يطرق الباب على هؤلاء الناس الذين لا يعرفونه ولا يعرفهم  
 وماذا يظنون فيه إذا فعل ذلك وبينما هما واقفان على الباب إذا  
 بالباب يفتح وبطل منه أحد الأشخاص ويقول: أبوه يا اخ عايز  
 حاجه " آه كنت بسأل عن حوش الأخ ممدوح قريب الأسطى  
 سليمان " آه هو إنت بقى الأسطى طه اتفضلوا اتفضلوا ده لسه

سليمان واد عمي مكلمني اديله ساعة عنكوا بس انتوا عوقتوا ليه كده " لا والله معوقناش ولا حاجه ده يا دوب مسافة الطريق ومعلش بقى إننا جايينلك في وقت زي ده ومتقولش قلة ذوق مني " يا خبر يا سطي ده اللي بييجي من طرف سليمان نشيله جوه عنينا وانتوا باين عليكوا ناس طيبين وولاد حلال اتفضلوا يا جماعه الحوش حوشكم " الله يكرمك يا اسطي..؟ " ممدوح إسمي ممدوح " عاشت الاسامي يا سطي ممدوح وده إبني سعد " لأ متقوليش ده شكله كده بيان أخوك أوعى تقولي إنك اتجوزت وإنت عندك ست سنين " لا والله ده إبني بس هو اللي رجليه شايله شويه اومال تقول إيه بقى لو عرفت إن له أخ كمان أكبر منه بسنتين " كمان ما شاء الله مش باين عليك والله يا سطي طه قولي بقى الأهم انتوا اتعشيتو ولا على لحم بطنكم " الحمد لله اتعشنا في العربيه واحنا جايين كنا واخدين معانا أكل وبعدين كده من غير مؤاخذه إنت بس تدلنا على مكان نومتنا عشان كفاية عليك قلق لحد كده " يا سيدي ولا قلق ولا حاجه تعالوا اتفضلوا ناموا في اوضتي الليلة دي لحد بكره إن شاء الله ننظم العملية من تاني عشان الناس اللي جوه كل واحد يعرف مطرحه " طيب متشكرين يا عم الاسطوات تصبح على خير " وهكذا بات طه وولده في أول ليلة في مدينة امساعد وهو يشكر الله على المساعدات الغير متوقعة وهو الذي كان منذ ثلاثة ساعات لا يدري ماذا يفعل وإلى أين يذهب وبعد عدة سويغات استيقظ طه وابقظ سعد وهو يقول: ايه ده دا باين الجماعة سابونا نايمين وخرجوا والواحد مش عارف يعمل ايه يعني لا اعرف لهم طريق موقع ولا نعرف نشترى حاجه ناكلها دي برضه عمله تعملها فينا يا ممدوح " ولا يهكم يابا أنا أخرج استقصى أي حاجه لحد مايجوا " تخرج إيه يا فالج هو أنا أقدر اسبيك تروح أي حته لوحدك استنى بس نتشطف من تراب السفر

وبعدين يحلها الحلال " طيب أنا شايف طبق متغطي أهو ومعاه خبزه بص كده يابا " يا بني ميصحش نشوف حاجة مش بتاعتنا وبعدين حد عارف ده فيه ايه ده كمان " طيب استنى يابا ده فيه ورقه جنبه اهي مكتوب فيها من بعد صباح الخير ده فطاركوا يا سطفى طه لحد مانيجي وربنا يحلها ونجيب معانا أكل متشيلش هم حاجة " الله يسترك يا ممدوح إنت وسليمان واخواته والله الواحد فعلا مش عارف يودي جمائل جابر كمان فين اللي عرفنا بناس مجدع زي دي " وجلسا يتناولان طعام الإفطار وبعد أن أكلا وشربا واغتسلا ثم عاودا النوم من إرهاق السفر استيقظ طه على صوت جماعي ميز من بينهم صوت ممدوح الذي ما إن شاهده إلا وعرفه على باقي الرجال الذين يبيتون ويعملون معه ثم بعد ذلك قال: أنا مرضيتش اصحيكوا وقلت النهاردة براءة وبكره إن شاء الله تكونوا معانا في الشغل ولا عندك رأي تاني " لأ يا سطفى عداك العيب ده كده فل قوي " ومر هذا اليوم وفي اليوم التالي ذهب طه وولده للعمل الجديد وقاما بعملهما على أكمل وجه وبعد مرور أسبوع اتصل سليمان بطه هاتفيا وهو يقول: بص بقى يا عم طه الشرطة فعلا جم وسألوا عليك وعلى سعد والمهم إحنا توهاهم وقلنا منعرفش عنك حاجة واننا صحينا ملقناش حد منكم وقعدوا شويه يحققوا مع كل واحد فينا وأنا كنت فطمت حسين ومحمد ورسيتهم على الحكاية كلها من طقطع لسلاموا عليكوا ولما لقوا كلامنا كله واحد أقولك الحق مطولوش وسابونا ومشيووا " طيب الحمد لله إنها جت على كده متشكرين يا عم سليمان " متشكرين ايه بس وبتاع ايه استنى أما أقولك الأهم " هو فيه أهم من كده طب قول " أه فيه بقى أنا سألت في موضوع سعد ده محامي ليبي عشان نعرف حنعمل إيه " أه يا سطفى وقالك إيه " يا سلام لو صبر القاتل على المقتول كان مات لوحده " معلش يا سطفى أنا من لهفتي مش قادر أصبر اتفضل

قول " شوف يا سيدي قالي إن مفيش اتفاقية تسليم مجرمين بين مصر وليبيا وبكده محدش يقدر يعمل حاجة لو القضية انتظرت قدام القضاء الليبي يعني لو القضاء الليبي حكم بالديه يبقى حكمه ساري على سعد والواد الثاني المصري ولو الواد قبل الحكم تبقى اتحلت وكده يبقى حكم نهائي ملوش طعن ولا استئناف " طيب وفي حالة الواد مقبلش الحكم ايه الحل " ولا حاجة ببسلموا الديه للسفاره المصرية هنا وبعدين محدش يقدر يطلب سعد عشان يتحاكم في مصر إنما المشكلة فين بقى لو سعد نزل مصر قبل خمستاشر سنة ممكن يتحاكم هناك تاني لكن لو عدت المده يبقى خلاص أهمهم في العش ولا طارت " والله منا عارف اعمل ايه لكن على العموم إنت ربنا يباركلك ويحفظك تاعيينك معانا استنى بس عليا كام يوم ادورها في دماغي وأرد عليك متشكرين يا سطفى سليمان جمائلك دي كلها على راسي " يا عم جمائل إيه بس ده سعد زي ولادي وأنت أخويا يعني الحكاية واحد ولا ايه " آه طبعا بس برضه إنت عملت اللي ميعملوش أخ لأخوه " طيب خلاص أنا مستتي منك تليفون تقولي رسيت على ايه وأنا تحت امرك أي وقت نشوف المحامي ده ونشوف نحلها ازاى ماشي يا سطفى " خلاص ماشي سلام " ومضى يومان على هذه المحادثة وفي اليوم الثالث خرج سعد من صلاة الجمعة مع أبيه وطلب منه أن يتركه يتنزه قليلا لأنه منذ يوم وصوله إلى الأراضي الليبية لم يشاهد سوى مواقع العمل فقط ورفض طه في بادئ الأمر طلبه ولكن تحت إلهام سعد اضطر للموافقة ولكن بعد تنبيهه منه لسعد أن يعود مبكرا ولا يحتك بأي أحد ووافق سعد على العودة إلى المنزل في موعد أقصاه ثلاثة ساعات ومضى الوقت المحدد ولم يعد سعد ومرت الساعات التالية بطيئة جدا ولا يعرف طه ماذا يفعل حتى خرج هو وكل الزملاء للبحث عنه في السوق المجاور وبعد بحث مضني لم





يستطع العثور عليه ثم سار كالمجنون يسأل عنه الناس في الشوارع وأي مكان يحتمل أن يكون قد تواجد فيه حتى كانت المفاجأة؛ ظل طه وزملاؤه يبحثون عن سعد طيلة أكثر من ساعتين حتى صادف طه أحد المصريين وعندما سأله رد عليه هذا المصري قائلاً: أه من قيمة أربع خمس ساعات كان فيه خناقه لرب السما هنا وكان فيها واحد ليبي واثنين مصريين واحد منهم كان ماشي في حاله وبعدين شاف الخناقه اتحشر فيها وبعدين هو اللي اتعك فيها يا عيني عليه والمصري الثاني شاف الشرطة جايه خد بعضه وخلع والغلبان الثاني اللي ولا له في الطور ولا الطحين هو اللي اتاخذ في الرجلين " طيب ممكن تقولي يا اخ شكله ايه اللي اتاخذ ده " يعني أنا ملحقتش اشوف كويس بس هو شاب كده قول عنده اثنين وعشرين تلاته وعشرين سنة " طيب أوصافه ايه بالله عليك حاول تفكر يعني طويل قصير تخين رفيع أي حاجه زي كده " لأ هو كان تخين شويه وقصير ملحقتش أشوفه وهو بيجري " بيجري إنت قصدك على اللي هرب " أه اومال إنت قصدك ايه " لأ يا أخينا أنا قصدك على اللي اتمسك " آاه اللي اتمسك آاه ده برضه كان نفس السن بس بقى طويل وعريض وحاجه كده تملى العين تقولش بتاع مصارعه " يعني لو وريتك صورته ممكن تعرفه " أه ممكن عشان ده حتى كان صعبان عليا وعلى كل اللي شافوا الخناقه من الأول " وأخرج طه حافظة نقوده ومنها أخرج صورة حديثة لسعد وقدمها إلى الشاهد وهو يتضرع إلى الله أن لا يكون سعد هو المقبوض عليه وناولها إليه وهو يقول: هو ده ولا " ايوووه هو ده برافو عليك إنت تعرفه " وتلاشى الأمل الذي كان طه يتعلق به وشعر بدوار شديد واستند على ذراع محدثه وهو يقول: أه ده إبني ربنا يستر عليك يا سعد " متخافش يا خويا هو معملش حاجه اكثر من إنه كان بيحوش بين اللي

بيتخانقوا لكن الثاني بقى هرب وساب إبنك يدبس فيها يعني ممكن يسيبوه عشان معملش حاجة المهم بس الشاب الليبي يطلع جدع ويقول الحق " ولو مقلش الحق إبنى أنا يلبسها " ربنا يستر إنت تشوفلك محامي قبل الحكاية متكبر وتروح تطلعه من الشرطة ويا دار مدخلك شر يلا روح بقى ربنا يستر عليك وعليه " وقف طه حائرا لا يعرف كيف يتصرف وبعد دقيقتين وجد أمامه ممدوح وهو يسأله: يا ترى عرفت حاجة عن سعد " أه عرفت الواد واقع في مصيبه وربنا يستر عليه عموما أنا اللي غلطان اللي سبته يمشي لوحده " مصيبة إيه كفى الله النسر ماله عمل إيه " الواد اتحشر في خناقه ملوش فيها واتاخذ في الرجلين ومش عارف اعمل إيه أنا دلوقتي " يا عم طه بسيطة أنا أعرف واحد محامي كويس نزوحه يطلعه على طول متقلش " مقلش ازاي إنت مش عارف حاجة ده ممكن كده يترحل على مصر ودي تبقى مصيبه تانيه " يا عم ولا مصيبه ولا حاجة خليها بس على الله ده يا ما دقت على الراس طبول تعالى معايا بس نزوح للمحامي ده ونشوف نحلها ازاي يلا يلا " وذهب طه مع ممدوح إلى الصديق المحامي والذي لم يتوانى لحظة في تقديم المساعدة والذهاب إلى الشرطة حتى يتمكن من إخراج سعد وبالفعل ذهب المحامي إلى الشرطة وبالاطلاع على محضر الواقعة وجد أن هناك اتهاماً صريحاً من الشاب الليبي ضد سعد يتهمه فيه بالاعتداء عليه وضربه وتمزيق ثيابه وهو ما تم إثباته في محضر الواقعة وعبثاً حاول المحامي إقناع الشرطة بعدم صحة الواقعة طبقاً للإتهام ولكن دون جدوى وقرر المحامي أن يتجه اتجاه آخر للحل فذهب إلى عنوان الشاب الليبي محاولاً التفاهم معه حتى يتنازل عن شكواه وبعد محاولات مضنية منه وذكر أن ما فعله هذا الشاب لا يرضي الله وأن والد سعد مستعد لأي ترضية وافق الشاب الليبي علي التنازل عن المحضر وذهب

الجميع إلى مقر الشرطة مرة أخرى لتقديم التنازل وبعد أن تم ذلك طلب المحامي الإفراج عن سعد ولكن كانت الشرطة قد علمت بالقضية المتهم فيها سعد بالاعتداء على زميله المصري منذ عامين مضيا وكان قرار الاستبعاد من الأراضي الليبية وترحيل سعد إلى مصر على أن يتم تسليمه إلى رجال الأمن المتواجدين بالمنفذ الحدودي لإتخاذ اللازم بشأنه وبالفعل تم تسليمه في اليوم التالي صباحا واسقط في يد طه الذي لم يستطع فعل أي شيء للإفراج عن ولده وقرر طه الرحيل هو الآخر إلى مصر حتى يرى ماذا يستطيع أن يقوم به من أجل الإفراج عن سعدوهكذا كانت مفارقات القدر أخوين أحدهما متفوق في دراسته وله مستقبل باهر وتميز والآخر يبدو أنه يسير في طريق الضيا عتم ترحيل سعد إلى القاهرة مكبلا بالقيود الحديدية إلى مديرية أمن القاهرة وهناك تم ترحيله إلى قسم الشرطة الذي حدثت واقعة الاعتداء في نطاقه حتى يتم التحقيق في الواقعة مرة أخرى بحضور المتهم واستكمال الإجراءات القانونية اللازمة حيا له وفي قسم الشرطة وجد سعد نفسه في عالم آخر جديد عليه تماماوفي اليوم التالي تم عرضه على ضابط المباحث الجنائية المكلف بالتحقيق في الواقعة ووقف سعد أمامه والضابط يتفحصه بنظره وكأنه يضم له شيئا ثم أمر الضابط بكف القيد الحديدي من يديه وطلب منه الجلوس أمامه وهو يقول: بقى إنت بقى سعد اللي مدوخنا بقالك سنتين إنت عندك كام سنة يله " عندي سبععاشر سنة وشهرين يا باشا " ياه بقى البغل اللي أنا شايفه قدامي ده سبععاشر سنة بس إنت بتكذب يا ض ولا ايه " والله يا باشا مبكذب هو ده سني " بسم الله ماشاء الله هي أمك كانت بترضعك إيه يا ض وإنت صغير " رد سعد بعين دامعة عندما ذكرت أمه أمامه: أمي الله يرحمها ماتت بعد مولدتي على طول دي حتى مشافنتيش " تصدق يا ض صعبت عليا طيب



بس أمسح دموعك كده وخليك راجل إنت أكلت ياض " لأ يا باشا من امبارح الضهر محطيتش لقمه في بطني " طيب خلاص أنا حجيبك تاكل عشان بس متقولش إننا ناس وحشه بس على شرط تحكي لي كل اللي حصل منك بالتفصيل وازاي ضربت الواد زميلك بالمطوه " وقام سعد بسرد الحكاية كلها منذ البداية حتى وقوفه ملوحا بالمطواة في وجه الطالب مالك المطواة الأصلي وإنه لا يعرف من الذي دفعه من الخلف فراحت المطواة تسبب جرحا قطعيا في وجه ذلك الطالب وأنه لم يقصد أي اعتداء ولكن الصدفة وحدها هي من وضعته في هذا الموقف وكان الضابط يستمع إليه باهتمام وهو يتفحص جسده الرياضي ثم بعد إنتهاء سعد من شرح ملابسات الحادث ظل الضابط صامتا لفترة من الوقت حتى قطع هذا الصمت دخول أحد أفراد الأمن حاملا معه العديد من الساندويتشات وقدمها إلى سعد الذي طلب الضابط منه تناول الطعام ونهض الضابط من مكتبه وذهب إلى النافذة لينظر منها إلى المجهول تاركا سعد يا كل ثم بعد انتهاؤه من الطعام قال له الضابط: قضيتك دي أنا ممكن اخرجك منها بس بشرط واحد مفيش غيره " شرط إيه يا باشا أنا مستعد أعمل أي حاجة عشان أخرج من الحكاية دي " متخافش الحكاية بسيطة خالص المطلوب منك سهل جدا وكمان حتستفيد منه " يا باشا أنا من إيدك دي لايدك دي " أسمع ياض إنت بقالك كده سنتين بره حتتك منطقتك يعني وحتتك دي داخل منطقة اختصاصي يعني أنا المسئول عنها أي حاجة تحصل فيها تبقى تبقي فاهمني ياض " أه فاهم يا باشا بس أنا دخلي إيه بالكلام ده " دخلك إيه إنت حتستعبط ياض ولا إيه شكلك كده حتتعبنى معاك وتلاوعي وأنا اكثر حاجة بكرها الملاووعه " لأ يا باشا والله إنت بس قولي عايز إيه مني بالظبط عشان افهم وحتلاقيني من إيدك دي لايدك دي " اللهم طولك يا روح ماشي



أنا حفهمك او مال بس عامل مفتح وبتفهم وبتعرف تضرب الناس بمطوه ماشي يا سعد بص يله إنت ساكن في حي شعبي مش كده " آه تمام " أهو الحي بتاعكوا ده كله لبش وكل البلاوي موجودة فيه يعني ايشي مخدرات ايشي سرقة ايشي ناس ماشيه شمال فهمت قصدي ولا لسه " لحد كده فاهم يا باشا بس تقولي بقى إيه المطلوب مني " المطلوب منك حاجه بسيطه جدا إنك تكون عيني في منطقتك دي يعني دبة النمله تكون عندي أي حاجه كبيره ولا حتى صغيره لازم أعرفها أول بأول فهمتني يا روح امم لأ بلاش نخليها روح أبوك احسن " طيب بسيطه يا باشا " لأ مش بسيطه يا حبيبي ده إنت لازمك دخله تدخل بيها على أهل حتتك عشان منها تعرف تدخل على الناس الشمال هناك " طيب ودي نعملها ازاي يا باشا " دي بقى شغلتي أنا بس خلي بالك أي غلطه منك برفبتك يا روح أبوك سيبني بقى اوضباك كل حاجه " طيب والقضية يا باشا " مالها القضيه ده مش شغلك إنت ده شغلي وأنا عارف ازاي اطلعك منها ولا تحب اغرزك فيها " اللي تشوفه يا باشا يعني أنا كده حبقى الراجل بتاعك ومش حترضالي البهدله " حلوه منك ياض الراجل بتاعي مانت بتقول كلام كبير أهو تصدق ياض عجبنتي شكلك كده حبيبي منك ونظرتي حطلع في محلها " ربنا يخليك يا باشا أنا تحت امرك وقولي بس اللي يريحك وأنا أعمله " طبعاً اللي يريحني ولو تعبنتني حتعبك جامد فاهمني ياض " آه يا باشا ربنا ما يجيب تعب " طيب خلاص إنت ترجع تاني دلوقت الحجز لحد ما نظبط الحكايبه واوعدك أنها تخلص على بكره بالكثير بس اشوفك متعاون معايا وإنت تبقى ملك في حتتك خلاص يا سعد " اللي تشوفه يا باشا " امين عادل تعالى خد القمر ده وخلي بالك منه عشان ده كده بقى تبغنا يعني محدش من الزباله اللي تحت دول بييجي جنبه فاهم " أوامرك سعادتك " واقتاد الأمين عادل

سعد إلى زنزانة الاحتجاز وفي نفس الوقت كان طه يحاول معرفة مكان سعد حتى يرى إن كان يحتاج إلى محامي أو إلى طعام وأشياء أخرى وظل طه يبحث عن سعد حتى أخبره أحد أمناء الشرطة في مديرية أمن القاهرة أن سعد قد تم ترحيله إلى قسم الشرطة الموجود بالمنطقة التابع لها وذهب طه إلى قسم الشرطة محاولاً أن يرى سعد ولكنه لم يتمكن من ذلك لأن كانت هناك توصية من ضابط المباحث بعدم تواصل سعد مع أي أحد من أهله حتى يتم السيطرة عليه وتنفيذ ما يريد الضابط ومضى طه إلى منزله في الحي بعد أن عرف مكان سعد وقرر أن يحاول التواصل معه في اليوم التالي وما إن دخل طه المنزل إلا وصادف في وجهه جارته أم أحمد التي ما إن رأته إلا وضربت صدرها بيدها وهي تقول: مين لأ مش معقول ازيك يا بوي يسري عاش من شافك يا خويا ازيك كده وازي ولادك " الحمد لله يا ست أم أحمد كلنا بخير " طيب والله ليكوا وحشه ده حتى الست أم سعيد كمان من ساعة ما مشيت ولا حس ولا خبر هو فيه حاجه يا خويا كفى الله الشر " متشوفيش وحش يا ست أم أحمد وربنا ما يسينك في إبنك أبدا ده بس سعد في القسم ومش عارف اوصله " قسم!! قسم إيه كفى الله الشر وبيعمل ايه في القسم " وبدأ طه يقص عليها الحكاية كلها إلى أن أخبرها أنه لا يستطيع أن يتواصل مع سعد بالرغم من معرفته بمكانه وهنا أخبرته أم أحمد أن أحد رجال الشرطة يسكن بالقرب منهم وأنه من الممكن أن يجد لهم حلاً ويجعل طه يطمئن على سعد ثم قام طه بالذهاب إلى رجل الشرطة هذا في منزله فلم يجده وأخبرته زوجته أنه في نوبة العمل وإذا أراد أن يتواصل معه عليه بالذهاب إلى قسم الشرطة للسؤال عنه ولما كان الوقت قد تأخر قرر طه أن يذهب مبكراً في صباح اليوم التالي حتى يقوم بهذه المحاولة وبالفعل توجه طه إلى القسم وتعرف على (المساعد) الصول إبراهيم

وعرفه بنفسه وأنه جار السيدة أم أحمد وهي التي طلبت منه أن يذهب إليه ورحب الصول إبراهيم بطه وقال له أنه مستعد لأي خدمة يقوم بها من أجل عيون السيدة الطيبة أم أحمد فطلب منه طه رؤية ابنه والحديث معه فطلب إبراهيم إمهاله بعض الوقت حتى يرى ماذا يستطيع أن يفعله ثم تركه وذهب ثم عاد بعد حوالي ثلث الساعة وهو منكس الرأس ويهزها يمناً ويسرة ثم قال: معلش والله كان بودي اخدمك بس الموضوع أكبر مني لأن سعادة ضابط المباحث موسي إن مفيش حد يزور سعد ولا يشوفه لحد هو مايقول " طيب والحل إيه دلوقتي أنا كنت عايز اطمن عليه وكمان ابعثله أكل وفلوس عشان يعرف يتصرف يعني " لأ ده حتى الأكل حضرة الضابط منعه كمان عن سعد الظاهر إنه موضوعه كبير لكن أنا حاول أدخله أكل من جهتي بس اشوف مين النبطشي اللي عنده واتصرف " أه والنبي ربنا يخليك ده الواد ياعيني بقاله يومين مكلش حاجه " لأ خلاص روح إنت بس وسيبها على الله ثم عليا وربنا يحلها من عنده " ورحل طه بعد أن شكر المساعد إبراهيم وقال له الأخير أنه سوف يمر عليه في المنزل حتى يطمئنه على سعد وأن الأمور تسير بشكل جيد وبعد نحو ساعة استدعى ضابط المباحث سعد من الاحتجاز وهو ينيبه على الأمين عادل أن لا يعرف احد أي شيء يخص سعد حتى يخبره بعكس ذلك وجاء سعد لمقابلة الضابط وهو يجر قدميه جراً وعندما شاهده الضابط على هذا الحال قال: مالك يا بوا السعود إيه مش قادر تمشي ليه فيه حد عمك حاجه هنا قولني بس وأنا أقطعك رقبتك " مفيش يا باشا بس أنا أصلي على لقمة امبارح والواحد حيموت من الجوع " يا حبيبي بس كده حاضر ابعت اجيبك تاكل وتكرر مشهد الأمس وأرسل الضابط ليحضر الطعام لسعد الذي أصبح يتعامل معه الضابط مثل الحيوان الأليف يجوعه حتى يستطيع السيطرة

الكاملة عليه وبعد أن تناول سعد الطعام والضابط ينظر إليه حتى يرى أثر خطته على سعد وعندما انتهى سعد قال له الضابط: ها شبعت ولا ابعت اجيبك تاني قول متكسفش " لأ ده كده الحمد لله قوي أنا كنت فين وبقيت فين " طيب مش عايز أي حاجه تاني " ربنا يكرمك يا باشا " طيب شوف بقى أنا جالي خبر مش حلو عشانك ومرضيتش أقوله عشان مسدش نفسك على الأكل " خبر إيه يا باشا "؟ الواد اللي إنت ضربته مش عايز يتنازل عن القضية وطبعاً ده حيليك تدخل في دوامه متخرجش منها وبصراحه بقى أنا مستخسرك في البهله اللي حتجرك " بس يا باشا إنت وعدتني إن الحكاية دي حتخلصها بمعرفتك " آه أنا وعدتك اخلك من الإجراءات القانونية لكن الواد ده مش عارف اعمل معاه ايه لكن على كل حال أنا حعرف برضه أتصرف معاه واخليه يتنازل وإلا بقى يبقى هو الجاني على روحه " إزاي يا باشا " وبعدين!!! إحنا مش اتفقنا إن أنا حتصرف بكره بالكثير إن شاء الله احلها " طيب يا باشا إنت كنت قتلتي إنك حتعمل دخله ادخل بيها على أهل منطقتي ممكن اعرف حدخل عليهم ازاي " تاني يا سعد أسمع يا له كل وقت وله أذان نخلص بس من المصيبة بتاعتك دي وبعدين يحلها ربنا لكن اظمن كل حاجه مترتبة هنا " وأشار الضابط إلى رأسه " ماشي يا باشا اللي تشوفه سعادتك " أأيوه كده هو ده الكلام اللي عايز أسمعك منك أنا بحب الراجل بتاعي يهاودني ويسمع كلامي من غير يتعيني معاه " وأنا زي ما قلت لسعادتك أنا من إيدك دي لايدك دي " تمام يا سعد هو ده اللي عايز أسمعك منك ها قولني بقى فيه حد من المقاطيع اللي تحت ضايقتك في حاجه " متخافش يا باشا أنا مش هفيه عشان حد يضايقني ده اللي يقرب من خيالي اطحنه " يا واد يا جامد تطحنه مره واحده طيب خلي بالك بقى من نفسك عشان أنا اللي حايشهم عنك ولو



سبتهم عليك ياكلوك لحمه نيه دول مش زي الهفأ اللي تعرفهم ده اقل واحد فيهم عامله كام جنايه بس برضه عجبنتني يا ض أنا بحب الواد اللي قلبه ميت زيك كده " يا باشا إنت كده مش مقدرني كويس طيب تلاته بالله العظيم أنا ممكن اسيحك دمهم كلهم بعون الله " ماشي يا سعد خلينا نشوف حنعمل إيه بقى في الأهم منهم!! إنت محتاج أي حاجة قولي متكسفش " لأ يا باشا بس بالله عليك متنسانيش ثاني في الأكل احسن أنا كنت واقع من الجوع " آه تصدق يا له فعلا اللي في سنك وحوش في الأكل كانت غايبه عني فين عموما متقلفش أنا حليلهم يدخلوك كل الأكل اللي إنت عايزه خلاص يا سعد فيه حاجة ثاني " ربنا يخليك يا باشا إنما معلىش يعني ممكن سؤال اخير " قول يا سعد إيه عايز سجاير ولا إيه " سجاير إيه بس يا باشا أنا مليش في التدخين والحمد لله لأ أنا عايز اسأل حضرتك يعني إسم حضرتك إيه "؟ ضاحكا: هو فيه حد ميعرفش إسمي طيب مسألتنش ليه أي حد كان قالك أنا مين " لأ ماهو أما اعرف منك احسن " آه أنا مسميني عفريت الداخلية لكن إسمي الحقيقي محمد بيه دراز " عاشت الاسامي يا محمد باشا أهو كده اعرف اقول إيه " إنت حتصاحبني يا له ولا اقولك بكره تعرفني كويس وتعرف بتكلم مع مين!! يا امين عادل خد القمر ده رجعه الحجز وبرضه توصي عليه محدش بييجي ناحيته عشان ده يخصني ده إيه " يخص سعادتك يا فندم أوامرك " وعاد سعد إلى غرفة الاحتجاز بعد أن أكل وشبع وهو يسأل نفسه! ماذا يريد منه محمد بيه دراز!! وبعد مرور حوالي ساعة ونصف وجد المساعد إبراهيم ينادي عليه وهو يقول: مين اللي إسمه سعد هنا " أنا يا حضرة الصول " طيب تعالى قرب من النضاره (فتحة موجودة بباب الزنزانة) " أبوه يا حضرة الصول نعم " أبوك بعنلك الأكل ده وبيقولك اطمئن هو مش حيسيبك وحيشوفلك محامي معاك وإن شاء الله

تطلع منها براءة " ربنا يخليك يا حضرة الصول ممكن تبلغ أبويا رساله مني " أه طبعاً يا بني قول اللي إنت عايزه وأنا ابغاه " قوله ميفلقش قوله سعد والطابط محمد بيه دراز منفاهمين وسعاده حيطلعني منها ولا يكلف نفسه محامي وبكره إن شاء الله اكون معاك يا عم طه " ايه ده إنت وصلت لمحمد بيه!! طيب خلي بالك من نفسك بقى " يعني ايه يا حضرة الصول " لأ يا بني مفيش حاجه أنا بقولك بس عموماً أنا حبلغ أبوك الراجل الطيب ده وكمأن أنا معاك طول النبتشيه مش حسبيك لو عايز تقولي أي حاجه قولها لي على طول ماشي يا سعد يا بني " ربنا يخليك ليا يا حضرة الصول إنت باين عليك راجل طيب هو بس اللي قلته مفيش حاجه ثانيه " طيب يا سعد سلام دلوقت " وبعد حوالي خمسة ساعات وجد سعد من يستدعيه مرة أخرى لملاقة محمد بيه دراز ولما اصطحبه إلى مكتب ضابط المباحث وجده يتحدث هاتفياً مع أحدهم وهو يقول: بص الواد ده تفهمه إن مجاش أتنازل حالا أنا حلبسه مصيبه ميخرجش منها فهمه كده قدامه ساعة زمن يكون قدامي بيتنازل وإلا بشرفي ليشرف هنا هو كمان ووقعة أمه سوده حخليه يندم إن أمه ولدته خلاص فهمت حتقوله إيه! أيوه كده ثم وضع محمد دراز سماعة الهاتف وهو ينظر إلى سعد قائلاً: سمعت يا سعد الواد آل إيه مش عايز يتنازل آل!! طيب يخليه راجل كده ويصمم على موقفه وشوف أنا جعل فيه ايه " أه يا محمد باشا يعني فيه أمل إنه يتنازل " فيه أمل!! طبعاً إن مكنتش أنا حسلمهولك تحت تروقه لحد ماهو اللي يطلب الصلح والتنازل هو أنا يخلصني حد من رجالتني مخلوق يبص له بعين رضيه ده أنا أعمل فيه اللي متعملش قبل كده " تعيش يا محمد باشا يعني أنا كده بقيت من رجالتك خلاص " ياض إنت من اول ماشفتك وقلت في نفسي الواد ده شكله راجل ويسد معايا ولا إنت شايف ايه نظرتني في محلها ولا حتكسفتني مع

باقي الرجاله " معاش اللي يكسفك يا باشا أنا رقبتي سداده ده لو على موتي ده كفاية اللي سعادتك عملته معايا لحد دلوقتي " أهو هو ده اللي أنا منتظره منك رقبتك أنا عايز رقبتك " ايه يا باشا إنت عايز تموتني " اموتك ايه يا حمار أموت حد من رجالتني أنا بقول يعني أنا عايز الراجل بتاعي ميهموش أي حاجه حتى لو جت على رقبته فهمت " أه يا باشا وإن شاء الله اكون عند حسن ظنك بيا " حلو اوي تعالی بقى يا شاطر افهمك على الدور وارسيك على كل حاجه عشان نبقى على نور " تحت أمر معاليك يا محمد باشا " بص بقى يا بني حتسمع كلامي حخليك ملك المنطقة بتاعتك دي كلها ومحدش يقدر يرفع عينه فيك مش حتسمع هه مقولكش بقى " لأ وعلى أية يا باشا ده زي مبقول لسعادتك أنا من إيدك دي لايدك دي " أه كده تبقى حبيبي وزي مبقولك إنت حتخش على أهل حتتك وإنت حامي الحمى الواد اللي مجابيتوش ولاده " ازاي يعني " يوووه إنت شكلك كده مش حتجيبها البر يا واد أسكت شويه ومتستعجلش أنا حقولك على كل حاجه بص يا سيدي إنت حتدخل منطقتك وحتلاقي فيها واد شمام بلطجي بيرمي بلاه على أهل حتتك وعامل عليهم فرده اتاوه يعني واللي ميدفعش بيقى هو الجاني على روحه دكانته تولع عربيه طابيشه تدغدغها له حد من عياله يجراه حاجه حاجات زي كده يعني " أه يا باشا طيب ايه حضرتك مش بتقبض عليه " مفيش فايده فيك يا بني أسكت لحد ما خلص كلامي بقى الواد اللي بقولك عليه ده واحد من رجالتني وفي حمايتي نظير إنه بيجيبلي معلومات محدش يعرف يجيبها غيره وفي نفس الوقت كاسر عين أي حد عايز يعمل كبير في الحته وبكده كله تحت السيطرة وعارف كل كبيره وصغيره قبل متحصل " طيب يا محمد باشا أنا دوري إيه في الحكاية دي ماهو حضرتك مستف الحكاية ومش محتاجلي " ده مين اللي يقول



الكلام ده أنا ولا إنت " لأ طبعا يا باشا حضرتك طبعا " طيب كويس قوي إنك فاهم إني أنا اللي بسوق افهمني بقى متخلنيش اقولك يا حمار تاني بقى الواد عطيه البلاطجي ده شمام فعلا وشكله كده البودرة لحست عقله ده من ناحية ومن ناحية تانية الواد حس نفسه كبير علينا ومفيش على الحجر غيره وأنا بقى قلت ادبه بيك حتقدر ولا نشوف غيرك " لأ يا باشا أنا قدها وقودو بعون الله بس قولي إيه المطلوب مني بالظبط ورقبتي سداده " حاجه بسيطه إنت حتدخل قهوة المعلم معاطي حتلاقي الواد ده عامل شغب وإنت بقى تتصرف معاه بمعرفتك " ايه ده يا باشا عايزني أضرب الرجل بتاعك " أه وعلقة موت كمان منه يتربى ومنه إنت يبقى لك شنه ورنه في المنطقة كلها وصيتك يسمع قلت إيه حتقدر ولا نشوف غيرك " يا محمد باشا ده لا هو ولا عشره زيه يا خدوا في أيدي غلوه وأنا بقيت راجلك خلاص " الله ينور عليك اهو كده الشغل أستعد بقى يا بطل عشان نعملك الفرشه التمام النهاردة بالليل " طيب فيه شغلانه كده أنا خايف منها " إيه شغلانه ايه " أنا خايف عشان أبويا موجود في الحته ولو شم خبر حيخلي وقعتي سوده أب بقى وخايف على إبنه صح ولا أنا غلطان " تصدق يا ض طلعت بتفكر كمان يعني مش عضلات بس! بس أنا عامل حساب أبوك متخافش " ازاي يا باشا " أبوك حبيبي ضيف عندي هنا في مكتبي لحد متخلص الشغلانه وبعد كده كمان مش حذليه في الحته كلها وكده يبقى ملكش حجه ولا كبير غيري " لأ يا باشا متفقتاش على كده أبويا لأ أنا مرضالوش الأذى حتى لو كانت رقبتي تغور في داهيه الراجل ده استحمل كثير مني ومش ده يبقى جزاؤه " يا ض بطل هبل أهلك ده هو أنا قلت ولا جيت سيرة اذيه ده حتى قتلتك حبيبي ضيف عندي في مكتبي نشرب قهوه مع بعض لحد متخلص قلت إيه " بتكلم جد يعني وعد منك

يا باشا مفيش أذى " لا إله إلا الله هو نقول طور تقول احلبوه  
يقولك ايه أصرف نظر بقى عن الحكاية كلها وأنا حشوف حد  
غيرك ينفذ وأنت كمان تنفذ الحكم اللي عليك وبلاش قرف " لأ  
لأ بالهداوه يا باشا أنا كل اللي عايزه اطمن على أبويا وأدام قلت  
إنه حيبقى ضيف عند سعادتك أنا موافق " طيب ماشي كده تمام  
قوي! إنت بقى حتروح مع الأمين عادل بيته ترتاح الساعتين  
الجايين ويرسيك على الدور كله وتاكل لقمه وتستعد لليلة ماشي  
يا بطل " أوامرك يا محمد باشا " أهو كده الكلام أمين عادل!  
تعالى خد الباشا ده وترسيه على كل حاجه زي مافهمتك وقبل  
الساعة تمانيه تكونوا عند قهوة معاطي ومش عايز حد يلمحك  
معاه فاهم " أوامر سعادتك يا فندم " أه كده فاضل مين أه يا  
حضرة الصول إبراهيم تعالى عندي حالا " أوامرني سعادتك "  
إنت عارف طبعا اللي إسمه طه أبو الواد سعد ده " أيوه يا باشا  
" عايزه حالا دلوقتي في مكتبي هنا " وده اجيبه لسعادتك منين  
دلوقتي " أسمع يا عم إبراهيم إنت راجل كبير ومش عايز اقولك  
بلاش استعباط أجري حالا دلوقتي تقب وتغطس والاقيه هنا فاهم  
يا حضرة الصول " حاضر يا فندم أروح وعلى الله الاقيه وهكذا  
ذهب إبراهيم للبحث عن طه وفي نفس الوقت ذهب سعد مع  
الأمين عادل إلى منزله حتى ينفذ جانبه من خطة الضابط محمد  
دراز وبعد حوالي ساعة من الزمن عاد إبراهيم ومعه طه الذي  
كان لا يدرك أي شيء من اتفاق الضابط مع سعد ودخل إلى  
مكتب الضابط يكاد القلق أن يعصف به وعندما دخل طه إلى  
مكتب الضابط أخذت عيناه تجول في المكان بحثا عن ولده  
وأدرك الضابط ماي جول في عقل طه فبادره قائلا: أقعد يا طه  
أنا عايز أتكلم معاك كلمتين وبس متخافش من حاجه بس تسمع  
الكلام عشان الأمور كلها تمشي من غير زعل منك ولا منى  
ماشى "؟ خير يا حضرة الظابط ربنا ما يجيب زعل هو سعد

حصله حاجه " لأ من ناحية سعد أنا عايزك تظمن خالص أنا إن شاء الله خالص حكايته كلها بمعرفتي ويمكن كمان تحضرني وأنا بخلصها " طيب سعادتك باعتلي ليه هو أنا مقبوض عليا ولا حاجه " وبرضه من الناحية دي عايزك تظمن ولو إني المفروض اقبض عليك عشان إنت اللي هربت سعد بره مصر رغم إنك عارف إنه عمل جريمة وده إسمه تستر على مجرم ومحاولة عرقلة العدالة وطبقا للقانون إنت كده شريك مع سعد " يا باشا طمني بس على سعد الله يكرمك وبعد كده اعملوا اللي انتوا عايزينه إن شالله تشفقوني حتى " لأ مش لدرجة الشنق بس أنا عايزك تتعاون معايا لحد منطلع إبنك من المصيبة اللي هو واقع فيها " قوي قوي يا باشا قولي إيه المطلوب مني وأنا أوعدك بشرفي إني انفضه على طول ولو على رقبتي " حلو اوي شكلنا كده حنتفاهم بص يا طه إنت زي مبقولك إنت متهم زيك زي سعد وأنا بعت للواد اللي سعد جرحه ويمكن يوافق على التنازل ويمكن كمان ميوافقش إحنا بقى نعمل ايه لو موافقش " أه يا باشا نعمل ايه " لأ أنا بتكلم علينا إحنا حراس العدالة رجال الشرطة أنا أقولك المفروض إني اقبض عليك لكن بصراحة أنا بعد ما عرفت ظروفكم كلها بصراحة انتوا صعبانين عليا وعايز اخدمكم " أنا مش فاهم حضرتك قصدك ايه ولا ايه المطلوب مني " لأ المطلوب حاجه بسيطه جدا إنك تختفي من حتكم لمدة يومين تلاته لحد منعرف الواد ناوي على ايه وأنا بقول إنك تاخذ بعضك وعلى بلدكم حالا لحد منخلص الحكاية دي قلت إيه " قلت اللي تشوفه يا باشا المهم عندي مصلحة إبنك ومش مهم أي حاجه تانيه حاضر أنا بكره الصبح من النجمه أسافر البلد وربنا يسترك على اللي عملته معايا ومع سعد " لأ العفو يا طه ده سعد أما عرفت حكايته كلها بعنبره زي إبنك وبعدين أنا بقولك إنت مينفعش تبات النهاردة في المنطقة عشان الواد زمانه جاي ومش

عايز حد يلمحك ويقول ده موجود أهو أما نقبض عليه فاهمني يا طه " اللي تشوفه يا باشا يعني أمشي أنا دلوقتي أسافر بس طيب أوصل البيت أجيب شنطة هدومي وأسافر على طول " حتى ده لأ وبعدين هدومك أهى أنا خليتهم يجيبو هالك ولو تحب كمان اخليهم يوصلوك بعريية الشرطه لحد محطة القطر عشان ابقى مطمئن عليك " حاضر يا باشا أنا ماشي أهو على طول بس أنا عايز اطمئن على سعد ربنا يخلي سعادتك وبعدين أمشي على طول " لأ اطمئن سعد زي الفل ومش ناقصه اي حاجه ومينفعش تشوفه لأنه مش هنا " مش هنا!! اومال فين بس ده كده حاجه متطمئنش " وبعدين معاك يا طه!! أه أنا كده فهمت ده على كده سعد مش جاييه من بره ده إنت وابنك تقولش فوله واتقسمت " معلىش يا باشا الضنا غالي برضه وبعدين الواد ده اتربى يتيم ومش حبقى أنا والزمان عليه يا ريت بس حضرتك تبرد قلبي وتقولي هو فين أشوفه قبل ما أمشي " معلىش يا طه مش حقدر أنفذ لك طلبك ده ويلا بقى من غير مطرود لأن كل دقيقه إنت قاعدها معايا هنا فيها خطر عليك وعلى إبنك زي ما فهمتك قلت إيه " قلت حاضر يا باشا أنا مقدرش اكسر لمعاليك كلمه أنا حاخذ حالي ومحتالي وامشي حالا زي ما معاليك طلبت " وهكذا ترك طه المنطقه وسافر إلى بلدته تنفيذاً لقرار محمد دراز ونعود إلى سعد الذي كان قد نال طعاماً شهياً واستحم بعد أن ظل الأمين عادل يلقنه ماذا سوف يفعل ثم قال له: بص يا سعد أنا لحد كده جبت أخري معاك الباقي بقى عليك إنت بعد ماترن عطيه ده العلقه المتينه أكيد المعلم معاطي حيروقك ويديك الفرده اللي كان بيدفعها لعطيه وعايزك بقى متنساناش وتخليني في فكرك على طول " بس كده غالي والطلب رخيص ده إنت بعد اللي شففته من كرمك عليا أنا مستعد لأي طلب تطلبه مني " ماشي يا معلم سعد " معلم سعد حتة واحدة " أه معلم سعد ومش

عايزك تخلي حد يا خد عليك عايزهم يخافوا منك بس متنسانيش يا معلم سعد " ماشي يا عم عادل ده أنا عنيا ليك " طيب يلا بقى احسن الوقت أرف ومش عايزين نوصل متأخر عشان تحضر الفيلم من أوله " فيلم إيه هو احنا حنروح السياما " لأ يا سيدي أنا بتكلم على فيلم العركه اللي حتعملها مع عطيه مش عايزين نتأخر عليها عشان الترتيب يمشي صح " ماشي يا عم عادل أنا جاهز يلا بينا " وهكذا مضى سعد بصحبة الأمين عادل إلى منطقته التي تركها منذ ما يقارب الثلاثة أعوام وعندما وصلا قال عادل: أنا لحد كده مهمتي انتهت ومجد بيه مش عايز حد يشوفني معاك يلا بقى وريني الهمة ومتخافش أنا حكون جنبك حتلاقيني في ضهرك على طول ماشي يا سعد " خلاص يا عم عادل اتأخر إنت بس وسيلي الحكاية وأنا حخلصها لك بعون الله " قد القول يا سعد يلا بقى وريني الهمة " وتقدم سعد إلى مقهى المعلم معاطي وهو يتلهف على خوض المعركة الفاصلة بين حياته السابقة وحياته المستقبلية وعندما دخل المقهى وجد أن كل شيء يسير على ما يرام ولكن المعلم يجلس في حالة اضطراب وينظر بطرف عينه إلى أحد أركان المقهى وعندما تطلع سعد إلى ما ينظر المعلم وجد رجلاً يجلس وهو يمد قدميه مستنداً بمرفقه على طاولة حديدية يتم تقديم المشروبات عليها وبجانبه عصا غليظة تستخدم في القتال بدون أسلحة حادة وطاولة أخرى عليها بعض المشروبات المتنوعة وجلس سعد بالقرب من المعلم حتى يكون على أهبة الاستعداد لمواجهة عطيه إذا فكر في قتال معاطي أو بمعنى أدق الاعتداء عليه " ظل سعد جالساً يترقب الموقف وهو يجول ببصره بين معاطي وعطيه (هذه هي سخرية القدر) الأسمين متشابهين ولكن شتان بين الجاني والضحية! ولم يطل انتظار سعد إذ قام عطية في اتجاه المعلم وأثناء قيا مه ارتطمت قدمه بالمنضدة المعدنية التي





تحمل المشروبات فتطايرت وانسكبت على بعض المتواجدين في المقهى وكان من بينهم سعد الذي اعتبرها فرصة ذهبية حتى يقوم بتأديب عطيه فقام من فوره إلى عطيه وهو يقول بصوت جهوري: مش تفتح يا حمار " إنت بتقول لمين ياض الكلام ده " بقولهولك إنت مش تفتح ماشي كده زي الأعمى وبعدين كمان مش عاجبك " طيب غور بقى ياض من قدامي قبل مخلبك حنتين إنت باينك جديد هنا ومش عارف بتكلم مين " بكلم مين يعني واحد جريان وكمان قليل الأدب وعايز اللي يربيه " هلا هلا هلا هلا وإنت بقى ياض اللي حتربيني ده إنت كده شكلك ملعوب في عداد عمرك وأنا حخليهولك يصفر دلوقتي تعالى يا ه " لأ وأنت الصادق نهايتك كده شكلها على أيدي النهاردة تعالالي إنت " وهنا أمسك عطيه بالعصا واران أن يهوي بها على رأس سعد الذي انتبه لما يريد عطيه فقفز من مكانه بسرعة فهوت العصا على أحد المناضد الخشبية فهشمتها وأمسك سعد بمنضدة حديدية حتى يتخذها درع مقابل العصا وتواجه الخصمان أحدهما يلوح بالعصا والآخر بالمنضدة وهنا فكر عطيه في حيلة أخرى فرفع عصاه وكأنه يريد إصابة رأس سعد وبسرعة كبيرة هوى بها على ساق سعد الذي لم يتمكن هذه المرة من تفاديها وشعر بالألم شديد في ساقه ولكنه أستمر واقفاً فنظر إليه عطيه نظرة تعجب وقال: لأ ياض جامد بس يا ترى حتستحمل كام ضربة مني إنت كده فاضلك واحده كمان ويلموك في شوال " وإنت الصادق إنت اللي حيلموك في الزباله يا زباله " إنت لسه فيك نفس تتكلم طيب خد دي بقى هديه مني " وهوى بعصاه على الساق الأخرى لسعد الذي أسرع بوضع المنضدة أمام العصا ومنع عطيه من تحقيق مأربه وفي هذه اللحظة سمع سعد من يناديه من خلف عطيه ويقذف إليه بجنزير حديدي غليظ من الذي يستخدمونه البحارة في ترسية السفن في الموانئ فتلقفها

سعد وبدأ هو الآخر يلوح بالجنزير في وجه عطيه الذي قام برفع عصاه مرة أخرى واراد أن يهوي بها على صدر سعد من الجانب الأيمن ولكن بحركة سريعة من سعد تمكن من استخدام الجنزير واقتلاع العصا من يد عطيه وأصبح عطيه بلا سلاح مقابل سعد الممسك بالجنزير وهنا انحنى عطيه بسرعة ليخرج مطواة من ساقه اليسرى ولكن كان سعد بالمرصاد فهوى بالجنزير على رأس وكتف عطيه الذي تلقى الضربة ووقع على الأرض وحاول النهوض بسرعة ولكن سعد سرعان ما هوى بالجنزير على ساعد عطيه الذي وقعت المطواة من يده نتيجة هذه الضربة ولم يتوانى سعد في الإجهاز عليه بعدة ضربات متتالية حتى انبثقت الدماء من أنحاء متفرقة من جسد عطيه ورأسه ولم يستطع النهوض من مكانه فتقدم منه سعد ووضع قدمه فوق رأس عطيه وهو يقول: ها ايه رايك بقى عرفت إنك زباله يا زباله " وغمغم عطيه بصوت هامس: لأ جامد يا ض يلا بقى اقتلني عشان أنا لو فضلت حي أنا اللي حقتلك يلا يا ض بسرعه خلصني " أقتل مين أنا موسخس أيدي بزباله زيك " ثم قام بالبصق عليه وهو يجول ببصره في المقهى حتى يرى أثر مافعله على كل الموجودين وعلى المعلم فهاله أن المقهى يكاد أن يكون فارغاً من الزبائن الذين كانوا يملأونه قبل لحظات هي عمر المعركة ووجد المعلم معاطي وهو ينظر إليه بإعجاب شديد ثم تقدم منه وهو يقول: تسلّم ايدك يا بو الرجال أهو كده الرجاله بجد " ثم أخذه المعلم من يده واجلسه وهو يقول للنادل الذي يعمل معه اتصل بالاسعاف عشان يبجي يشيل اللي مايتسمى ده والبوليس يبجي يعمل معاينه عشان محدش يقول إننا عملنا فيه حاجه وكمان تشهد مع الراجل ده إن عطيه هو اللي بدأ بالضرب وإن البطل ده كان بيدافع عن نفسه يلا يا مختار بسرعه مستني ايه " حاضر يا معلم " وبعد دقائق معدودات



حضرت الشرطة وعربة إسعاف وكان بداخل سيارة الشرطة الضابط محمد دراز الذي عاين الموقعة وبدأ في استجواب الشهود الذين اقرروا جميعاً بكلام معاطي ثم قام باستجواب سعد أمام المأى والذي قام بدوره بسرد ماحدث فقام الضابط باصطحابه إلى سيارة الشرطة وجلسا داخل السيارة وبدون أن ينظر الضابط إلى سعد قال: لأ رجل يله ده إنت دغدغته بس خلي بالك أنا كان نفسي تخلص عليه عشان ده لو فضل صاحي ممكن يحاول يقتلك " إحنا متفقناش على القتل يا محمد باشا إحنا قلنا علفة موت وهو فعلا بينه وبين الموت خطوه واحده: طيب كنت تتم جميلك وترичه من العذاب ولا اقولك زي بعضه خليه يتعذب زي ما عذب ناس كثير " المهم عجبتك يا باشا " آه عجبتني بس خلي بالك لولاي ابرضه كان ممكن تكون إنت مكانه " ازاي بقى يا باشا وأنا اللي عملت كل حاجه " لأ مش كل حاجه قوي إنت لولا الجنزير اللي جالك هديه كان ممكن يموتك الشامم ده " إيه ده هو إنت اللي ٠٠٠ " لأ واحد من رجالي ولا إنت كنت فاكِر إني ممكن اسيبك في حالتك دي وإنت مش عارف حتواجه مين وطبعاً كان لازم احميك ولا إنت فاكِر إني ممكن أفرط في الرجل بتاعي ٠٠ " تشكر يا باشا بس إنت عرفت منين إني بلعب بالجنزير " من السابقة بتاعتك يا فالج هو مش الواد اللي إنت ضربته كان مسك مطوه وإنت بالحزام وغلبته أهى دي زي دي " آه الله ينور عليك يا باشا لأ بجد حكومة محصلتش " وله إنت حتاخذ عليا ولا إيه خلاص يا روح أبوك أنزل بقى وأرجع للمعلم ده زمانه مستنيك على نار واحنا كده سويناه تمام وخلي بالك حيعرض عليك فلوس عشان تحميه تقبلها منه فاهم " طيب واجيبها لسعادتك " تجيب إيه يا حمار دي تاخدها هديه مني ليك وخلي بالك فيه غيره كمان حيعرض عليك فلوس عشان تحميهم وبرضه حلال عليك " طيب اقولهم إيه بالنسبة لقعدتي مع



سعادتك دي يعني اقولهم كنت بتكلمني في إيه كل ده " لأ اظمن محدش حبسالك إلا لو إنت عايز تقولهم!! يعني ممكن تقولهم إني كنت بعيد استجوابك وطلبت منك الحضور للقسم بكره الصبح عشان نقفل المحضر خلاص يا سعد " ماشي يا باشا طيب والواد الثاني ده جالك ولا لأ " واد مين آاه قصدك بتاع قضيتك لأ بص بقى إنت ملكش دعوه بحاجه خالص وإنت تحت حمايتي ومحدش يقدر يبصلك بنص عين حتى ماشي يا قمر " اللي تشوفه يا باشا ماشي " وترجل سعد من السيارة عائداً إلى المقهى الذي اكتظ بالرواد الذي دفعهم الفضول لمعرفة ما حدث إلى شغل كل المقاعد بل ووقف البعض في مجموعات وهم يتحدثون عن هذا البطل المجهول الذي قام بعملية انتحارية ضد بلطجي كان يجعلهم في حالة من الهلع وكانت سيرته وحدها كفيلة بهروب الجميع من المكان المزمع تواجده فيتهتدم سعد إلى معاطي الذي هب واقفاً في استقباله وهو في غاية السعادة وهو يقول: أهلاً أهلاً سيد الرجاله نورت القهوه تعالى يا مختار شوف السبع يشرب إيه " أوامرني يا باشا تشرب إيه " لأ ملوش لزوم هاتلي بس كوباية ميه ساقعه " لأ مية إيه روح يا مختار هات كل المشاريب اللي عندك وهو ينقي منها اللي هو عاوزه يلا يا مختار إنت لسه واقف " أمرك يا معلم " ها قولي بقى متأخذنيش يعني هو إنت منين وكنت جاي لمين لو مفيهاش تطفل مني يعني " أنا منين؟ أنا من هنا دي حتتي " حتتك إزاي أنا عارف كل الموجودين في المنطقة كلها " آه بس متعرفنيش أنا عشان كنت مسافر وأنا صغير شويه يمكن شكلي اتغير " طيب قولي فطمني إنت ساكن فين ومع مين " شوف يا معلم معاطي أنا حختصر المسألة كلها أنا بقى أبقى ابن الأسطى طه حداد المسلح " الأسطى طه ابو يسري " أبو يسري آه وأنا أخو يسري " لا مؤاخذه يا بني بس أنا عارف أبوك راجل طيب

ومحترم وفي حاله ومعرفكش لا إنت ولا أخوك إنما عارفين أبوك اللي كل الحته بتحلف بأخلاقه وانتوا طول عمركوا في حالكوا ومفيش حد منكم بيقعد على قهوه " أه صح يا معلم طول عمرنا في حالنا قوي بس يمكن ربنا بعنتي ليك عشان اخلاصك من الشامم ده " قصدك البلطجي ده عطيه " عليك نور بس من النهاردة مفيش حاجة اسمها عطيه تاني خلاص بح " أنا مش فاهم قصدك يعني ايه خلاص قصدك إنه مش راجع هنا تاني " لأ خلاص ده بعد العلقه المتينه اللي خدها مش حيوربكم وشه ده إذا فضل عايش من أصله " يا رب يا سبع يسمع من بقك ربنا طيب ولو رجع تاني ايه الحل " حيلاقيني في انتظاره والمره دي مش حيقوم منها تاني " أه يعني إنت قصدك انا " ايه مش عايز تقولها ليه!! أيوه إنت وكل أهل الحته بقتوا في حمايتي " طيب وإنت يا بني حتقدر على شوية البلطجية دول " إيه مش مالي عينك ولا ايه يا معلم " لأ مش مسألة تملى العين ده إنت باللي عملته تملى عين التخين بس أنا مش عارف اقولك ايه " تقول لا إله إلا الله " محمد رسول الله ماشي القول قولك أشرب بقى اللي إنت عايزه على ما أوصل لحد البيت فوق واجيلك حالا " ماشي يا معلم اتفضل " وقام معاطي بالخروج من المقهى مهرولا ثم انعطف يساراً ثم صعد الدرج قاصدا شقته في نفس المبنى الذي فيه المقهى ثم عاد بعد أقل من خمسة دقائق وهو يحمل في يده كيس من البلاستيك اسود اللون وبداخله شيء غير معروف ثم دفع بالكيس إلى سعد وهو يقول: بص بقى يا سعد يا بني دي كده هديه بسيطه مني صحيح متساويش اللي إنت عملته لكن النبي قبل الهديه وإنت طبعاً مش حتكسفني " ما عاش اللي يكسفك يا معلم بس يا ترى ايه الهديه دي قال ذلك وهو يسحب الكيس البلاستيك من أمام المعلم ويضعه تحت مرقفه دون أن يفتحه " أبدا ده مبلغ صغير مش قد المقام كنت مجهزه عشان

أجدد رخصة القهوة لكن بعد اللي عملته يا مجدع إنت أولى بيه  
" ماشي يا معلم مقبوله منك " طيب قولي يا بني ولو فيها رزاله  
مني في السؤال " اسأل ولا يهملك " معلش يعني هو إنت بطولك  
حتقدر على عطيه ده هو والمقاطيع اللي معاه " مقاطيع!!  
مقاطيع مين بالظبط " أهو كده كان كل حين ومين يبجي ومعاه  
راجل ولا اتنين عشان يرموا بلاهم علينا وأشكال بعيد عنك اللي  
واحد بشله في وشه واللي واخذ مطوه في دراعه يعني حاجه  
كده تقرف " طيب تمام وإنت بقى شايل هم اللي بتقول عليهم  
دول " أنا شايل الهم عشانك انت عشان شايفك كده بطولك ولا  
إنت معاك رجاله تانيه " ملكش فيه يا معلم إنت ليك إن محدش  
يقربك لا إنت ولا أي حد تاني محتاج حمايتي " خلاص اللي  
تشوفه يا مجدع وبص بقى إنت تسييني الليله دي وبكره باذن  
واحد احد تجيني بالليل نكون اتلمينا أنا ورجالة الحته اللي كان  
المدعوق ده عامل علينا فرده ونتفق إن شاء الله عشان نطلعك  
حقك قلت إيه " قلت لا إله إلا الله يا معلم ماشي اجيبك بكره " لأ  
إنت تقعد معايا تاخذ واجبك كامل أنا حبعت اجيبك عشا نتعشى  
سوا كفته من عند نو نو قلت إيه ولا تحب اجيبك حاجه تانيه "  
يا اه هو لسه نونو ده عايش ده يا ما أبويا كان بيحكي عنه " ها  
قلت إيه " ماشي يا معلم عشان يبقى عيش وملح " الله ينور  
عليك أهو هو ده الكلام 'وتناول سعد الطعام مع معاطي الذي  
كان يبالح في الاحفاء بسعد وكان كابوساً قد انزاح عن صدره  
ولم يترك سعد إلا بعد أن قام بكل واجبات الضيافة معه ثم بعد  
ذلك ترك سعد معاطي متجهاً إلى منزله وكانت كل الشرفات في  
المنازل المجاورة للمقهى تطل منها النساء وهن تطلعن إلى  
البطل المغوار الذي خلص المنطقة من بلطجة وتحرش عطيه  
بهن وكانت أصوات الزغاريد تدوي متواصلة وكان صداها  
يسمع في المنازل المجاورة حتى وصل سعد إلى منزله وعندما



دخل من باب المنزل وجد أمامه جارتهم السيدة أم أحمد تقف وهي ترحب به قائلة: أنا قالولي ومكنتش مصدقه بس طلع الكلام بجد ولولا الملامه كنت حضنتك ده إنت بسم الله ماشاء الله بقيت راجل تملى العين إسم النبي حارسك وصاينك تعالى يا سعد تعالى ادخل " ازيك يا ست أم أحمد " ست أم أحمد أخص عليك يا سعد يا واد قولي يا خالتي زي مكنت بتقولي ولا كبرت عليا " ما عاش ولا كان اللي يكبر عليك يا خالتي إنتي عامله ايه وازاي اخويا الكبير أحمد " الحمد لله بس تعالى الأول ادخل ده أنا عايزه اتكلم معاك " معلش يا خالتي الوقت متاخر والصبح رباح وأنا عايز استريح اوعدك الصبح قبل ما اروح هنا ولا هنا اخبط عليك إنتي الأول " ماشي يا سعد ولو إني زعلانه منك لكن أطلع يا حبيبي أرتاح وعلى قولتك الصباح رباح " وصعد سعد إلى شفته وهو يشعر باننشأ وزهو الذي فاز في أول معركة حقيقية غير التي كان يخوضها وهو صغير وظل سعد بعد أن تمدد على سريره ينظر بعين مفتوحة إلى اللا شيء وهو يجتر شريط ذكرياته في المنزل وكل ما حدث له طوال حياته منذ أن وعي على الحياة وحتى قيام المعركة بينه وبين عطيه كل ذلك مضى كالحلم أمام عينيه وظل يتقلب محاولا النوم ولا يستطيع حتى الساعات الأولى من صباح اليوم التالي، صحا سعد من نومه بعد أن غلبه النعاس لمدة لا تزيد عن ثلاثة ساعات وارتدى ثيابه سريعاً وهو ينتوي الذهاب إلى محمد دراز حتى يعلم منه من هم الذين يعاونون عطيه في الاعتداء على الناس الذين لا يدفعون الاتاوات وبينما هو يهبط الدرج وجد أم أحمد في مواجهته والتي قابلته قائلة: صباح الخير يا سعد إيه إنت ناوي تمشي كده من غير ما تعدي على خالتك أم أحمد " لأ إزاي يا خالتي صباح الخير أولاً أنا أهو كنت نازللك قبل مروح مشوار مهم لحد القسم " مشوار إيه تاني كفى الله



الشر " لا أبدا ده ضابط المباحث كان قالي امبارح بالليل إني اعدى عليه الصبح عشان ياخذ اقوالي في المحضر عشان اللي حصل امبارح ده يعني " أهو ده اللي أنا عايزاك فيه بالضبط! ممكن بقى تقول لخالتك إيه اللي حصل " أبدا ده موضوع بسيط وراح لحاله واحد كان عامل فرده على الناس وفتح صدره ومفيش حد عارف يلمه لحد ما حظ أمه المنيل وقعه في سكتي أهو خد الطريحه وخد اللي فيه القسمه " ينهارك مش فايت يا سعد إنت إيه يا بني اللي عملته في نفسك ده لهو إنت فاكرا أما تقف في وش عطيه الشمام إنه حيسيبك كده ولا تكونش فاكرا إنه حينسهالك ويعديها لأ طبعا ده مفيش حد يعرفه قدي " حيعمل ايه يعني أهو مرمرى زي الكلب الجربان بين الحياة والموت ولا يمكن يفوق من العلقه دي قبل سنه على الأقل " طيب خليك فاكرا إني نبهتك وقتلك عطيه ده زي الجمل مبينساش تاره أبدا " خليها على الله يا خالتي!! معلش بس استأذنيك عشان الضابط مستنيني وبعدين ليينا كلام ثاني مع بعض " طيب روح يا سعد ربنا معاك عشان اللي جاي إنت مش عارف عملت ايه في نفسك " وذهب سعد مسرعا إلى قسم الشرطة حتى يجد اجابات عن أسئلة حائرة تدور في ذهنه وعندما وصل وجد المساعد إبراهيم في ردهة القسم وعندما شاهده إبراهيم قال: أهلا وسهلا بالبطل اللي مجابتنوش ولاده إيش إيش إيش لأ راجل وابن راجل يا سعد وعرفت تكسر اللي ما يتسمى المخفي عطيه " إيه ده هو إنت عرفت يا عم إبراهيم " آه طبعا عرفت هو لو أنا معرفتش اومال مين اللي يعرف ده على رأي المثل من الباب والشباك رايح جاي وراك يعني حعرف من القسم أو من الحته " طيب يا عم إبراهيم هو محمد باشا موجود ولا لسه مجاش " والله يا بني أنا لمحتة موجود بس معرفتش إذا كان لسه موجود ولا طلع في مأمورية عموما أطلع شوفه بس خلي بالك أنا بقولك أهو الباشا



بتاعنا ملوش عزيز وخليك فاكر إني نبهتك وقانتاك " هو إيه الحكاية هو كل حد النهاردة يقولي خلي بالك وأنا نبهتك! ماشي ياعم إبراهيم سلام طيب " وصعد سعد إلى غرفة المباحث ووجد محمد دراز يجلس على مكتبه وهو يضع يديه متشابكتين خلف رأسه ويبيسط جسده بالكامل إلى الخلف والذي ما أن شاهد سعد إلا وبادهه بالقول: هو سعادتك شرفت مالمسه بدري يا سعادة البيه " فيه ايه بس يا محمد باشا ده أنا جيتلك أول مصحيت من غير حتى مغير ريقي على الصبح وبعدين هو ده صباح الخير بتاع الحكومة يا باشا " أقعد ياض وبلاش غلبه تحب اجيبلك إيه تفطر معايا " اللي سعادتك تؤمر بيه كويس بس خليهم يتوصوا احسن العبد لله جعان واقع من الجوع " أه طيب ده على كده إنت عايزلك ميزانية لوحذك عشان نسد جوعك ماشي يا سعد! مناديا على أحد أفراد الأمن: تعالى يا بني هاتلنا شوية ساندويتشات لأ شويه إيه إنت تجيبنا كتير عشان المفجوع ده يشبع وميعملش فضيحة بلا بسرعه خمس دقائق تكون هنا وإنت جاي تعدي على البوفيه يجيبنا براد شاي وقهوة ليا " أمرك يا باشا قولي بقى يا سعد عملت ايه مع المعلم وأهل حتتك " كل خير يا محمد باشا كل اللي قتلتي عليه حصل بس مش ده المهم دلوقتي " لأ ده مهم جداً ولا إنت عندك حاجة عايز تقولها " بصراحه كده أه فيه " طيب قول يا سيدي نعم عاوز تقول إيه " المعلم معاطي امبارح وهو بيكلمني قالي إن عطيه مش لوحده وإن معاه ناس شمحطيه وسعادتك مجبتش سيرتهم وأنا كده معرفش عنهم حاجة وكان واجب سعادتك تظممني يعني عشان محدش يا خدني على خوانه " إنت عبيط يا بني ناس مين وشمحطية مين اللي إنت عاملهم حساب ده إنت كسرت كبيرهم يعني بكره تلاقىهم جاين يتمسحوا فيك ويوسوا أيديك إنك توافق يخدموك دول شوية كلاب ولا تسوى حاجة في سوق



البشر متشيلش إنت همهم واطمن أنا مش حسبيك لوحك أبدا " ماشي يا محمد باشا أنا مطمئن عشان عارف إنك في ضهري " أهو هو ده الكلام جدع يا سعد " طيب وبالنسبة لموضوع القضية بتاعتي عملتلي ايه فيها " وبعدين معاك بقى أنا مش قلتلك تنساها خالص وأنا حتصرف متتعبنيش معاك وتزهقني منك " خلاص يا محمد باشا " وجاء فرد الشرطة في هذه اللحظة يحمل الطعام وجلس سعد يتناوله بنهم شديد وبعد الإلتهاء منه ظل سعد يسرد تفاصيل حديثه مع معاطي ووعده له أنه سوف يأتي له بالمال الذي كان يدفعونه لعطيه حتى يحمي أهل المنطقة وهكذا كان يستمع محمد دراز بكل شغف وهو يشعر أن خطته في السيطرة على المنطقة بالكامل عن طريق سعد تسير طبقا لرؤيته تماماً ثم بعد أن انتهى سعد من السرد قال الضابط: كده بقى المنطقة كلها أمانه في أيديك وحسالك عن أي حاجه تحصل فيها يعني إنت المسئول قدامي مش أي حد تاني فاهمني يا سعد " طبعاً يا باشا .. طيب كويس قوي دلوقتي عندنا مشكلة أبوك اللي لا يمكن يوافق على إنك تمشي في السكه دي صح ولا أنا غاطان " عداك العيب يا باشا صح وأكبر صح " طيب أنا وعدتك إنني حتعامل معاه بالحسنى وأنا عند وعدي بس لازم أبوك هو كمان يبقى متعاون زيك كده " إزاي يا باشا لأخلي بال سعادتك أبويا ملوش في اللون ده يعني عمره ما حبيجي سكه معاك " وله إنت ساعات بقول عليك ذكي وساعات تانيه بتبقى أغبي من الحمار مترسيلك على بر عشان نعرف نتفاهم " غبي إزاي بس يا باشا " أه غبي عشان مقلتش إنه حبيقي زيك قلت يتعاون يعني يسمع الكلام من غير ما يتعبنى بص بالبلدي كده أنا عايزه يسبيك في حالك وميقعدش يزن عليك عشان إنت داخل على خير كثير وهو شكله كده مش حيقدر الخير ده ويقعد يقولك دي سكه خطر وكلام من ده يعني " صح يا باشا والله أكبر صح



ده زي متكون سعادتك عارف طبع أبويا " رجعنا للهلل تاني يا بني أنا عارف دبة النمله المهم إن أبوك ملوش غير حل واحد عشان يبعد عنك وعن المنطقه كلها " حل ايه يا باشا " أنا بقول يعني إنه يا يبقي في البلد يا إما نرجعه لبيبا تاني وأنا شخصيا بارجح موضوع لبيبا ده عشان نظمن إنه مش كل شوية ينطلق هنا " طيب ودي تيجي ازاي يا باشا " بسيطة يا روح أبوك أنا حتصرف وبعدين يله إنت مش أكلت وشبعت قوم بقى وريني عرض قفاك " ماشي يا محمد باشا تشكر على الفطار ده سلام عليكم بس متسانيش في موضوع اللبش اللي ورا عطيه " أجري يا ض بقى وخلي عندك دم مقاتلك ملكش دعوه إنت بالمواضيع دي " ماشي يا باشا سلام " وبعد مغادرة سعد قام الضابط بالاتصال بطه ليخبره بأن موضوع قضية سعد لا يزال مفتوحا وإنه هو الآخر سوف يكون مطلوباً أمنياً وعليه فهو يقترح عليه ألا يعود إلى المنطقه إلا بعد نهاية هذه القضية وإلا وقع تحت طائلة القانون ثم أقترح أن يعود طه مرة أخرى إلى ليبيا حتى يكون بعيدا لا يطاله أحد مع وعد منه بالحفاظ على سعد واقتنع طه بهذا الحديث لأنه كان بالفعل يفكر في العودة إلى ليبيا التي وجد نفسه فيها بما عاد عليه من مكاسب سواء كانت مكاسب مادية أو بشرية حيث أنه تصادق مع أقارب جابر الذين استقبلوه بكل حفاوة وحب مرة أخرى بعد أن قرر العودة إلى العمل معهم وعود إلى يسري الذي أصبح في عامه الثاني في كلية الطب وكان كل الدكاترة الذين يدرسونه يتنبأون له بمستقبل باهر حيث أنه كان أول الدفعة متفوقاً على أقرانه ومن بينهم أبناء اثنين من الدكاترة وكان أبو سيد لا يا لو جهداً في تقديم كافة سبل الراحة ليسري الذي أصبح عنده أحب إليه من ولده سيد وكان يسري مثال الشاب المطيع الهادئ المتبع لدينه البار بعمته وزوجها والمجتهد في تعليمه وكان أبو سيد يتفاخر

بيسري في كل المحافل إلى درجة أن البعض كان يتندر عليه بالمثل القائل " القرعه تتباهى بشعر بنت اختها " وكان البعض يقولون له المثل القائل " يا مربي في غير ولدك ياباني في غير ملكك " ولكن أبو سيد لم يهتم بكل تلك الأمثال المحبطة وظل على دعمه بكامل طاقته ليسري ثم نذهب إلى أمل وابنها سعيد الذي كان يسير في طريق العلم ويتخذ أخاه الأكبر نبراسا له وقدوة صالحة بعد أن كان في فترات سابقة يسير في طريق سعد ولكن بعد أن افترق عن سعد وذهب إلى مجتمع الريف الهادئ تغيرت قناعاته خاصة بعد أن وجد كل التقدير والاحترام لأخيه من كافة أهل البلدة وكانوا يببالغون في احترامهم وتقديرهم له بقولهم الدكتور يسري ذهب إلى المكان الفلاني أو الدكتور يسري عاد إلى البلد وأصبح لقب يسري الرسمي هو الدكتور حتى لو ذكر لقب الدكتور لذهب ذهن الجميع إلى يسري ومضت الأيام والشهور التي أصبحت سنوات سريعا حتى حان موعد تخرج يسري من الكلية وكان الأول كعادته وتم تكليفه بقضاء عام الامتياز في القاهرة وعودة إلى سعد الذي كان قد بسط سيطرته الكاملة على المنطقة بأسرها وأصبح الجميع يهابه ويرجون رضاه بعد أن تخلص من عطيه أولا ثم بعد ذلك رفض انضمام زملاء عطيه للعمل معه وهو الأمر الذي أسعد أهل المنطقة حيث أنهم كانوا لا يامنون على أنفسهم من عطيه وزملائه وفي نفس الوقت كان الضابط سعيدا جدا لأن المنطقة أصبحت الأكثر هدوءا على مستوى كل المناطق المشابهة ونعود إلى الدكتور يسري الذي ما إن علم بتكليفه العمل في القاهرة إلا وقد سر كثيرا لأنه سوف يعود إلى منطقتة وهو يحمل لقب الدكتور يسري بعد أن غادرها وهو مجرد هارب من مشاجرة كادت أن تودي به وبأخيه وكان أول شيء فعله يسري أن ذهب مباشرة إلى منزله القديم ولكن كانت تنتظره مفاجأة إذ إنه بمجرد



أن دخل المنزل وجد أمامه جارتهم السيدة أم أحمد والتي لم تعرفه للوهلة الأولى بعد مرور ثمان سنوات على رحيله المفاجئ وعندما شاهده قالت: أيوه يا استاذ إنت عايز مين " ابتسم يسري قائلاً: عايز الأسطى طه أو أي حد من طرفه " الأسطى طه مش هنا مسافر مفيش غير ابنه اللي اسمه سعد بس ده مبيجيش إلا انصاص الليالي " انصاص الليالي طيب الواحد يعمل ايه دلوقت " تعمل ايه في إيه يا استاذ بقولك مفيش حد هنا يعني يا أما تجيله بعد نص الليل أو تجيله بكره الصبح لأ صبح إيه تجيله الظهر على ميصحي " أبتسم يسري وهو يقول: لأ أنا حدخل الشقة أنا كده كده معايا مفتاح وهو بييجي بقى وقت ما بييجي " معاك مفتاح إنت مين يا استاذ أنا بشبهه على حضرتك زي اللي شفتك قبل كده هو إنت قرييهم " وأمسك يسري بيد أم أحمد وهو يقربها من فمه ويقول بقى كل ده مش عارفاني يا خالتي أم أحمد " لأ والنبي مش عارفه!! ايه ده زي ما تكون لأ ده إنت هو إنت يسري صح يسري تعالى في حضني يا حبيبي يسري إبنني يا اه ده إنت واحشني بشكل تعالى يا يسري ادخل تعالى احكيلي عامل ايه وبقيت إيه " طيب حاضر بس أطلع شنطتي واجيالك " لأ والله لا يمكن إنت تقعد معايا الأول تحكيلي وبعدين تطلع ولا تبات معانا زي زمان فاكر يا يسري " ودي حاجة تتنسى طبعاً فاكر وفاكر حنيتك علينا أنا وسعد، دخل يسري إلى شقة جارتها أم أحمد ليتحدث معها وجال ببصره في أركان الشقة كلها وكأنه يستعيد ذكريات الطفولة المبكرة ثم تنهد وهو يغمغم: يا اه ده العمر عدى بسرعه متخيله يا خالتي كام سنه فاتت " عمر إيه يا يسري إنت ناوي تكبرني ولا ايه وبعدين إنت كلك قد ايه عشان تقول العمر عدى " ماعاش اللي يكبرك ده حضرتك حتفضلي أمنا وأحنا ولأدك الصغيرين مهما كبرنا بس فعلاً العمر عدى يعني أنا افتكر أما كنا بنجيك أنا وسعد أنا



كنت عندي أربع سنين وسعد سنتين والكلام ده عدى عليه اتنين وعشرين سنة يا اه " معقولة السنين جريت كده بس برضه أنا شايفاكو ولادي الصغيرين! إلا بالحق هو إنت اخرجت من الجامعة ولا لسه " رد باسماء: أه اخرجت السنه دي وبقيت دكتور يا خالتي " دكتور! يا الف نهار ابيض ماشاء الله تبارك الله أهو كده خبر حلو يفرحني أخيراً مش زي ال!! " زي إيه يا خالتي " لا ولا حاجه أهو الواحده بتيجي الساعه دي وتبدأ تخرف اللي بيقلوا عليها تخاريف قلة النوم " سلامتك يا خالتي تخاريف إيه وكلام فاضي إيه ده إنتي زي الفل إلا قوليلي إنتي بتشتكي من أي حاجه " يوه يا يسري! قصدي يا دكتور يسري شفت بقى إني بخرف اديني لسه بقولك يسري بدل دكتور " ده إنتي من حقتك تقولي الواد يسري كمان مش بس يسري ده حضرتك حقتلي أمنا وأحنا متنساش فضلك علينا " ربنا يجبر بخاطرك يا دكتور بس برضه إنت دلوقتي دكتور قد الدنيا ومينفعش أقولك يسري كده زي زمان! استنى بقى أما احطلك تتعشى " تعيشي يا خالتي الحمد لله اتعشيت قبل ما اجي ربنا يجعله عامر على طول بحسك ولا يحرمانك ابدا " يوه يعني إنت مش عايز تخليني اتعشى بخاطرك يا دكتور بقى " ليه بس كده والله متعشي لكن عشان خاطر حضرتك أكل معاك بس حاجه خفيفه " أهو كده إبنني حبيبي " وقامت أم أحمد بإعداد الطعام وجلست وتناولته مع يسري الذي كان يتظاهر أنه يا كل حتى يسعد السيدة الطيبة وبعد قليل سمعت السيدة صوت وقع خطوات سعد على الدرج ففتحت الباب ووجدته أمامها فقالت: هو يعني مفيش أمسي على خالتك أم أحمد " مساء الورد على عيونك يا خالتي هو أنا أقدر اسبيك من غير ما أصبح وامسي " أيوه يا بكاش كل بعقلي حلاوه إنت عارف مين عندي جوه حد مش حبيبي على بالك " مين يعني وبعدين إيه ده هو إنتي

بتحبي عليا قولي اعترفي " يوه جنك إيه يا سعد يا واد بطل هزار .. بس إيه قولك إني أه بحب عليك " بتكلمي جد ومين بقى ابن المحظوظه ده اللي أمه داعياله " أنا يا سعد " ايه ده يسري اخويا حبيبي ياه يا يسري بقالنا كام سنه مشفتكش " اسأل نفسك طيب أنا كنت مشغول جدا في دراستي إنت بقى إيه اللي منعك تيجي تزورنا وتقول اشوف عمتي واخويا " إيه اللي منعني!منعني الشديد القوي ده إنت لو تعرف مكننش تقول كده المهم إنت عامل ايه يا دكتور يسري وجاي في إيه " دكتور!! يعني إنت عارف إني بقيت دكتور " أه طبعا أخبرك الحلوه كلها عندي من ساعة ما سافرت البلد لحد امبارح بس " يا سلام ومنين بقى بتجيلك أخباري هو إنت اشتغلت في البوليس ولا ايه " أهو حاجه زي كده! تعالى بس نطلع فوق واحكيلك وتحكيلي ده إنت متعرفش إنت واحشني قد ايه " طيب يا خالتي أنا متشكر جدا على العشوه الحلوه دي اسيبك بقى والصبح إن شاء الله اعدي عليكى مني أصبح ومني اكشف عليكى اطمن على صحتك " لهو إنت حتسمع كلامه وتطلع بدل منقوله ادخل أقعد معانا شويه ده الواد ده مش بشوفه إلا كل فين وفين " ماشي يا جميل بتقوليلي واد وإنتي عارفه كل الحته بتقوللي ايه يلا زي بعضه مقبوله منك " جميل!! الله يجبر بخاطرك يا سعد جميل فين بقى الجميل عجز خلاص " فشر يا جميل ده إنتي حنفضلي طول العمر الجميل اللي مفيش زيها ومعلش بقى نستأذن منك واوعدك نعدي عليكى الصبح زي ما قال الدكتور " وصعد سعد بصحبة يسري وما إن دخلا شقتهما حتى طفقا يسردان الذكريات منذ الطفولة المبكرة وحتى المعارك التي كان يخوضها سعد نيابة عن يسري إلى إن جاء ذكر المعركة الأخيرة التي كانت السبب في تفريقهما وعندها بدأ يسري يسأل: اومال إنت عايش ازاي يا سعد وبتشتغل إيه خصوصا بعد اللي أنا شايفه عفش

جديد وأجهزة كهربائية وحاجه هلمه خالص يعني واضح كده إنك مستريح ماديا " لأ متشغلش بالك إنت بيا أنا بشتغل فعلا مع البوليس " وشغلة إيه اللي مع البوليس اللي تجيبلك كل ده " مقاتلك متشغلش بالك خرينا في الأهم " هو فيه أهم من كده " آه إنت أهم مقلتلش جاي في إيه وحتقعد معايا قد ايه " أقعد قد ايه؟! لأ اظمن أنا قاعد معاك على طول لأنى اتعينت هنا في القصر العيني يعني شغلي بقى معاك هنا في القاهرة " إيه بتقول ايه لأ طبعا مينفعش تقعد معايا هنا إنت تخليك معايا كام يوم لحد متصرف في مطرح تاخده لوحداك وكمان بيقى مطرح أحسن من ده وأكبر عشان حتى ينفك عيا ده " يا بني أنا لسه خريج طازه يعني بالعربي كده مفيش معايا فلوس وابوك زي مانت عارف كان مخلص فلوسه على مصاريف دراستي يعني بالبلدي كده هو كمان مفيش معاه فلوس وحتى لو معاه كفاية قوي اللي عمله معايا والحمل الثقيل اللي شاله وبعدين تعالى هنا هو ليه مينفعش أقعد معاك هي دي برضه مش شقتنا كلنا ولا خلاص حنتين العفش اللي جبتهم خلوها شقتك " يا دكتور أنا مقلتلشك على فلوس على فكره أنا اللي حتكفل بكل مصاريف الشقه وفرشها كمان يعني إنت مش حتدفع قرش فيها قلت إيه " طيب فهمني ليه مش عايزني أقعد معاك وأنا اسيبلك الشقه تكونش ناوي تتجوز فيها " أهو حاجه زي كده بقولك ايه إنت تنام دلوقتي زمانك راجع تعبان من السفر والصبح بإذن واحد احد نتكلم مع بعض ونتفاهم وحتلاقي اللي بقولهولك ده في مصلحتك إنت " طيب تصبح على خير والصبح رباح زي ماكان أبوك بيقول " وهكذا مضت تلك الليلة بنقاش لم يصل إلى نتيجة وسعد يحاول إبعاد يسري عن المنطقة حتى لا يعلم ماذا يعمل، وفي الصباح الباكر قام يسري من نومه مسرعاً حتى يتسلم عمله في المستشفى التي عين بها وترك سعد يغط في نومه بعد أن حاول





يقاظه ولم تفلح محاولته فترك له رسالة مكتوبة تطلب منه إنتظاره حتى عودته حتى يستكمل الحديث معه والاعتذار إلى جارتهم السيدة أم أحمد لأنه لم يستطع أن يفي بوعده لها في زيارتها صباحا كما وعداها وبالفعل لم يغادر سعد المنزل لأنه بطبيعة الحال لا يغادره إلا بعد الخامسة أو السادسة مساء وعاد يسري بعد أن أنهى مهمته وتسلم عمله وفي طريق العودة صادف أم أحمد بعيدا عن المنزل تحمل بعض الأشياء التي كانت قد ابتاعتها وعندما شاهدها يسري تقدم منها ليساعدها ويحمل عنها هذه الأشياء ورفضت أم أحمد هذا العرض قائلة: بقى معقول يا دكتور تشيل الحاجات دي ده حتى إسم الله على مقامك ميصحش " مقام مين يا خالتي طيب والله محد حيشيل إلا أنا هو يصح إبن يخلي أمه شايله كده وميشيلش عنها ده حتى يبقى كده إبن حرام وإنتي عارفاني إبن حلال ولا ايه " يا خبر يا دكتور ده إنت إبن حلال مصفي وطول عمرك ودود وحنين مش زي ال!! " مش زي مين يا خالتي دي تاني مره تقولي كده وتسكتي أنا عايز افهم فيه ايه " لأ مفيش والله منا عارفه اقولك ايه واعيدلك ايه بس عقلي بيقولي إنك حتعرف حتعرف " حعرف ايه يا خالتي " شوف بقى يا دكتور يسري يا بني أنا حقولك كل حاجه واللي يحصل بقى يحصل أصل مفيش حاجه بتستخبي مش كده برضه " أنا مش فاهم حاجه ممكن حضرتك تحكي على طول من غير مقدمات " أه منا حقولك أهو بقى الموضوع على سعد أخوك " ماله سعد!! " ملوش بص بقى يا دكتور سعد أخوك من ساعة ما رجع هو وابوك من لبيبا وهو حاله اتقلب بقى عامل فتوه ومحدث من أهل الحته بقى يعرف يتكلم معاه وبقي أي حد من الحته عايز منه حاجه بيقضيهاله بس بالقرش " حاجه إيه اللي بيقضيهاله سعد ممكن تفهميني " أي حاجه يعني مثلا لو حد عنده مشكلة على شقه ومش عارف



يطولها يقوم يخلي سعد يجيبهاله بالعافيه ومحدث يقدر يقف  
 قصاده عشان ممكن يا ذيه أو لو حد متخانق مع حد ومش  
 عارف يا خد معاه حق ولا باطل يقوم يخلي أخوك هو اللي يا  
 خدله حقه وكله بالدراع يعني " ده معنى اللي حضرتك بتقوليه  
 ده إن سعد بقى بلطجي مش هو ده قصدك " أه بالمفتشر كده هو  
 ده قصدي وهو فعلا كده يعني هو أنا حتبلى عليه ولا حتبلى  
 عليه " ينهارك أسود يا سعد بلطجي اخويا أنا بلطجي أنا دكتور  
 وهو بلطجي يعني ممكن يجيني حد اعالجه يكون مضروب منه  
 دي إيه المصيبة اللي إحنا فيها دي " شوف يا دكتور أنا قلت أنا  
 أقولك احسن متعرف من حد تاني غيري ويمكن متصدقهوش "   
 أه وعشان كده بقى مش عايزني أقعد معاه عشان معرفش بلاويه  
 فإكر إن دي حاجه بتستخبي ماشي يا سعد أما ارجعلك بس "   
 حتعمل معاه ايه يا دكتور ده أخوك خلاص ملوش كبير ولا  
 بيكبر لحد يعني اللي في دماغه في دماغه ده أنا يا ما كلمته  
 وصوتي اتنبج معاه ومفيش فايده برضه هو راكب راسه "   
 معلش يا خالتي برضه أنا أخوه الكبير وأنا ليا تصرف تاني معاه  
 وإن مكنش يسمع الكلام فيه أبوه كمان لازم يعرف لأن ده  
 موضوع ميتسكتش عليه " محدثاً نفسه " بلطجي ماشي يا سعد  
 " وما إن وصلا إلى المنزل حتى استأذن يسري من جارته  
 وصعد مسرعاً إلى شفته وفتح الباب فوجد سعد ينظر من النافذة  
 المطلة على الشارع وبكل لامبالاة تكلم سعد قائلاً: أهلا يا دكتور  
 إنت جيت " أه جيت ويا ريتني ما جيت ولا عرفت ممكن  
 تعرفني اللي إنت فيه ده نسميه إيه " بص إحنا مش حنلف  
 وندور على بعض أنا أول مشفتك جاي مع أم أحمد وأنا عارف  
 إنك حتيجي تقولي إيه أقعد بقى واستهدى بالله عشان نعرف  
 نتفاهم مع بعض " طيب ما دمت حتكلمني بصراحة اتفضل بقى  
 وقولي ليه عملت كده ايه اللي يخليك تمشي في السكه دي

بلطجي يا سعد ابن الأسطى طه وأخو الدكتور يسري بلطجي!  
بلطجي! " بص بقى يا خويا يا بن الأسطى طه بقى الدنيا اللي  
إحنا فيها دي مينفعلش فيها إلا القوي واديك شفت من زمان  
طيبتك مع الناس كانت بتعمل فيك ايه وأنا أما كنت بديهم على  
دماغهم كانوا بيحترموني إزاي " طيب ماشي أنا حوافك على  
كلامك ولو إنه غلط لأن فيه قانون لازم نلتزم بيه كلنا مش كل  
واحد يا خد حقه بايدده دي كده تبقى شريعة الغاب " والنبي يا  
دكتور بلاش الكلام الكبير ده اللي ملوش معنى لأن إحنا فعلا  
عايشين في غابه والغابه متعرفش غير قانون واحد يا دكتور  
قانون القوه " بص يا سعد هي كلمة واحدة مش حتنها يا إما  
ترجع عن السكه دي اللي إنت ماشي فيها يا إما أبوك لازم  
يعرف " ومين بقى اللي حيقوله إنت يا دكتور " أه أنا ماهو لازم  
حد يقوله وأما تيجي مني احسن ما يعرف من بره " طيب عشان  
تبقى فاهم بقى السكه دي مفيهاش رجوع حتى لو أنا حاولت  
ارجع محدش حيسييني ارجع وعشان خاطري متقولش إنت  
حاجه لابوك وسيب كل حاجه للظروف يمكن ربنا يحلها من  
عنده " طيب فهمني الحكاية كلها يمكن الاقيلك حل وبعدين  
مفيش حاجه ملهاش حل بس احكيلى إنت وربنا يلهمنا الحل "  
ماشى يا دكتور أقعد بقى وأنا حقولك كل حاجه من أول محبت  
من لييبا وأنا لابس الأساور لحد دلوقتي " وظل سعد يقص على  
أخيه كل ماحدث ويسري يصغي إليه بكل انتباه حتى لا تفوته  
شاردة ولا واردة، وما إن انتهى سعد من سرد كل الاحداث التي  
مر بها ويسري يطرق برأسه محاولا ايجاد أي ثغرة ينفذ من  
خلالها حتى يحتال على الضابط محمد دراز الذي يمتلك مفاتيح  
المسألة برمتها وبعد لحظات رفع يسري رأسه وهو يقول: يعني  
إنت كده الحل الوحيد إن الباشا الطابط بتاعك ده هو اللي يعتقدك  
من شغلانتك دي صح " الحكاية مش بالبساطة دي لكن ممكن

نقول إن سبعين في المايه تكون المشكله اتحلت لكن كمان منتساش إن فيه ناس ثانيه كثير معتمده على وجودي ده غير كمان إن فيه ناس تتمنى إنني اختفي من المنطقه لأ منطقه ايه دول يتمنوا اختفي من الوجود كله عشان هما يركبوا بقى ويا خدوا راحتهم " قصدك مين الناس دي والناس دي " اقولك الناس اللي معتمده عليا هما أهل المنطقه كلها والناس الثانيه اللي نفسهم ياخدوا مكاني وهما اللي يحصلوا الفلوس اللي باخدها " يا سعد افهم الفلوس اللي بتكلم عليها دي فلوس حرام وربنا لا يمكن يبارك فيها وبعدين هو الناس دي حياخدوا مكانك كده لوحدهم أنا اللي فهمته من كلامك إن اللي ممكن يسمحهم هو الظابط اللي مشغلك صح ولا أنا غلطان " لأ يا دكتور كلامك صح وممكن ده لو وافق أصلا إنني اسيبه أنه يخلي الناس دي تاخذ مكاني وهو مضطر زي ما كان مضطر إنه يخلي عطيه هو اللي يسيطر لحد مظهرت أنا يعني بالبلدي كده ده لو وافق يبقى حنبلي الحته ببلوه الله اعلم بيها وبعدين يا دكتور أنا شايف إنني مبضربش حد على أيده عشان يدفعلي المعلوم وكمان أنا مبخدش مليم من أي حد غلبان أنا مبخدش غير من الكبار بس وده نظير الخدمات اللي بعملهاهم وأحب أعرفك بقى حاجه عشان بتقولي فلوس حرام إنت سمعت عن شركات أمن بتتعمل خاصه بتقدم نفس اللي أنا بعمله ولا دول حلال ليهم حرام عليا " أسمع يا سعد إحنا ملناش دعوه بغيرنا خلي بالك كل واحد متعلق من عرقوبه وكل واحد ربنا حيسأله عن أعماله هو مش عن عمل حد تاني المهم دلوقتي بالنسبة لي إنك تفك نفسك من الظابط ده والباقي كله تحصيل حاصل " طيب يا دكتور يا بو المفهومية حتلها دي بقى ازاي ؟ " بص مفيش احسن من الصراحه إنت تروح لجد بيه وتقوله إننا عرفنا الحكااية واننا مش راضيين عن السكه دي وأنك حتسب الحكااية دي وتقوله



كده كلمتين تراضيه بيهم وأكيد هو مش حيشغلك غصب عنك " آه ده متهيا لك يا دكتور هو إن كان عليه لا يمكن يفرط فيا أبدا عارف ليه!! ده لأنني مطببط له الحته من غير مشاكل مني غيري بيعمل كل يوم تلتमित مشكله وهو طبعا مش حيصحي براحته معايا كده بالساهل " طيب نجرب ونشوف حيعمل ايه ولو الحكاية منفعتش نفكر في حل تاني إن شاءالله ترجع عند أبوك تشتغل معاه تاني وكده تبقى بعيد عنه وعن المنطقة كلها قلت ايه " قلت لا إله إلا الله يا دكتور ماشي ولو إني بقولك من دلوقتي إنه مش حيوافق عشان تعرف بس تعمل حساباتك على حاجه تانيه لكن خلاص أنا حقوله واللي فيه الخير يقدمه ربنا " طيب كده تمام يرجع مرجوعنا بقى للشقه إذا إنت بتقول إنك مستعد تدفع أي مبلغ وأنا أروح شقه تانيه صح " آه صح " طيب ايه قولك بقى إني عايز الشقه دي بالذات " ليه كده يا دكتور أنا عايز اريحك من الحته اللبش دي وكمان تاخذ شقه في حته نضيفه عشان لا مؤاخذه يعني تنفكك أهي منها تبقى شقتك ومنها كمان عيا دتك لحد ما ربنا يفتحها عليك وتشوفك شقه تانيه أو عياده تانيه " لأ بقى أنا عايز الشقه دي لسببين لأ لتلات أسباب أول سبب إن الشقه دي بتاعة الأسطى طه مش بتاعتنا ولما اخدها بصورة مؤقتة أهي برضه حنفضل بتاعته تاني سبب أنا عايز أخدم أهل الحته بتاعتنا يمكن ربنا يغفر لك اللي عملته تالت سبب بقى وهو الأهم إنك تبعد عن المنطقة دي وتروح حته تانيه محدش يعرفك فيها وتبتدي حيا تك من جديد على نضافه وتنسى بقى حياة العافيةه والبلطجة وربنا يتوب عليك وتتجوز بدل حياة الصرمحه اللي إنت عايشها دي " آه أحلم أحلم أصل خلاص محمد باشا دراز وافق وإنت بتنظلمي حياتي مش تصبر أما نشوف اخرتها وايه اللي حيتم " كل خير إن شاء الله المهم إنك تكون نيتك خالصه لله سبحانه وتعالى وهو أكيد مش حيسيبك

وحيفرجها عليك هو إنت متعرفش الايه الكريمة: ومن يتق الله يجعل له مخرجا " أكيد ربنا حيفرجها " ماشي يا دكتور سييني بس النهاردة وبكره عشان نشوف حنعمل إيه مع الناس اللي معتمده عليا وكل واحد له عندي مصلحة اقضيها له وبعد كده يحلها الحلال " طيب يا سعد هما يومين ملهمش تالت تكون مخلص نفسك وبعدين أبوك حيعرف كل حاجه وده آخر كلام قلت إيه " قلت لا إله إلا الله محمد رسول الله " إن شاء الله بعد يومين اكون انتهيت وأروح لعمد باشا ونخلص الحكاية بس على الله ربنا يهديه ويسيني " ماشي يا سعد " وهكذا انتهى الحوار بين الأخوين على اتفاق بينهما يتوقف تنفيذه على مدى تقبل الضابط محمد دراز فكرة تخلي سعد عن السيطرة على المنطقة وتولي غيره هذه المهمة، مضى اليوم الأول من المهلة على خير ما يرام دون أي عقبات أو مشاكل وفي مساء اليوم الثاني بينما سعد يسير في طريقه وجد من يسير بجواره وهو يقول بصوت هامس: خليك ماشي زي مانت يا معلم سعد متبصش عليا " كاد سعد أن يلتفت إلى مصدر الصوت غير عابئ بتحذير صاحبه ولكنه تمالك نفسه وائر أن ينظر بطرف عينه حتى يعلم من يحدثه فلمح شخصاً يكاد أن يعرفه ولكن لا يتذكر من هو ولا متى شاهده من قبل فقال: إنت مين يا أخينا وعازب إيه " إيه مش فاكرنى يا معلم أنا حسن الخفيف اللي جيتلك عشان اشتغل معاك بعد ما ضربت عطيه الشمام وأنت مرضيتش تشغلني معاك " وعازب إيه يا خفيف " بص يا معلم أنا جيت انبهك إن عطيه بيلم رجالته من جديد وناويلك على نيه سوده " آاه وعرفت ازاي بقى الحكاية دي وكمان جاي تقولي كده ليه " عرفت ازاي دي بسيطه خالص هو بعثلي زي ما بعث لكل الرجاله وأنا لحد دلوقتي مرديتش عليه عشان مياخدش خوانه أما بقى جيت أقولك ليه لأنى بالعربي كده تبت إلى الله وبطلت المشي في الحرام بعد

إنت مقفلت سكتته في وشي ربنا فتح عليا بشغل حلال باكل منه  
الشهد فقلت اجي أقولك قبل ما ارد على عطيه عشان تاخذ بالك  
من نفسك " آاه قتلتي بقى إنت تبت وجيت تنبهني! طيب روح  
بقى يا شاطر العب بعيد وروح لمعلمك العره ده وقوله إني  
مبتهدش وأنا مستنيه بييجي عشان المره دي حتكون آخر يوم  
في عمره " يبقى إنت كده مش مصدقني ماشي يا معلم سعد  
بكره تعرف إني قلبي عليك ونيتي خالصه ولو عايز تتأكد من  
كلامي ادي عنواني مكتوب في الورقه دي خده وتعالى أتأكد إذا  
كنت بسرح بيك ولا بنصحك لوجه الله " أه يعني إنت فاعل خير  
لوجه الله طيب أمشي بقى من جمبي احسن اخليك عبره زي  
معلمك العره " ماشي بخاطرك بقى بكره تعرف إني فعلا جيتلك  
في خير وإنت مرضيتش تسمعني سلام يا معلم " التفت سعد إلى  
مصدر الصوت الذي اختفى فلم يجد أي أحد كأنما كان يحلم أو  
يتخيل اختفى محدثه حسن الخفيف أو كما يدعي فهز سعد رأسه  
بمنه ويسرة علامة التعجب مما حدث وأكمل سيره وانقضى  
اليوم الثاني بكل سلاسة لا يعكر صفوه إلا حديث حسن الخفيف  
الذي بدا له كأنه شبح من الأشباح ثم أنهى سعد مهمته بنجاح  
إستعدادا للقاء الضابط في صباح اليوم التالي وبالفعل توجه سعد  
لللقاء وطلب من الحارس الواقف على الباب أن يستأذن الضابط  
في اللقاء ولكن الحارس أخبره أن الباشا غير موجود وكما قال  
له: الباشا في مأمورية " طيب متعرفش هو فين ولا حيرجع  
إمتى حتى " يعني هو سعادته حيقولي أنا حاجه زي دي أهو  
وقت مايمشي يمشي ووقت ما يعاود يعاود براحته " طيب  
متعرفش عمك الصول إبراهيم فين " أه ده بقى عارفه تلاقيه  
جمب مكتب الباشا المأمور " ترك سعد الحارس وذهب مسرعاً  
للقاء المساعد إبراهيم ووجده بالفعل جالساً على مكتب بجوار  
غرفة المأمور فقال له: صباح الخير يا عم إبراهيم " أهلا يا



معلم سعد إنت جايلي أنا ولا لعهد بيه " لأ الصراحة أنا كنت جاي لعهد باشا وبعدين الواد اللي واقف حراسه قالي إنه مش موجود وإنه في مأمورية قلت اجي أسألك يمكن تعرف هو فين ولا حيرجع إمتى " لا والله يا بني معرفش بس هو فيه حاجه مستعجله قوي اللي تخليك مش قادر تستنظره كده " آه فيه حاجه " طيب قولي يا بني يمكن أقدر اساعدك " أقولك إيه بس دي حاجه مكنتش على البال ولا خاطر " طيب خلاص لو مش عايز تقولي براحتك يا بني إلا بالحق هو صحيح الدكتور يسري أخوك رجع من البلد وقاعد وياك " الله! هو مفيش حاجه بتستخبى أيوه يا عم إبراهيم وهو ده اللي جابني لعهد باشا " ليه كفى الله الشر ماله الدكتور وبعدين يعني هو لو فيه حاجه إنت حتغلب فيها ده إنت كل حاجة ليك فيها تصريحه ومش مستنظر حد يساعدك فيها مش كده ولا ايه " بص يا عم إبراهيم أنا حكلمك بصراحة وإنت تقولي اعمل ايه عشان إنت اكيد عارف الباشا اكثر مني " خير يا معلم سعد هو فيه ايه " لأ مفيش كل الحكاياه إن الدكتور يسري اخويا جه من البلد وعرف اللي أنا بعمله وقالي كده بصراحة إنه عاوزني أبطل الشغلانه بتاعتي وهددني إنه يقول لابويا وإنت عارف بقى الأسطى طه حيعمل ايه لو عرف حاجه زي دي " لهو إنت عايز تقولي إنهم مكنوش عارفين كل ده " آه يا عم إبراهيم محدش كان عارف أي حاجه أبويا في ليبيا واخويا في البلد وأنا لا كنت بروح هنا ولا هنا يبقى حيعرفوا ازاي " طيب وإنت جاي لعهد بيه عشان كده حيعملك ايه محمد بيه في الحكاياه دي يعني حيلخيمهم يقتنعوا بشغلك ده " لأ يا عم إبراهيم أنا جيت عشان عايز أبطل الشغلانه دي وقلت أبلغ الباشا عشان يعفيني منها يعني " يعفيك إيه وبتاع ايه لهو إنت كل ده متعرفش محمد بيه ده لا يمكن يسبيك أبدا ولو انطبقت السما على الأرض وأنا يا ما نبهتك وقتلك قبل كده تبعد





عن السكه دي وإنت ركبت راسك وبعد ما دخلت معاه في الغميق عايز تخلع مفكرش " طيب والعمل يا عم إبراهيم " العمل عمل ربنا يا بني أنا شخصيا مقدرش أفيدك بحاجه لكن كل اللي اقدر عليه إني ادعيلك ربنا يهدي محمد بيه ويوافق إنك تخلع منه " ربنا يخليك يا عم إبراهيم ماشي أنا كده أمشي واجيله إمتى ؟ " والله منا عارف اقولك ايه أهو أنا ممكن لو لمحتة أقوله إنك عايزه وإنت تعالى بعد ساعتين يمكن يكون خلص شغله ورجع " ماشي يا عمنا بالاذن أنا بقى " اتفضل يا بني معقول ده يكون الواد بيتكلم جد ويكون ربنا هدهاه!! قادر ربنا على كل شيء عاد سعد إلى منزله وحاول أن ينال قسطاً من النوم لأنه استيقظ مبكراً ولم يستطع فقام بعمل كوب كبير من القهوة حتى يكون في حالة من اليقظة التي يحتاجها في لقاءه مع الضابط وبعد نحو الساعتين ذهب إلى القسم مرة أخرى وسأل الحارس عن الضابط والذي أجابه بأنه موجود ولكنه مشغول الآن بالتحقيق في واقعة فطلب منه سعد الدخول إلى الضابط وأخبره أن سعد في الإنتظار وتردد الحارس في بداية الأمر أن يطيع سعد ولكنه تحت تهديد سعد له بإخبار الضابط أن الحارس يرفض أن يبلغه وافق الحارس مضطراً ودخل ليبلغ الضابط بأن سعد في الإنتظار وما إن علم محمد دراز بوجود سعد بالخارج إلا وطلب من الحارس أن يدخله على الفور وخرج الحارس وهو يقول: اتفضل الباشا في انتظارك ادخل " نظر سعد إلى الحارس ولسان حاله يقول: ما كان من الأول ودخل سعد ليجد الضابط جالساً على مكتبه وأمامه ثلاثة من المتهمين مكبلين بالقيود الحديدية وما إن شاهد سعد إلا وأشار إليه أن يجلس على كرسي في نهاية الغرفة حتى ينتهي من التحقيق وجلس سعد وهو يفكر فيما يقول وهل يقبل الضابط ماسوف يطرحه عليه أم لا حتى انتهى الضابط من التحقيق وأمر أن يذهب المتهمون إلى غرفة

الاحتجاز ثم اعتدل ليووجه سعد مبتسماً وهو يقول: أيوه يا سعد باشا خير عايز إيه؟" ابتسم سعد وهو يقول: كل خير يا باشا هو موضوع صغير كده " موضوع صغير برضه يخليك تجيلي مرتين في يوم واحد وكمان تصحى بدري علشانه " والله يا محمد باشا هي الحكاية بسيطة بس سعادتك يعني تقدر اللي أنا فيه " يا سعد أنا مش فاضي للكلام الفارغ بتاعك ده اديك شايف ورايا بلاوي قد ايه أتكلم دوغري إيه عايز تقول إيه طبعاً بخصوص أخوك مش كده " أه هو مش بالظبط لكن برضه هو له دخل في الموضوع " الله يطولك يا روح يا بني أتكلم أنا مش فاضيلك " إنت عارف سعادتك إن اخويا الدكتور يسري جالي من ثلاث أيام وقعد معايا في الشقه وحيقعد معايا على طول " أه فيها ايه يعني تكونش يا واد عايزني اوصيلك على شقه من بتوع الأوقاف ولا حتى الاسكان " لأ يا باشا الموضوع إن يسري عرف حكايته وأنا بعمل ايه وطلب مني إنني اسيب الشغل وإلا حيقول لابوه ومديني مهله النهاردة إنني أخلص الحكاية دي النهاردة " بقى كل اللف والدوران ده عشان تقولي الكلمتين الخايبين بتوعك دي متقولي على طول إنك عايز تسبب الشغل معايا وأنا موافق طبعاً " معقول يا باشا موافق ده أنا كنت شايل الهم بشكل ربنا يخليك يا باشا ده سعادتك ابن أصول صحيح " ايواه أنا موافق بس على شرط صغير تعمله تبقى براءة مني " شرط إيه يا باشا ده سعادتك تؤمر وأنا عليها التنفيذ قالها " وابتسامته تتسع حتى شدقيه " شرط إنك تشوفلي حد تاني يحل محلك ويعمل شغلك ده من غير مشاكل زيك برضه قلت إيه " اختفت الابتسامة من على وجه سعد بسماعه هذا الشرط وقال: وده اجيبهولك منين ده يا باشا " أنا مليش دعوه إنت تتصرف وتجيلي حد تاني زيك وأنا أوعدك بشرفي إنني اسبيك من بكره " لا إله إلا الله يا باشا قولي كلام تاني ده إسمه شرط تعجيز أنا



معرّش حد ممكن يعمل كده " طيب إذا كنت إنت وجايب المنطقة كلها من تحت لفرق ومن فوق لتحت ومعرّش عايزني أنا أعرف وخصوصاً وأنا سايبك المنطقة كلها بين أيدك وفي حضنك! بص يا سعد حتعرف تجيب حد أهلاً وسهلاً مش حتعرف تفضها سيره وتسيبني اشوف شغلي " يا باشا أعمل فيا معروف ده أنا راجلك وميخلصكش تعمل فيا كده " اللهم طولك يا روح يا بني أمشي بقى من قدامي الساعة دي ولا اقولك صحيح إيه حكاية عطيه الشامم أنا عندي اخبار إنه بيحاول يلم رجاله وعايز يرجع تاني يعمل فرده على الناس بتوعك ولا كمان ده جالي أخبار إنه عايز ياذيك ولو طال يموتك مش حيتاخر " والله يا باشا أنا برضه جالي واحد امبارح وقالني نفس الكلام بس أنا قلنله يروح يلعب بعيد " واحد مين قصدك حسن الخفيف " الله ده حضرتك عندك كل المعلومات وعارف كمان الخفيف طيب بقى ممكن اعرف إذا كان بيتكلم بجد ولا عامل لعبه مع عطيه " لأ صدق الجدع ده وخلي بالك ده برضه صبح من رجالتنا بعد مساب عطيه ها بقى حتعمل معاه ايه " أهو اللي ربنا يقدرني عليه عمله معاه " طيب برضه بقولك خلي بالك لأن عطيه دلوقتي مش لوحده ده قاعد بيجمعك ناس وعلى رأي المثل الكثره تغلب الشجاعه وعلى العموم أنا زي مقتلك قبل كده أنا مبسيبش رجالتني من غير حمايتي يعني تظمن إنك متغطي ومحدش يقدر يوصلك إلا إذا كنت أنا عايز كده " طيب يا محمد باشا لو خالصتك من الزفت ده اللي اسمه عطيه ممكن تعتنني لوجه الله " والله يعني ... أفكر " ماشي يا باشا نتكلم بعد مخلصك منه " ماشي يا سعد دلوقتي بقى تسيبني عشان اشوف شغلي ولما تخلص منه نبقى نشوف حنعمل إيه يلا بقى إنت كده خدت وقت كتير " ماشي يا باشا حسيبك براحتك سلام " ومضى سعد وهو يشعر أن الأمر يزداد تعقيداً وإنه لا يعرف ما الذي



سوف يقوله ليسري حتى يعطيه مهلة جديدة لإنهاء مهمته مع محمد دراز وظل سعد يسير وهو يفكر وإذا به أمام أحد المساجد والمؤذن يرفع أذان الصلاة ووقف سعد حائراً ولأول مره يشعر أنه بحاجة إلى لقاء الله حتى يشكو له حاله وعجزه عن تصريف أمره وبعد تردد بسيط منه قام بحزم أمره ودخل إلى المسجد لأداء الصلاة وبينما هو ساجد في الصلاة لا يشعر إلا ودموع ساخنة تنساب من عينيه وهو يدعو الله أن يجعل له من أمره مخرجاً وظل سعد على هذا الحال حتى بعد أن انتهت الصلاة ظل جالساً في مكانه يستند إلى أحد أركان المسجد حتى غلبه النعاس وهو جالس وأثناء ذلك شاهد عطيه وهو يتقدم منه حاملاً سيف وهو يقول: أنا مش قتلتك اقتلني عشان لو محصلش أنا اللي حقتك أهو دلوقتي نهايتك على أيدي إنت شايف الرجاله دي كلها أقل واحد فيهم حيبيب رقتك ومش بس كده لأ وكمان حيبيب رقبة كل اللي يخصك " إنت جيت لقضاك يا نتن يا ض ده أنا سبتك المره اللي فانت تعيش عشان موسخش أيدي بزفارة دمك لكن ماشي تعاللي بقى " طيب اديني قدامك أهو تعالى بقى وريني نفسك " طيب تعالى نطلع بره بيت ربنا عشان الجامع طاهر وأنت تنجسه بدمك الوسخ ده " بس كده رخيص والطلب غالي تعالى " وخرج سعد وعطيه من المسجد وما إن خرجا إلا ووجد سعد نفسه محاط بحلقة من أفراد عصابة عطيه يحملون سيوفا ويشهرونها تجاهه ومثلما حدث في السابق وجد من ينادي عليه ويقذف إليه بجنزير حديدي غليظ وتلقف سعد الجنزير ثم قام بعدة حركات استعراضية به ثم وقف أمام عطيه وهو يشير إليه بكف يده وهي منبسطة ولسان حاله يقول: تعاللي بقى يا نتن وريني نفسك وفعلاً بدأ النزال بينهما في داخل حلقة من البشر وظل سعد يلوح بالجنزير ومثلما فعل في المرة السابقة استطاع أن يلتقط السيف من يد عطيه وبينما عطيه مطروح



على الأرض إذا بيسري يظهر وهو بين أيدي عصابة عطيه وأحدهم يقول: أخوك في أيدينا ولو عايزه حتة واحدة سيب عطيه وأرمي الجنزير ولا اسلمهولك حتتين وهنا توقف سعد وهو لا يدري ماذا يفعل هل يلقي بالجنزير وهل إذا نفذ مايريدونه يضمن أن يتركوا أخيه وهل إذا تركوا أخيه يتركوه هو أيضا لم يستمر سعد في التفكير كثيرا وقرر أن يلقي بالجنزير وقبل أن يفعل ذلك تبدل رأيه بسرعة وأمسك برقبة عطيه وهو يصيح: لو مسبتوش الدكتور حالا أنا اللي حخلي النتن ده حتتين " برز الرجل الذي يمسه بأخيه وقال " أعمل اللي إنت عايزه إن كان على عطيه هو ميسواش رباط الجزمه اللي في رجل أخوك إنما الدكتور يساوي كثير مش كده ولا ايه يلا اقتله وأحنا كمان حنقتل المحروس ده وشوف مين الخسران " طيب وأنا ايه اللي يضمنلي إني لو سبته إنك تسبب اخويا " هاو مفيش ضمان غير كلمتي ولو إنت مستغني بقى عن أخوك متنفذش كلامي " طيب أنا حبعنك عطيه وفي نفس الوقت تخلي الدكتور يبجي عندي " لأ معلم ياض يعني عايزنا نبذل في نفس الوقت ماشي كلامك يلا ابعت عطيه وأنا أهو حبعنك الدكتور " ثم بدأ الرجل في إطلاق سراح يسري وطلب منه أن يسير ببطء نحو سعد وفعل سعد نفس الشيء وعندما وصل عطيه إلى جانب رجاله كان يسري قد وصل بجوار سعد وفجأة وجد سعد الدماء تنبثق من فم يسري وجسده يتهاوى إلى الأرض وعند ذلك القى سعد أسلحته وأمسك بأخيه صارخاً: يسررري وهنا انقض رجال عطيه على سعد وأخيه وكادوا أن يعملوا فيهم القتل وفي هذه اللحظة أحس سعد بمن يمسه به من كتفه وهو يقول: اصحى يا أخي صلاة العشاء وجبت قم حتى تتوضأ استيقظ سعد من نعاسه وهو متهدج الأنفاس غارق في عرقه ونبض قلبه يدق عاليا ثم قال: أعوذ بالله من الشيطان الرجيم ده ايه الكابوس ده بس ده

كده علامه من ربنا عشان مهما حصل لازم أتوب يا رب اقبل توبتي وأصلح حالي واحمي اخويا الدكتور ده ملوش ذنب في حاجه يا رب إنت عالم بحالي وحال أبوه ده لو جراه حاجه أبوه يموت فيهاثم قام سعد واغتسل استعدادا للصلاة وبعد ذلك قرر أن يذهب إلى أخيه حتى يقص عليه كل ما حدث حتى يعلم يسري بواقع الأمر وقد يجد حلاً مناسباً واقترب سعد من المنزل وقبل أن يصل وجد مقهى المعلم معاطي مطفيء الأنوار ولا يوجد به اي اثر لأي نشاط وانقبض صدر سعد فليس من المعتاد إغلاق المقهى تحت أي ظرف وتساءل سعد في نفسه ما الذي حدث حتى يغلق معاطي مقهاه وهو الذي لم يفعله مطلقاً توقف سعد عن السير وقرر أن يسأل مالك أحد المحلات عما حدث ولماذا يغلق معاطي مقهاه وعندما دخل المحل وجد مالكة جالسا خلف الخزينة وهو ينظر إليه نظرة غريبة وعندها فطن سعد أن هناك شيء ما يحدث لا يعلمه وكاد أن يخرج مسرعاً إلا أنه وجد باب المحل يغلق أبوابه ووجد أمامه أربعة رجال لا يعرفهم يحملون أسلحة بيضاء وتقدم كبيرهم ليحدثه قائلاً: إنت وقعت يا حلو تعالى بقى زي الشاطر تكلم المعلم عطيه عشان هو عايزك ومستنيك من بدري " لم يتوانى سعد لحظة واحدة وقام بسرعة بضرب أقرب الرجال إليه برأسه بقوة أسقطت الرجل أرضاً وبنفس السرعة التقط سعد سلاح الرجل الذي سقط بدون حراك وبدأ في مواجهة الثلاثة الآخرين وتمكن سريعاً من ضرب الرجل الثاني بقبضة يده بعد أن حاول الرجل طعن سعد ولكن تمكن سعد من تفادي الطعنة وسقط الثاني وبسرعة فائقة تمكن من ضرب الثالث الذي تهاوى هو الآخر ولم يتبقى إلا الرابع الذي كان يقف بجوار الباب وعندما شاهد ما حدث لزملائه فتح الباب سريعاً وهرول في اتجاه مقهى معاطي وسعد يعدو وراءه محاولاً الإمساك به وعندما بلغ الرجل الذي فر المقهى أسرع



بالدخول وابتلعه الظلام واقتحم سعد المقهى وهو يمسك بمطواة في يده وعندما دخل المقهى وجد النور يضاء ووجد نفسه أمام عطيه جالساً بكل هدوء كأنما كان ينتظره وحوله مايقرب من ثمانية رجال آخرين ومعاطي يقف حاسر الرأس بدون عمامته وغطاء رأسه وهو منكس الرأس وفي نفس الوقت كان يسري يقف في الشرفة يراقب الموقف وعندما شاهد سعد يعدو ناحية المقهى وراء الرجل الفار حاول أن ينادي عليه ولكن سعد كان أسرع في الدخول وراء الرجل وعندما شاهد يسري المقهى يضاء شعر بالخوف على أخيه وقرر أن يهبط مسرعاً حتى يكون في عون أخيه وتناول يسري سكيناً كبيرة من المطبخ من التي تستخدم في كسر عظام الأضحية (ساطور) وقرر أن يتدخل لنصرة أخيه مهما كانت التضحيات وعندما نزل إلى أسفل المنزل وجد بعض الرجال من أهل المنطقة يقفون وهم يرقبون الموقف في خوف ولا يفعلون إلا مشاهدة ما يحدث دون تدخل منهم وصرخ فيهم يسري قائلاً: انتوا واقفين تنفروا وسابيين اللي بيحملك يستفرد بيه عطيه والاضيشه كل واحد منكم يجيب أي سلاح وإن شاء الله إحنا أكثر منهم وحنقدر عليهم ولا عايزين عطيه يرجع يستعبدكم ويهينكم ويلقح جنته على حريمكم ده كده يبقى مفيش عندكم دم لو سمحتوله بكده ثاني " وقعت الكلمات وقع السحر في نفس الرجال وبدأ البعض منهم يهرول إلى منزله لإحضار أي سلاح منزلي يستطيع به أن يشارك في القتال ضد عطيه ورجاله ثم تجمع بعض الصبية وقاموا بجمع الأحجار من الشارع حتى يستخدمونها في المعركة وقامت النساء بتسخين الزيت لدرجة الغليان حتى إذا شاهدن أحد رجال عطيه يسكب الزيت على رأسه من الشرفات كل هذا تم في دقائق معدودة وكانت كلمة السر هي كلمة يسري التي ألقاها في وجه الرجال وهو يحثهم على الدفاع عن أنفسهم وزوجاتهم

وبنائتهم اللواتي كن مستباحات عندما كان عطيه مسيطرا على  
الحي ولم ينتظر يسري الجميع حتى يساندونه بل اقتحم المقهى  
على الفور ووجد أخيه في ناحية وحده وعطيه ورجاله في  
الناحية الأخرى في مواجهة سعد وعطيه يجلس هادئاً كأنما قد  
ضمن نتيجة المواجهة لصالحه ولم لا وسعد وحده وهو معه  
ثمانية رجال مسلحين وفور دخول يسري صاح فيه سعد حتى  
يلتحق به بعيداً عن عطية وبالفعل فطن يسري للموقف ووقف  
بجوار سعد وهو ممسكا بالسكين الكبير ثم أعطاه لسعد لأنه  
أجدر منه في التعامل بهذه الأسلحة وهنا قال عطيه: طيب كده  
حلو قوي الفيران اتجمعت ووقعت في الفخ لوحدها من غير  
مجهود مننا تعالى بقى يا ض إنت نتفاهم احسنك بدل ما تموت  
فطيس ملكش تمن " إنت عايز تقول إيه يا عطيه " عايز اقولك  
إنك كده ميت وكده ميت لكن أخوك ده ملوش ذنب في عمالك  
فأيه رأيك بقى إننا نتفق احسن من إنت تموت ولا حد من  
الرجاله دي يجراله حاجه على إيدك قبل ما تموت قلت إيه "  
قلت لا إله إلا الله إنت عايز تتفق على إيه " أهو كده الكلام  
شاطر يا ض أنا أقولك إنت اتفقنا إنك ميت والميت ملوش نصيب  
في أي حاجه يعني بالعربي كده إنت حتخرج من الحته دي  
سليطي مليطي (عاريا) مش حتاخذ معاك قشايه وتسبيلي الورث  
بتاعي ومشفش وشك هنا تاني ابدأ ولو شفت وشك حبيبي التمن  
رقبة المحروس اللي واقف جمبك ده قلت إيه بقى شفت أنا قلبي  
حنين ازاي " ولو قاتلك لأ يا عطيه " تبقى نويت على موتك  
إنت والواد الدكتور الغلبان ده " ليه هو إنت فاكِر إنك بشوية  
الهلافت اللي معاك دول إنهم حيحموك مني ده أنا بعون الله أكل  
زيك ثلاث مرات " خلاص بخاطرك بقى إنت اللي جنيت على  
نفسك " وفي نفس اللحظة كان الصبية الذين تجمعوا أمام المقهى  
بدأوا في قذف الحجارة على زجاج المقهى الذي تهشم نتيجة





لذلك وكان بعض الرجال الذين أحضروا ما تيسر لهم من الأسلحة المنزلية قد تجمعوا هم الآخرين أمام المقهى وعندما شاهد عطيه ما يحدث قال: حلو قوي ده النمل طلعله سنان هما شوية الحشرات دي حيعملوا إيه يعني!! إحنا بس نخلص من الأمور ده هو وأخوه ونطلع نربيهم اهجموا يا رجاله مش عايز حد صاحي والتف رجال عطيه حول سعد ويسري وهم يمسون ببعض الأسلحة البيضاء وسعد لا يمتلك إلا (الساطور) الذي أحضره يسري ويسري لا يجيد مثل هذا النوع النزال ووضع سعد يسري خلفه حتى يحميه من الأذى وبدأت المناوشات بين الجميع وعطيه يجلس ينتظر أن يقوم رجاله بمهمتهم ولكن رجال عطيه يعلمون مدى قوة سعد وبطشه فلم يجرؤ أحدهم على الالتحام معه وكل منهم ينتظر أن يقوم الآخر بهذه المهمة الانتحارية ولاحظ عطيه تخاذل الرجال فصاح فيهم: اللي حيقتل سعد له مني نص مليون جنيه واللي حيهرب منكم أنا اللي حقتله " تشجع الرجال بعد سماعهم هذا العرض وبدأوا في محاولة الالتحام مع سعد الذي ظل يلوح بسلاحه محاولاً إصابة من يستطيع عن بعد حتى لا يترك حماية يسري الذي يعلم جيداً أنه لن يستطيع حماية نفسه من هؤلاء الضباع البشرية ولكن هؤلاء بدأوا في تضيق الحلقة على سعد وأخيه وقذف أحدهم بمطواته في اتجاه سعد الذي حاول صدها بالساطور ونجح في ذلك ولكن في نفس اللحظة قذف آخر بمطواته التي أصابت فخذ سعد فأصبح لا يقوى على الوقوف ولكنه تحامل على نفسه وظل واقفاً وإصابة أحد المهاجمين الذي سقط مضرجا في دمائه واصاب الرعب واحد آخر فحاول الفرار من الباب الخلفي للمقهى ولكن كان في انتظاره الصبية بالحجارة وما إن خرج إلا ووجد احد النساء تسكب عليه الزيت المغلي مع إستمرار الصبية في قذف الحجارة ثم سقط ثالث بضربة ساطور أخرى وعند



ذلك نهض عطية وهو يقول: الظاهر مفيش فايده لازم الواحد يوسخ أيده بدمك " ثم أخرج سيفاً من داخل ثيابه وهو يتقدم باتجاه سعدوفي نفس الوقت كان أحد رجاله يحاول إصابة يسري حتى ينشغل سعد بإصابة أخيه فتفتح ثغرة يستطيع من خلالها قتل سعد ولكن كان سعد منتبهاً تماماً لهذه المحاولة الخبيثة فركز على ضرب هذا المعتدي فأصابه ووقع هو الآخر أرضاً وعند ذلك كان الرجال من أهل المنطقة يتشجعون عندما يسقط أحد أفراد عصابة عطية ويهللون وكل منهم ينتظر أن يبدأ الآخر بالهجوم حتى يتشجع هو الآخر ويهجم معه وفي تلك الأثناء جاءت سيارة نصف نقل وبداخلها رجلان وعلى متنها خمسة رجال آخرين ووقفت أمام المقهى وترجل منها السائق ووقف يتربص الموقف وفي نفس اللحظة أصيب سعد بطعنة في ذراعه الأيمن فنقل الساطور إلى يده الأخرى وهو ينزف دماً من ساقه اليسرى وذراعه الأيمن وكل ذلك وهو يجعل من جسده درعاً حتى يقي أخيه من العصابة التي أصبح عددها خمسة وظل سعد يلوح بسلاحه ويكر ويفر حتى أصاب شخصاً آخر وعند ذلك هجم عليه عطية وأصابه بسيفه في نفس الذراع المصابة وزادت الآلام على سعد ولكنه ظل متماسكاً وهو يعلم أن أي تخاذل منه سيكون ثمناً لحياته وحياء أخيه وحاول ضرب عطية الذي كان يضرب ويفر في حماية رجاله ثم أصاب سعد شخصاً آخر ثم آخر حتى أصبح الباقي رجالاً مع عطية وإلى هنا كانت قوى سعد تخور ويفقد الرؤية بسبب كثرة الدماء التي فقدوها ولاحظ عطية هذا الأمر فتقدم وضرب سعد بسيفه في الذراع الأخرى وسقط الساطور من يده فتناول يسري الساطور محاولاً حماية سعد ونفسه ولكن كان عطية أسرع فضرب يسري بساقه في رأسه فسقط الساطور من يده قبل أن يتمكن من الحفاظ عليه وهنا تقدم عطية بكل ثقة أنه قاتل سعد لا محالة ورفع سيفه حتى

يهوي به على جسد سعد وفي هذه اللحظة دوت صوت رصاصة وسقط عطيه أرضاً قتيلاً برصاصة في رأسه وحاول الرجلان الباقيان الفرار ولكن كان الرجال الموجودين في السيارة النصف نقل قد احاطوا بهما وسمعا صوت يحذرهما من المقاومة وإلا مصيرهما سيكون القتل مثل زعيمهم عطيه وفي هذه اللحظة سقط سعد تماماً بعد أن خارت قواه وراح في غيبوبة وبعد يومين أفاق سعد ووجد يسري يجلس بجانبه في أحد المستشفيات وهو يقول: حمدا لله على السلامة أخيراً فقت يا سعد " هو فيه ايه! أنا فين! ايه اللي جابني هنا! هو فين عطيه! " متخافش يا خويا كابوس وانزاح عطيه مات ورجالته اتمسكوا كلهم " ازاي ده حصل مين اللي مسكهم " اللي مسكهم وقتل عطيه محمد باشا دراز هو اللي ضربه بالرصاص في الوقت المناسب ده ربنا نجاك ونجاني من القتل وبعته في الوقت المناسب " الحمد لله الحمد والشكر ليك يا رب بس أنا مش حاسس بدراعي اليمين خالص ودراعي الشمال واجعني قوي ورجلي الشمال كمان واجعاني حتموتني ايه كل الشاش ده أنا مربوط كده ليه أنا ايه اللي حصلي " حصل كل خير المهم إنت عايش والحمد لله وكل حاجه بعد كده نحمد ربنا عليها " طيب دراعي اليمين ده مش حاسس بيه ليه " معلش يا سعد كلها كام اسبوع وتبقى زي الفل وترجع احسن من الأول " طيب افهم أنا جرافي ايه ماله دراعي " ضربة السيف بتاعة الزفت ده قطعتك العصب لكن الحمد لله الإسعاف اللي جت بسرعه ونقلتك المستشفى والعملية اللي اتعملتك بسرعه حتخليك ترجع تحس بكل حاجه متقلش إنت بس وكل حاجه حتمر بسلام " أنا مش هاممني أي حاجه حتى لو دراعي مرجعش تاني المهم عندي إنك بخير وأنا وفيت بوعدني لربنا إني أتوب والحمد لله إنها جت على كده " وفي هذه اللحظة دخل المقدم محمد دراز وهو يحمل

بأقة من الزهور وهو يقول: أخيراً فقت يا سعد إنا بقالنا يومين مستنيناك تفوق بقى شوية العيال دي تعمل فيك كده وعاملي فيها بس الواد اللي مجابتوش ولاده " أهلا يا محمد باشا أنا خلاص مبقتش نافع تاني بعد اللي جرافي " جراك إيه يا بطل إنت كلها اسبوعين تلاته وبعدين شهرين تلاته علاج طبيعي وتبقى زي الفل أنا سألت الدكاترة وهما قالولي كده وبعدين حنروح بعيد إيه هو مش أخوك برضه دكتور متقوله يا دكتور يسري " أنا لسه قايله ومعرفه بس أنا بطلب من سيادتك طلب أتمنى إنك تحققهولي " طلب إيه يا دكتور ده إنت تؤمر عشان خاطر البطل ده " العفو يا محمد باشا أنا طالب من سعادتك إنك تعتق بقى سعد من الشغل معاك " تصدق بالله أنا جاني الطلب ده من فوق قوي ومقدرش اقول لأ " من فوق فين يا باشا " من عند ربنا أحب أبلغكم إني انتقلت في حركة الشرطة الجديدة وسبت المنطقة كلها زي ما يكون ده سبب إني اسيبك يا سعد ولو إنك حتوحشني وعلى فكره إنت كل ملفاتك اتقلت قبل ما أمشي ودي خدمة مني ليك يا سعد عشان تعرف بس إني عمري ما أفرط فيك " يعني إيه كده مفيش أي سابقه ليا " لأ خلاص ملفك دلوقتي أبيض ومفيش حد يقدر يقولك تلت التلاته كام بس أنا عندي سؤال ليك يا سعد تجاوبني بصراحه " اتفضل يا باشا " إنت فيك حاجة لله ازاي كل ده يحصل في وقت قصير إنت عملت إيه فهمني " أنا دعيت ربنا ودموعي سابقاني إنه يقبل توبتي والظاهر إنه قبلها فعلا لأن اللي حصل ده ولا في الاحلام " أه يعني عايز تقولي أنها كانت توبه نصوح " أه يا باشا كانت توبة صادقة من القلب.

" تمت بحمد الله تعالى "



ranyhmtwlyblat@gmail.com  
002-01061635162  
002-01156655890





وبينا هو ساجد في الصلاة لم يشعر  
إلا ودموع ساخنة تنساب من عينيه  
وهو يدعو الله أن يجعل له مخرجا  
وظل جالسا في مكانه حتى غلبه  
الناس وبعد ذلك شاهر عطية  
وهو يتقدم منه حاملا سيفه ويقول:  
أنا مش قتلتك اقتلني عشان لو  
موصاش أنا اللي حقتك أهو  
دلوقتي نهايتك على أيري .

مجري البكري

تصميم منقح شومات



002 - 01061635162

002 - 01503570075

ranyhmtwlyblat@gmail.com